

Makulu Ghasemeeye ghaa Yesu
Kilīsito agha
Luka
Aahandiikiye
Kwanjula

Kitabo kini kikhandiikuwa Luka oghu akahandiika dhe *Kitabo kya Bikoluwa bya Bakwenda*. Eye akaba atali Muyūdaaya bhaatu akaba ali Mugiliki asomiye munu, musaasa oghu aafooka Mukilīsitaayo. Eye akahalekeeleliya mukwenda Paulo haa simui haa ngendo siye sya kutebeja Makulu Ghasemeeye ghaa Yesu. Mu kitabo kini Luka asobolooye haa bwomiji kandi mulimo ghwa Yesu mu mulingo ghuteekaane niikuwo bantu batali Bayūdaaya bagubhe kwetegheeleliya.

Mu kitabo kini Luka ahandiikiyemu makulu ghakaniye aghatali mu bitabo binji bya Makulu Ghasemeeye. Ahandiikiy'o kubyaluwa kwa Yohaana Mubatiji, kubyaluwa kwa Yesu, bukelembe buwe, na butebeji bwa Yohaana Mubatiji. Aatodha ooleka dhe ngoku Luhanga akundiye bantu baa milingo yoona. Yesu akooleka eki naaha nsimo nga olu aahaaye haa Musamaliya mulungi (nsuula 10). Aabugh'o lusimo haa mwana oghu akabula (nsuula 15). Aabugh'o lusimo lwa mukumaaniya wa musolo (nsuula 19). Aalaghanija bwomiji nkoli ya bibhi oghu aaghendagha kukuwa (nsuula 23).

Luka aatodha dhee aabugh'o milundi ekanⁱye mulimo ghwa Mwoyo Ahⁱkilⁱye mu bwomⁱilⁱ kandi mulimo ghwa Yesu. Aatodha ooleka dhee ngoku Yesu aatwalagha bwile bukanⁱye naasaba.

Haakumaliilila kwa kitabo kini abughⁱy'o milundi ekanⁱye hambali Yesu aabonekeeye beeghesebuwa be haan^uma ya kuhumb^uuka kuwe mu bak^uuye. Eki kyolekagha ngoku majima kuwo Yesu aatodhⁱye aaba mwomⁱilⁱ haan^uma ya k^ukuwa.

Kighendeletuwa kya kuhandiika

¹ Wai Tijofilo, bantu bakanⁱye baahandiⁱkiye ebi Luhanga aakolⁱye ewaatu hani.

² Baahandiika ebi abaakalagha na Yesu kandi batebeji baa kighambo kya Luhanga baaboone naakola, kulughⁱilⁱ hambali aatandikiye kukola mulimo ghuwe, baatughambⁱye biyo.

³ Nahabweki obu naamalⁱye kubyetegheeleⁱya bhyani haabwa bwile bukanⁱye, naaboone kili kilungi nkuhandiikile biyo mbⁱsolongeeⁱye kusemeeye,

⁴ niikuwo omany^e majima gh'ebi baakwegheese^eye.

Malaiika naalanga ngoku Yohaana Mubatiji akubyaluwa

⁵ Bwile obu Helude aabaagha ali mukama wa Buyudaaya, akaba aliyo muhongⁱ, liina liye Jakaliya. Akaba ali memba wa kitebe kya bahongⁱ kya ntula baaghilaghamu Abbⁱja. Asweye Elijaabbeetⁱ, muusukulu wa Alooni.

⁶ Bombi bakaba bali bahikiliye mu maaso ghaa Luhanga kandi bakwete kwonini bilaghilo bya Mukama byona.

⁷ Bhaatu bakaba batali na mwana, nanga Elijaabbeeti akaba ali ngumba kandi bombi bakaakuuye.

⁸ Kilo kimui Jakaliya aataaha mu Numba ya Luhanga kukola mulimo ghuwe ghwa buhongi. Kitebe kyabo aaliikiyo kikukola wiiki eghi.

⁹ Kusighikila ngoku bahongi baakolagha, obu baa kitebe kyabo baakomiye buluulu niikuwo bamanye oghu akutaaha mu kisiika kihikiliye kya Mukama kutumika bubbani, Jakaliya oghu niye baakomiye.

¹⁰ Kibbula kya bantu bakaniye kimui baatighala enja mbanasaba, eye naanatumika bubbani.

¹¹ Niibuwo malajika wa Mukama aamuboneke-eye, eemiliye haa luhande lwabuliyo bwa eki baatumikagh'o bubbani

¹² Obu Jakaliya aamuboone, aaswekela kimui kandi oobaha.

¹³ Bhaatu malajika oghu aamughila ati, "Jakaliya otoobaha! Luhanga aaghuuye kusaba kwawe. Mukaawe Elijaabbeeti akukubyalila mwana wa wabusaasa kandi okumuluka lijina Yohaana.

¹⁴ Ti mwana oghu naabyauwe, okudheed-heluwa kimui kandi na bantu bakaniye bakudheedhuwa.

¹⁵ Akuba muheeleliya wamaani wa Mukama. Taalinuwa vjini esaaliye kedha kitamiliya kyona. Akubyaluwa aasuuye Mwoyo Ahikiliye.

16 Akukuukiya Banaisaaleeli bakanije ewaa Mukama Luhanga wabo.

17 Akulangilila ngoku Mukama akwisa. Luhanga akumuha butoki bwamaani ng'obu aahaaye Eliya. Akuleka baana baaghuwane na beesebo. Akuleka abaghaye bilaghilo bya Luhanga bekuukemu, babe na magheji nga ghaa bahikiliye, niikuwo beeteekanije kwisa kwa Mukama."

18 Niibuwo Jakaliya abuyiye malajika oghu ati, "Ti nkumanya ntiya ngoku eki kikub'o? Nanga siye na mukanje tukaakuuye!"

19 Malajika oghu aamukuukamu ati, "Niisiye Gabudyeli oghu nkuukalagha haai-haai na Luhanga nijumheeleliya. Niye antumiye kukughambila Makulu Ghasemeeye agha.

20 Bhaatu haabwa kubhenga kuhikiliya ebi naabughiye, tookutodha kubugha kuhikiya mwana oghu abyauwe, nanga ebi naabughiye ebi bwile bwabiyo bukaakuhika bikub'o."

21 Bantu bakaba banalindiliye Jakaliya kandi baswekiye ekilekiye alebbiye mu Numba ya Luhanga.

22 Obu aatooyemu, ataagubha kubugha nabo. Aakala naabakolela saini syonkaha. Niibuwo baamaniye ngoku aabonekeeuwe mu Numba ya Luhanga.

23 Aakuuka ewe e ka, obu bwile buwe bwa kuheeleliya mu Numba ya Luhanga bwahooy'o.

24 Haanuma ya bwile bukee, mukali wee Elijaabbeeti oghu aakuliya kandi eebisa kumala meeli ataano.

25 Aaghila ati, “Mukama angiliye ngughuma, anjihiy’o nsoni mu bantu!”

Malajika naalanga ngoku Yesu akubyaluwa

26 Obu etundu lya Elijaabeeti lyahikiye meeli mukaagha, Luhanga aatuma malajika Gabudyeli mu tauni ya Najaaleeti mu disitulikiti ya Galilaaya,

27 ewa manaabukali atamaniye basaasa liina liye Maliya, oghu Yojeefu, muusukulu wa Dhaudhi, aabaagha alughiye.

28 Malajika oghu aahika aalamukiya Maliya ati, “Mpempa yonkaha! Mukama aakukomiyemu! Aakuhaaye mugisa ghwamaani!”

29 Maliya aasobeeleluwa kimui haabwa ebi malajika oghu aabughiye kandi aatandika kwelilikana eki bikumaniisiya.

30 Malajika aamughila ati, “Maliya otoobaha, Luhanga aakuhaaye mugisa.

31 Okukuliya kandi obyale mwana wa wabusaasa. Okumuluka liina Yesu.

32 Akuba wamaani kandi balamughilaghamu Mwana wa Luhanga wa Eghulu Munu. Mukama Luhanga akumufoola mukama ngoku taata wee Dhaudhi aabaagha.

33 Niiye akulema ehanga lya Isaaleeli bilo n’ebilo, bulemi buwe tabulihuw’o.”

34 Maliya aabuuliya Malajika oghu ati, “Tanka-maniiye basaasa, ti ndakuliya ntiya?”

35 Malajika aamukuukamu ati, “Mwoyo Ahikiliye akukwis’o kandi okukuliya haabwa maani ghaa Luhanga wa Eghulu Munu. Niikiyo

kikuleka mwana oghu okubiyala mbamughilamu Ahikiliye kandi Mwana wa Luhanga.

³⁶ Olole, lughanda lwawe Elijaabeeti, oghu bakughilagha bati ni ngumba, nankabha akaaku-uye, aakuliye mwana wa wabusaasa kandi etundu liye lilimu meeli mukaagha,

³⁷ nanga Luhanga aagubhiye bintu byona.”

³⁸ Maliya aamukuukamu ati, “Ndi muheeleliya wa Mukama, nahabweki ngoku waabughiye haaliikuwo kyamb’o.” Dumbi malajika oghu aaghenda.

Maliya naabungila Elijaabeeti

³⁹ Obu byahooy’o bilo bikee, Maliya aaghenda bwangu-bwangu mu kyalo kya bwena kya Buyudaaya.

⁴⁰ Aataaha mu numba ya Jakaliya, aalamukiya Elijaabeeti.

⁴¹ Elijaabeeti makaaghuwa ati Maliya naamulamukiya, dumbi mwana aatandika kumugyanila munda. Mwoyo Ahikiliye aas’o Elijaabeeti oghu,

⁴² aamubughiisiya n’elaka lyamaani ati, “Luhanga aakuhaaye mugisa kusaaliya bakalibona kandi aahaaye mugisa mwana oghu okubiyala.

⁴³ Manya kyalughiye haa, nanje kutunga mugisa ghuni, nina Mukama wanje kwisa kumbungila?

⁴⁴ Nanga naabaaye makaaghuwa nondamukiya, mwana atandika kungyanila munda adheedheeuwe.

⁴⁵ Oli na mugisa kusijima ngoku makulu agha Mukama aakutumiiye ghakuba kuwo.”

Maliya naalimba kusinda Mukama

⁴⁶ Maliya aaghila ati, “Niibuwo naasindila kimui Mukama.

⁴⁷ Kandi mutima ghwanje ghudheedheeuwe haabwa Luhanga Mujuni wanje.

⁴⁸ Nanga aasukiye budhooti bwanje, siye muheeleliya wee. Kulugha obwalo, na bilo byona, bantu boona balaghilagha bati Luhanga akampa mugisa.

⁴⁹ Luhanga wa Butoki Bwona ahikiliye kandi ankoleeye bintu byamaani.

⁵⁰ Bantu boona, bwile bwona, abakumuhiyagha akubaghililagha ngughuma.

⁵¹ Oolekiye butoki buwe; aalangiye abali na byelilikano bya myepanko mu mitima yabo.

⁵² Aahulumuuye bakama baa bitinisa haa ntebe syabo sya bukama; aaha kitiinisa abatali na kitiinisa.

⁵³ Abakubbalagha Luhanga kubakoonela akubahaagha bintu bisemeeye. Bhaatu abataakubbalagha Luhanga kubakoonela, akubabhingagha magila kantu.

⁵⁴⁻⁵⁵ Aakoliye eki aalaghiisaniye baataata baatu; aakooneeye muheeleliya wee Isaaleeli. Aasukiye kughilila Ebbulahimu na baasukulu be boona ngughuma bilo n’ebilo!”

⁵⁶ Ti Maliya aamala na Eljaabeeti haai meeli asatu, aakuuka ewaabo.

Yohaana Mubatiji naabyaluwa

57 Obu bwile bwa Elijaabeeti bwa kubyaala bwahikiye, aabyala mwana wabusaasa.

58 Baliilanuwa be na nganda siye baaghuwa ngoku Mukama aamughiliye kisa kitiyo, boona baadheedhuwa hamui naye.

59 Obu mwana oghu aahikiiye bilo munaanaa, baasa kumusaliisiya* kandi baabbalagha kumuluka liina lya ese wee Jakaliya.

60 Bhaatu nina wee aaghila ati, “Bbaa, niiye akuba Yohaana!”

61 Baamughila bati, “Mu baataata be boona, taaliyo oghu balukiye liina eli!”

62 Niibuwo baakoleeye ese wee saini, kumubuuliya liina eli akubbala kumuluka.

63 Jakaliya aabakolela saini ati bamuhe kaakuhandiik’o. Aahandiik’o ati, “Liina liye niiye Yohaana.” Ti boona baasweka.

64 Dumbi Jakaliya aatandika kubugha kandi kusinda Luhanga.

65 Baliilanuwa be boona boobaha. Makulu agha ghaamalakaka kyalo kya bwena kya Buyudaaya eki kyona.

66 Ti muntu weena oghu aaghuwagha makulu agha, eebuuliya ati, “Mwana oghu naakujiye bhaawaj akuba atiya?” Nanga bakaba baboone ngoku aabyahuwe haabwa butoki bwa Mukama.

Jakaliya naalimba kusinda Luhanga

67 Mwoyo Ahikiliye aas’o Jakaliya oghu, aamubughiisiya kulanga ati,

* 1:59 1:59 Kyabaleevj 12:3

68 “Etuwe baasukulu baa Isaaleeli tusinde Mukama waatu! Nanga aatubungiiye kandi aatucunguuye.

69 Aatuhaaye Mujuni wamaani, muusukulu wa muheeleliya wee Mukama Dhaudhi,

70 ngoku Mukama aalaghiisaniiye hambele naakoleesiya balangi be bahikiliye ati

71 akutujuna ngighu syatu kandi abatwohiye boona.

72 Aaghila ati akughilila baataata baatu ngughuma kandi aasuke ndaghaano yee ehikiliye,

73 eghe aalahiiye naalaghiisaniiya taata waatu Ebbulahimu,

74 ati akutujuna ngighu syatu niikuwo tugubhe kumuheeleliya tutoobahiye,

75 ntukola ebimudheedhiye kandi ebihikiye mu maaso ghe, tunaakaaye.”

76 Aabugh’o mwana wee Yohaana oghu ati, “Ti uwe mwana wanje, balakughilaghamu mulangi wa Luhanga wa Eghulu Munu. Nanga okudubha kuhikila kulangilila bantu ngoku Mukama ak-wisa.

77 Okughambila bantu be aba ngoku akubajuna haabwa kubaghanila bibhi byabo.

78 Haabwa Luhanga waatu kutukunda kandi kutughilila ngughuma, akutuma Mujuni atwisemu naalugha mu eghulu

79 kughambila abatamaniye Luhanga kandi abakweyongelagha kusiiisa, kabhi akali mu kifubilo kya Luhanga kya kubahwelekeleliya eki alibaha kandi atwoleke ngoku tukutunga businge.”

80 Yohaana oghu aakula kandi aaba wamaani

mu mwoyo, aakala mu elungu kuhikiya kilo eki aatandikiyemu mulimo ghuwe mu bantu b'omu ehanga lya Isaaleeli.

2

Kubyaluwa kwa Yesu (Matayo 1:18-25)

¹ Bwile obu mukama Kaisaali Agusito aat'oku kilaghilo ati bantu boona b'omu kyalo kiye kyona beehandikiisiye, babaluwe.

² Kuni niikuwo kwabaaye kwehandikiisiya kw'okudubha kub'o, obu Kwilino aabaagha alemiye ehanga lya Siliya.

³ Nahabweki buli muntu aaghenda kwehandikiisiya mu tauni y'ewaabo.

⁴ Haabwa Yojeefu kuba muusukulu wa Dhaudhi, aalugha mu tauni ya Najaaleeti mu disitulikiti ya Galilaaya, aaghenda kwehandikiisiya mu tauni ya Bbeteleheemu mu disitulikiti ya Buyudaaya hambali taata wee Dhaudhi oghu aabyaluuwe.

⁵ Aaghenda kwehandikiisiya hamui na Maliya oghu aali alughiye, bhaatu atakamusweye. Maliya oghu akaba akuliye.

⁶ Banaliyeyo, Maliya aakwatuwa kubyala.

⁷ Aabyala mwana wa mulighaaso wabusaasa, aamuta mu byahi, aamulangaaliya mu kiibbokisi eki bitunguwa bikuliilaghamu, nanga bisiika by'omu looji bikaba ni byasuuye.

Malaika naaghambila baliisiya

⁸ Mu kyalo eki hakaba haliyo balijsiya, bwile obu baalaalagha mu kisaka balindiye bitunguwa byabo.

⁹ Dumbi malaika wa Mukama aababonekela. Kubebbeniya kwa butoki bwa Luhanga kwababbeniya. Ti boobahila kimui.

¹⁰ Niibuwo malaika oghu aabaghiliye ati, “Mutoobaha mbaleeteeye Makulu Ghasemeeye, ghakuleka bantu boona mbadheedheluwa kimui.

¹¹ Obwalo buni mu tauni ya Dhaudhi, Mujuni waanu aabyauwe, Kilisito Mukama.

¹² Ekikuleka nimumanya, mukusanga mwana nkelembe oghu, bamutaaye mu byahi, bamulangaaye mu kiibbokisi eki bitunguwa bikuliilaghamu.”

¹³ Dumbi kiigambi kyamaani kya baamalaiika b’omu eghulu baasunduka, baalungana na malaika oghu, mbasinda Luhanga bati,

¹⁴ “Luhanga wa Butoki Bwona abe na kitinisa. Ti bantu baa muni aba Luhanga eedheedheuwe baakale mpempa!”

¹⁵ Obu baamalaiika aba baalughiy’o, mbaakuuka mu eghulu, balijsiya aba baaghambilaana bati, “Bhaawaj, muleke tughende mu tauni ya Bbeteleheemu, tulole ekyabaayeyo, eki Mukama aatughambiiye.”

¹⁶ Dumbi baaghenda bwangu-bwangu, baasanga Maliya na Yojeefu hamui na mwana wabo nkelembe bamulangaaye mu kiibbokisi eki bitunguwa bikuliilaghamu.

¹⁷ Obu balijsiya aba baaboone mwana oghu baabugha byona ebimukwet’o ebi malaika aabaghambiiye.

18 Ti boona abaabiighuuye baaswekela kimui.

19 Bhaatu Maliya aakala aholeeye bintu ebi byona, naanabyelilikan’o bhyani mu mutima ghuwe.

20 Baliisiya aba baakuukayo mbahutliya kimui Luhanga kandi mbamusinda. Nanga byona ebi baaghuuye n’ebi baaboone bya mwana oghu, bikaba byonini ebi malajika aabaghambiiye.

Mbaluka Yesu lijina

21 Obu mwana oghu aahikiye bilo munaanaa, babyaye be baamusaliisiya. Baamuluka lijina Yesu, eli malajika aasanguwe amulukiye, Maliya atakakuliye.

22 Bwile bwahika bwa Maliya na Yojeefu kukola mukolo ghwa kwesemeliya ewaa Luhanga, ngoku bilaghilo bya Musa byalaghilagha. Baatwala mwana oghu Yelusaalemu mu Numba ya Luhanga kumuhaayo ewaa Mukama,

23 ngoku kihandjikuuwe mu bilaghilo bya Mukama ngu, “Buli mwana mulighaaso wabusaasa bamughilaghemu ahikiliye ewaa Mukama.”*

24 Baahaayo dheehonguwa ngoku bilaghilo bya Mukama byalaghilagha babyaye kukola. Kihonguwa eki kyabaagha biibjimbo bibili kedha bwana bwa buupiiso bubili.*

Simiyooni naalanga

25 Bwile obu musaasa omui lijina liye Simiyooni akaba ali mu Yelusaalemu. Ali muntu ahikiliye

* 2:23 2:23 Kulugha 13:2, 12 * 2:24 2:24 Kyabaleevi 12:8

kandi ahutiiye Luhanga. Akaba alindiliye kubona ngoku Luhanga akucungula bantu b'ehanga lya Isaaleeli. Mwoyo Ahikiliye aakalagha naye,

²⁶ kandi Mwoyo Ahikiliye oghu akaba naamughambiiye ati taalikuwa, kuhikiya obu alibona Kilisito wa Mukama.

²⁷ Mwoyo oghu aamughambila kughenda mu Numba ya Luhanga. Niibuwo Maliya na Yojeefu baakidhiyemu mwana wabo Yesu oghu kukola mukolo ngoku bilaghilo bya Luhanga byalaghi-lagha.

²⁸ Simiyooni aakwata mwana oghu, aamulela, aasiima Luhanga ati,

²⁹ “Mukama, siye muheeleliya waawe, noobu ndakuwa,
nkughenda mpemba kusighikila mu ndaghaano yaawe,

³⁰ nanga neenini neeboneeye Mujuni

³¹ oghu waatumiye mu bantu boona.

³² Niiye ali nga kyeleeli kwoleka batali Bayudaaya ngoku oli Luhanga.

Bantu baawe b'ehanga lya Isaaleeli bakuba na kitinisa haabuwe.”

³³ Yojeefu na Maliya baaswekela kimui haabwa bighambo ebi Simiyooni aabughiy'o mwana oghu.

³⁴ Simiyooni aabasabila ati Luhanga abahe mugisa. Aaghila Maliya ati, “Luhanga aakomiyemu mwana waawe oni. Bakaniiye mu bantu b'ehanga lya Isaaleeli abakumuhikilija bakujunuwa, bhaatu abakubhenga kumuhikilija bakuhwelekelela. Niiye akuba kaakulolel'o kaa

ntegheka ya Luhanga ya kujuna bantu be, oghu bantu bakaniye bakuhakaniya,

³⁵ niikuwo byelilikano byabo bimanuwe. Ti uwe nina wee, mutima ghulikusaalila munda nga muntu batubhitijemu kihiyo.”

Aana naabona mwana Yesu

³⁶ Mu Numba ya Luhanga eghi hakaba halimu dheer mulangi wabukali liina liye Aana, muhala wa Fanuweeli, w'omu ntula ya Aseli. Akaba akaakuuye. Anali mwesiki, akasweluwa, bhaatu haanuma ya myaka musanju eba wee aakuwa. Aakala ali mukwisiya.

³⁷ Aakaakulila kimui, aahikiya myaka ki-naanaa n'ena. Eesalagha kandi aalaalagha mu Numba ya Luhanga, naalamiya, naasimba kandi naasaba Luhanga.

³⁸ Aana oghu aasa eebinga Maliya na Yojeefu. Aatandika kusijima Luhanga. Aaghambila bantu boona abaabaagha balindiliye Luhanga kucungula bantu b'omu Yelusaalemu, ebikwet'o mwana oghu.

Maliya na Yojeefu mbakuuka Najaaleeti

³⁹ Obu Yojeefu na Maliya baamaliye kukola bintu byona ngoku bilaghilo bya Mukama byalaghilagha, baakuuka ewaabo mu tauni ya Najaaleeti, mu disitulikiti ya Galilaaya.

⁴⁰ Mwana oghu aakula kusemeeye, aaba na magheji kandi Luhanga aamuha migisa.

Yesu ali mu Numba ya Luhanga

41 Buli mwaka babyaye baa Yesu baaghendagha Yelusaalemu haa Kighenu kya Kuusuka Kusaaluw'o.

42 Obu aahikiye myaka ekumi n'ebili, baaghenda naye, ngoku baaghendaghayo buli mwaka.

43 Obu kighenu eki kyahooy'o, babyaye be baatandika kukuuka ewaabo. Bhaatu bataamanya ngoku Yesu aatighaaye Yelusaalemu.

44 Beelilikana bati ali mu bantu aba bakwete kughenda nabo. Obu baamaliye kilo kyona mbanaghenda batamuboone, baatandika kumubbala mu nganda syabo n'omu baabhootu baabo.

45 Obu bataamuboone, baakuuka Yelusaalemu mbanamubbala.

46 Haanuma ya bilo bisatu, baamusanga mu Numba ya Luhanga, asitamaye na beegheesiya baa bilaghilo, abategheleeiye kandi naababuuliya bibuuliyo. 47 Boona abaaghuuye ngoku akwete kukuukamu bibuuliyo kusemeeye, baasweka haabwa magheji agha ali nagho.

48 Obu babyaye be aba baamuboone baasweka. Niibuwo nina wee aamughiliye ati, "Mwana wanje, waatukoliye otiyo nangaaki? Olole siye na so waawe, tuukaaye ntukubbala tutuntuliye kimui!"

49 Yesu aabakuukamu ati, "Mwambbalagha nangaaki? Tamumaniye ngoku nkulaghiluwa kuukala mu numba ya Tita eni?"

50 Bhaatu bateetegheleliya ebi aabughiye.

51 Niibuwo aaghendiye nabo, baakuukayo mu tauni ya Najaaleeti. Aakala abadhooteeye.

Bhaatu bintu ebi byona, nina wee aakala naan-
abyelilikan'o mu mutima ghuwe.

⁵² Yesu eeyongela kukula, aaba na magheji,
adheedhije Luhanga hamui na bantu.

3

Yohaana Mubatiji naatebeja

(Matayo 3:1-12; Maliko 1:1-8; Yohaana 1:19-28)

¹⁻² Yohaana Mubatiji mutabani wa Jakaliya aatunga butumuwa bwa Luhanga obu aabaagha mu elungu hambali aakalagha. Oghu niighuwo ghwali ghuli mwaka ghw'ekumi n'etaano ghwa bulemi bwa Tibbeliyo mukama wa Looma, obu Pontiyoy Pilaato aabaagha alemiye disitulikiti ya Buyudaaya. Helude alemiye disitulikiti ya Galilaaya. Filipo waanina wee alemiye disitulikiti ebili ya Etuliya na Tulakoniti. Lisaniya alemiye disitulikiti y'Abbileene. Bwile obu Anansi na Kayaafa niibo baabaagha bakulu baa bahongi.

³ Yohaana oghu aaghenda mu bitwike byona ebilabhaane na maasi Yolodaani, naanalangilila ati bantu beekuukemu kandi babatijibuwe nikuwo Luhanga abaghanile bibhi byabo.

⁴ Mulangi Isaaya akahandiika ngu, "Muntu niibuwo aalangilila mu elungu ati, 'Mweteekanijje kwisa kwa Mukama; mukole ebi abbalije!

⁵ Musesemeliye bwomiji bwanu kandi muleke bintu byona ebibatwalijije.

6 T̄i bantu boona bakubona oghu Luhanga akutama kubajuna.’ ”*

7 Biigambi bya bantu byatandika kwisa ewaa Yohaana kubat̄ijibuwa. Niibuwo aabagh̄iye ati, “Enuwe abali na bubhi nga bwa njoka, mukwel̄ikana muti kubat̄ijibuwa kwonkaha kukuleka Luhanga atabafubila?”

8 Hatiini mukole ebikwoleka ngoku mwekūkiyemu. Muleke kughila muti Luhanga taakubafubila haabwa kuba baasukulu baa Ebbulah̄imu, nanga mbaghamb̄iye, Luhanga naabbaliye akugubha kuuhila Ebbulah̄imu baasukulu nankabha mu mabaale ghani!

9 T̄i n’endindi Luhanga eeteekan̄ije kufubiilila kimui abakukolagha bintu b̄ibh̄iye. T̄i na buli kiti ekitaakwana b̄ighuma bisemeeye, bakukijomba na ndyankui, bakikube mu mulilo.”

10 Niibuwo bantu aba baabūiye Yohaana oghu bati, “T̄i tukole ki?”

11 Aabakuukamu ati, “Oghu ali na ngoye ebili, aah’o oghu atali na luwo; n’oghu ali na byokuliya, aah’o oghu atali nabiyu.”

12 Obu bakumaaniya baa musolo nabo baasiye kubat̄ijibuwa, baamubūliya bati, “Mwegheesiya, t̄i, etuwe tukole ki?”

13 Aabaghila ati, “Mutasasūliyagha bantu kusaaliya ebi mulaghiwe.”

14 Baasilikale nabo baamubūliya bati, “T̄i etuwe tukole ki?” Aabaghila ati, “Mutahungagh’o bantu bintu byabo kedha

* 3:6 3:6 Isaaya 40:3-5

kubahabijiliya. Mwehiguhuwaghe musaala ghwanu ghubamaliye.”

¹⁵ Ngoku bantu baali batandikiye kulindilila Kilisito kwisa, baatandika kwelilikana bati kedha Yohaana niiye mukama oghu.

¹⁶ Bhaatu Yohaana aabaghila boona ati, “Siye nkubabatijagha na maasi, bhaatu oghu akwisa andabhiye tanihikiye na kuba muheeleliya wee, nanga ansaaiye butoki. Eye akubabatija na Mwoyo Ahikiliye kandi na mulilo.

¹⁷ Eeteekanije kukola bantu ngoku mulimi akweteekanijagha akwata kitalo kiye kweha mucele* ghuwe kuuyamu bisunga. Oghuseme-eye aghubiika mu nguli kandi bisunga abikuba mu mulilo ghutaakulimagma.”

¹⁸ Nahabweki Yohaana aakoleesiya milingo ekanije kutebeja bantu Makulu Ghasemeeye.

¹⁹ Aasoghosa Mukama Helude ati, “Waakoliye kubhi kuswela Heludiya mukaa wanjoko waawe Filipo, kuni wanjoko waawe oghu anaakaaye.” Aamusoghosa dheer haabwa bintu binji bibhiihiye bikanije ebi aakolagha.

²⁰ Niibuwo Helude aakoliye kintu kibhiihiye kimui kusaaliya byona ebi aali naakoliye; aata Yohaana oghu mu nkomo.

Yesu naabatijibuwa

(Matayo 3:13-17; Maliko 1:9-11)

²¹ Bhaatu batakwete Yohaana oghu, aabatija bantu bakanije. Obu baanabatijibuwagha, Yesu naye aabatijibuwa. Naanasaba, eghulu lyaghu-lika,

* **3:17 3:17** Bbaibbuli sinji sighthambiye ngano.

²² Mwoyo Ahikiliye aamusund’o nga kibimbo. Elaka lyalugha mu eghulu, ndighila liti, “Nuuwe Mwana wanje oghu nkundiye, oghu needheedheeuwe.”

*Baataata baa Yesu
(Matayo 1:1-17)*

²³ Obu Yesu aatandikiye kwegheesiya, akaba ali na myaka nga makumi asatu ya bukulu. Bantu baatekelejagha bati ni mutabani wa Yojeefu; Yojeefu mutabani wa Heeli,

²⁴ Heeli mutabani wa Matati, Matati mutabani wa Leevi,

Leevi mutabani wa Meleeki, Meleeki mutabani wa Yanaai,

Yanaai mutabani wa Yojeefu,

²⁵ Yojeefu mutabani wa Matatiya, Matatiya mutabani wa Amosi,

Amosi mutabani wa Nahumu, Nahumu mutabani wa Esili,

Esili mutabani wa Nagaai,

²⁶ Nagaai mutabani wa Mahati, Mahati mutabani wa Matatiya,

Matatiya mutabani wa Simeeni, Simeeni mutabani wa Yoseeki,

Yoseeki mutabani wa Yooda,

²⁷ Yooda mutabani wa Yohanaani, Yohanaani mutabani wa Leesa,

Leesa mutabani wa Jelubbabbeeli, Jelubbabbeeli mutabani wa Salatiyeeli,

Salatiyeeli mutabani wa Neeli, Neeli mutabani wa Meleeki,

²⁸ Meleeki mutabani wa Aadi, Aadi mutabani wa Kosaamu,

Kosaamu mutabani wa Elimadaamu,
 Elimadaamu mutabani wa Eli,
 29 Eli mutabani wa Yosuwa, Yosuwa mutabani wa
 Eliyeeja,
 Eliyeeja mutabani wa Yoliimu, Yoliimu mutabani
 wa Matati,
 Matati mutabani wa Leevi,
 30 Leevi mutabani wa Simiyooni, Simiyooni mu-
 tabani wa Yuda,
 Yuda mutabani wa Yojeefu, Yojeefu mutabani wa
 Yonaamu,
 Yonaamu mutabani wa Eliyakimu,
 31 Eliyakimu mutabani wa Meleeya, Meleeya
 mutabani wa Meena,
 Meena mutabani wa Matata, Matata mutabani
 wa Nasani,
 Nasani mutabani wa Dhaudhi,
 32 Dhaudhi mutabani wa Yese, Yese mutabani wa
 Obbedi,
 Obbedi mutabani wa Bbowaaaji, Bbowaaaji muta-
 bani wa Salimooni,
 Salimooni mutabani wa Naasoni,
 33 Naasoni mutabani wa Aminadaabbu, Ami-
 nadaabbu mutabani wa Adimijini,
 Adimijini mutabani wa Alaani, Alaani mutabani
 wa Hejilooni,
 Hejilooni mutabani wa Peleeji, Peleeji mutabani
 wa Yuda,
 Yuda mutabani wa Yakobbo,
 34 Yakobbo mutabani wa Isaka, Isaka mutabani
 wa Ebbulahimu,
 Ebbulahimu mutabani wa Teela, Teela mutabani
 wa Naholi,
 35 Nahuli mutabani wa Selugi, Selugi mutabani
 wa Leewa,

Leewa mutabani wa Peleegi, Peleegi mutabani
 wa Ebbeli,
 Ebbeli mutabani wa Seela,
³⁶ Seela mutabani wa Kainaani, Kainaani muta-
 bani wa Apakisaadi,
 Apakisaadi mutabani wa Seemu, Seemu muta-
 bani wa Nuha,
 Nuha mutabani wa Lameeki,
³⁷ Lameeki mutabani wa Metuseela, Metuseela
 mutabani wa Enoka,
 Enoka mutabani wa Yaledi, Yaledi mutabani wa
 Mahalaleeli,
 Mahalaleeli mutabani wa Kainaani,
³⁸ Kainaani mutabani wa Enosi, Enosi mutabani
 wa Seeji,
 Seeji mutabani wa Adamu, Adamu mutabani wa
 Luhanga.

4

Sitaani noohiya Yesu *(Matayo 4:1-11; Maliko 1:12-13)*

¹ Yesu aalugha mu maasi Yolodaani, aasu-
 uye maani ghaa Mwoyo Ahikiliye. Ti Mwoyo
 Ahikiliye oghu aamuhikiliya kughenda mu
 elungu,

² hambali aamaliye bilo makumi anaa Sitaani
 naanamwohiya. Aamala bilo ebi byona
 atakuliya na kantu koonu. Obu bilo ebi
 byahooye njala yaamukwata.

³ Niibuwo Sitaani aamughiliye ati, “Okaakuba
 oli Mwana wa Luhanga, olaghile ebaale lini
 lifooke byokuliya.”

4 Yesu aamughila ati, “Kihandiijkuuwe ngu, ‘Muntu taakubaagha mwomili haabwa byokuliya byonkaha.’* ”

5 Niibuwo Sitaani aamutwete hambali hakangamiye, dumbi aamwoleka makama ghaa munsu ghoona.

6 Sitaani oghu aamughila ati, “Nkukuha butoki na kitinisa kya makama agha ghoona. Nanga byona bakabimpa kandi nkugubha ku-biha weena oghu mbbaliye.

7 Nahabweki nuwandamiye, bintu ebi byona bikuba byawe.”

8 Yesu aamukuukamu ati, “Kihandiijkuuwe ngu ‘Olamiyaghe Mukama Luhanga waawe kandi aaniye waaheeleliyagha enkaha.’* ”

9 Dumbi Sitaani aamutwala mu kibugha kya Yelusaalemu, aamuniniya haa kasui kakangamiye kaa Numba ya Luhanga. Aamughila ati, “Okaakuba oli Mwana wa Luhanga, ohalale weesimbe hansi,

10 nanga kihandiijkuuwe ngu,
“ ‘Akulaghila baamalajika be bakuloleelele,
bakulinde bhyani.

11 Bakukwatilile mu ngalo syabo,
niikuwo oteehuulila ebaale ohendeka kighele.’* ”

12 Bhaatu Yesu aamukuukamu ati, “Kihandiijkuuwe ngu, ‘Otalilengesa Mukama Luhanga waawe.’* ”

* 4:4 4:4 Kyabilaghilo 8:3 * 4:8 4:8 Kyabilaghilo 6:13 * 4:11
4:11 Jabbuli 91:11-12 * 4:12 4:12 Kyabilaghilo 6:16

13 Obu Sitaani oghu aamaliye kwohiya Yesu mu milingo eghi yoonu, aamulugh'o, aalinda kutunga bwile bunji bwa kumwohija.

Yesu naatandika mulimo ghuwe mu Galilaaya (Matayo 4:12-17; Maliko 1:14-15)

14 Yesu aakuuka Galilaaya aasuuye maani ghaa Mwoyo Ahikiliye. Makulu ghaamalakaka kyalo eki kyona ngoku aliyeyo.

15 Eegheeseliya mu malamiliyo ghaa Bayudaaya, ti bantu boona baamusinda.

Bantu baa Najaaleeti mbahakaniya Yesu (Matayo 13:53-58; Maliko 6:1-6)

16 Yesu aaghenda mu tauni ya Najaaleeti hambali aakuliye. Obu kilo kya Sabhato kyahikiye, aaghenda mu elamiliyo lya Bayudaaya ngoku aakolagha. Aamilila kusoma kicweka.

17 Baamuha kitabo eki mulangi Isaaya aahandiikiye. Aabbukula hambali kihandiikuwe ngu,

18 "Mwoyo wa Mukama ali hamui nanje,
nanga ankomije
kulangilila banaku Makulu Ghasemeeye.
Antumiye kulangilila abakwatuwe ngoku
bakulekeluwa
kandi aba maaso ghaaghaaye bakubona,
kuha bughabe abamighiluwe,

19 kandi kulangilila mwaka ghwa kisa kya Mukama."*

20 Dumbi aaswikila hambali aasomagha, kitabo eki aakiha muheeleliya w'omu elamiliyo

* 4:19 4:19 Isaaya 61:1-2

eli. Aasitama. Ti bantu boona abaabaaghamu baakala bamuloleleeye.

²¹ Aabaghambila ati, “Oghu Ebyahandiikuuwe mwaghuuye ebi bikwete kubugh’o, nijsyoni.”

²² Boona baatandika kumusinda, ti bintu bise-meeye ebi aabughiye byaswekiya bantu aba, baaghila bati, “Dhaani oghu taaniye mutabani wa Yojeefu?”

²³ Niibuwo aatodhiye aaghila bantu aba ati, “Majima kuwo mukuntwila lusimo luni muti, ‘Mukumu weetambile.’ Kandi mungile muti, ‘Haabwaki byakuswekaniya ebi twaghuuye nookolela Kapelenaumu, otaabikoleeye mu tauni y’ewaanu eni?”

²⁴ “Mbaghambiiye majima, taaliyo mulangi n’omui oghu bakuhutiyağa mu kyalo ky’ewaabo.

²⁵ Majima, obu Eliya aabaagh’o, mbula ekamala myaka esatu n’ekicweka etakatoonie, ti njala yaaghwila kimui mu kyalo eki. Kandi bwile obu bakwisiya bakaniye Banaisaaleeli baabonabonagha.

²⁶ Bhaatu haabwa kutahikilija kwabo Luhanga taatumie Eliya oghu kukoonela mukwisiya n’omui Munaisaaleeli, kuuy’o mukwisiya omui oghu akaba ali na kuhikilija nankabha naabaagha ali munamahanga w’omu tauni ya Jelafaati mu kyalo kya Sidooni.

²⁷ Kandi obu Elisa aabaagh’o, Banaisaaleeli bakaniye bakaba balwaye ntumbi, bhaatu haabwa kutahikilija kwabo taaliyo Munaisaaleeli n’omui oghu Elisa aakiliye, kuuy’o akakiliya Namanı oghu akaba ali na

kuhikilija nankabha naabaagha munamahanga alughiye Siliya.”

²⁸ Obu bantu abaabaagha mu elamiliyo eli baaghuuye Yesu naabasoghosa haabwa kutahikilija kwabo, kiinigha kyabakwatila kimui boona.

²⁹ Dumbi baamuka, baamughwilikiilila, baamutwesiya mu tauni yabo eghi, baamutwala eeguuli ya keena hambali bakweye tauni eghi bati niikuwo bamukube haa musiya.

³⁰ Bhaatu aabakwama haagati, aaghenda.

*Yesu naakiliya muntu oghu kilimu kikwete
(Maliko 1:21-28)*

³¹ Yesu aahona, aaghenda mu tauni ya Kapele-naumu, mu disitulikiti ya Galilaaya. Obu kilo kya Sabhato kyahikiye, eegheeseliya mu elamiliyo lya Bayudaaya.

³² Baaswekela kimui kuughuwa ebi akwete kwegheesiya, nanga eegheesiyagha na butoki.

³³ Mu elamiliyo eli, musaasa oghu kilimu kikwete akaba halimu. Aatandika kutakanganilana kimui ati,

³⁴ “Hee! Uwe Yesu w’omu tauni ya Najaaleeti, okutubuniya ki? Waasiye kututuwa? Nkumanije, nuuwe Ahikiliye wa Luhanga!”

³⁵ Bhaatu Yesu aatanuka kilimu eki ati, “Holiya kandi omulugh’o!” Ti kilimu eki kyagenga musaasa oghu haagati ya bantu aba, kyamulugh’o, kitaamukol’o kantu na kamui kabhijhiye.

³⁶ Ti boona baasweka, baaghambilana bati, “Kini nkiki? Oni ali na butoki kandi

maani! Bhaaba akubhingagh'o bantu bilimu, bibalugh'o!"

³⁷ Makulu ghaa Yesu haabwa ebi aakolagha ghaamalakaka disitulikiti ya Galilaaya yona.

*Yesu naakiliya bantu bakaniye
(Matayo 8:14-17; Maliko 1:29-34)*

³⁸ Yesu aalugha mu elamiliyo eli, aaghenda mu ka ya Simooni. Nina mukaa Simooni oghu akaba alwaliye kimui muswija. Beesengeleliya Yesu bati amukiliye.

³⁹ Niibuwo Yesu aamiliye hambali ali, aalaghila muswija oghu kumukila, ghwamukilil'o, dumbi mukali oghu aamuka, aatandika kubateekela.

⁴⁰ Obu bwahikiye lwagholo, bantu baaleetela Yesu balwaye baabo boona baa ndwala sya milingo yona. Mulwaye weena oghu aamukumagh'o aakilagha.

⁴¹ Yesu aabhing'o dheer bantu bakaniye bilimu. Obu byabaagha mbibalugh'o byatakanganagha biti, "Nuuwe Mwana wa Luhanga!" Bhaatu aabitanukagha kandi abitanga kubugha, nanga bikaba bimumaniye ngoku aaniye Kilisito.

⁴² Obu bwakeeye, aaghenda haakpengbu enkaha. Niibuwo bantu baatandikiye kumubala. Obu baamuboone, baaleng'o kumutanga bati ataghenda.

⁴³ Bhaatu aabaghila ati, "Nkulaghiluwa kughenda dheer mu maatauni ghanji, kulangililayo Makulu Ghasemeeye ghaa bulemi bwa Luhanga. Nanga eki niikiyo kyalekiye naasa muni."

44 Niibuwo aaghendiye mu disitulikiti ya Buyudaaya yoonaa naalangilila mu malamiliyo ghaa Bayudaaya.

5

Yesu naabilikila beeghesebuwa be b'okudubha (Matayo 4:18-22; Maliko 1:16-20)

¹ Kilo kimui, Yesu akaba aamiliye haa kisiyo kya nanja ya Genesaleeti,* bantu bakaniye kimui beekumaaniliya hambali ali kandi baamighililana kumwebinga kuughuwa kighambo kya Luhanga.

² Aabona maati abili ghali haai-haai na kisiyo mu maasi, bakama baagh'o baghalughiyemu, mbanaabiya butimba bwabo.

³ Aanijina mu bwa Simooni. Aamusaba kubwesukaniya kabhii kulugha haa kisiyo. Dumbi aabusitamamu, aatandika kwegheesiya bantu aba.

⁴ Obu aamaliye kwegheesiya, aaghila Simooni ati, "Osukane bwati hambali maasi ghatobhe-eye, muteghe butimba bwanu, mukukwata nsui sikaniye."

⁵ Simooni aamukuukamu ati, "Mwegheesiya, twatalibaane twabukeesiya, ti tatwakwete na kantu. Bhaatu ngoku wangiliye oti mbuteghe, nkubutegha."

⁶ Obu baabuteghiye baikwata nsui sikaniye kimui, ti butimba bwabo obu bwabbala kutwika.

⁷ Dumbi baalomba baanakyabo abaabaagha bali mu bwati bunji kwisa kubakoonela. Baasa,

* 5:1 5:1 Nanja eghi baaghighilaghamu dheer Galilaaya.

baasuliyā maati agha ghombi, ti ghaabbala kukota ekulimu mu maasi.

Simooni na baanakiye mbakwama Yesu

⁸ Obu Simooni Peetelo oghu aaboone atiyo, aateeliya Yesu mu maghulu, aaghila ati, “Mukama ondeke, ndi muntu musiji!”

⁹ Aabugha atiyo nanga eye na baanakiye boona bakaba baswekeeye kimui haabwa nsui sikaniye kimui esi baakwete.

¹⁰ Yakobbo na Yohaana batabani baa Jebbe-daayo, nabo dhee baaswekela kimui. Yesu aaghila Simooni oghu ati, “Oleke kwobaha! Kutandikila endindi, okuba mukomani wa bantu.”

¹¹ Dumbi baasukana maati ghaabo agha haa kisiyo, baatigha byabo byona, baamukwama.

Yesu naakiliya musaasa

(Matayo 8:1-4; Maliko 1:40-45)

¹² Kilo kimui, obu Yesu aabaagha ali mu tauni emui, aasanga musaasa alwaye ntumbi. Obu musaasa oghu aamuboone, aateeliya mu maghulu ghaa Yesu, aamwesengeleliya ati, “Mukama! Olakaba obbaliye, gutu onkiliye niikuwo nsemele.”†

¹³ Yesu aananula mukono ghuwe aamukum’o, aamughila ati, “Mbbaliye, kila!” Dumbi musaasa oghu ntumbi yaamukilil’o.

¹⁴ Niibuwo Yesu aaghiliye musaasa oghu ati, “Otaghambila muntu n’omui, kuuy’o oghende ewaa muhongu akulole kandi ohonge kisémbó

† 5:12 5:12 Bayudaaya baabonagha abalwaye ntumbi bataseme-eye mu baanakyabo na ewaa Luhanga.

eki Musa aalaghiye nga buukajiso mu bahongi kubooleka ngoku waakiliye kandi waasemela.”

¹⁵ Noo makulu ghaa Yesu gheeyongela kumalakaka hoona-hoona. Biigambi bya bantu byasagha kumutegheeleliya na kubakiliya ndwala syabo.

¹⁶ Bhaatu Yesu aabalughagh’o aaghenda mu bijkalo hambali muntu atali aasabilayo.

*Yesu naakiliya musaasa aghenagheneewe
(Matayo 9:1-8; Maliko 2:1-12)*

¹⁷ Kilo kimui obu Yesu eegheesiyagha, bami mu Bafalisaayo hamui na beegheesiya baa bilaghilo bakaba basitamiy’o. Balughiye mu mibhili yona ya disitulikiti ya Galilaaya, na ya Buyudaaya n’omu kibugha kya Yelusaalemu. Mukama akaba amuhaaye butoki bwa kukiliya balwaye.

¹⁸ Niibuwo basaasa baasiye baheekeeye haa kalili musaasa aghenagheneewe. Baaleng’o kumutaahiya mu numba kumukidhiya hambali Yesu ali.

¹⁹ Bhaatu haabwa bantu kukanilamu kimui, tabaagubhiye kumukidhiy’o Yesu. Nahabweki baaniina baatobhola kihulu haa lusui lwa kisi-ika eki Yesu eegheeseliyaghamu, baakoteliyamu musaasa oghu bamulangaaiye haa kalili ke. Baamukidhiya hambali Yesu ali.

²⁰ Obu aaboone kuhikilija kwabo, aaghila musaasa oghu ati, “Bhootu syanje, bibhi byawe byakughaniwe.”

²¹ Niibuwo beegheesiya baa bilaghilo hamui na Bafalisaayo baatandikiye kwelilikana bati,

“Musaasa oni akugubha atiya kubugha ng’eki? Oku ni kwambula Luhanga! Taaliyo muntu n’omui oghu akugubha kughanila bibhi kuuy’o Luhanga enkaha!”

²² Yesu aakenga ebi bakwete kwelilikana, aabaghila ati, “Mukwete kwelilikana mutiyo nangaaki?”

²³ Ekidhootiye kubugha ni kyahaa? Kughila nti, ‘Bibhi byawe byakughaniiwe,’ kedha kughila nti ‘Oomuke kandi olubhatange’?

²⁴ Bhaatu nkubbala mumanye ngoku, Mwana wa Muntu, ali na butoki muni muni kughanila bantu bibhi.” Aaghila mulwaye oghu ati, “Nkulaghiye, oomuke, okome kalili kaawe, weeghendele ewaawe!”

²⁵ Dumbi musaasa oghu aamuka, aakoma kalili ke, eeghendela naasinda Luhanga, boona banamuloleleeye.

²⁶ Boona baaswekela kimui kandi baasinda Luhanga bati, “Obwalo, twaboone kyakuswekaniya kyamaani!”

*Yesu naabilikila Leevi
(Matayo 9:9-13; Maliko 2:13-17)*

²⁷ Haanuma y’eki, Yesu aatuwa, aabona mukumaaniya wa musolo liina liye Leevi, asitamiiye mu ekumaaniliyo liye. Aamughila ati, “Onkwame.”

²⁸ Dumbi Leevi aamuka, aatigha bintu biye byona, aamukwama.

²⁹ Leevi oghu aakolela Yesu kighenu kyamaani mu numba yee. Haa kighenu eki hakaba haliyo bakumaaniya baa musolo bakaniye na bantu banji mbaliya hamui na Yesu.

³⁰ Niibuwo Bafalīsaayo hamui na beegheesiya baa bilaghilo abaabaagha bali Bafalīsaayo baatandikiye kutonganilana kimui na beeghesebuwa baa Yesu mbaghila bati, “Mukuliyagha na bakumaaniya baa musolo na basiisi nangaaki?”

³¹ Obu Yesu aakiighuuye, aabaghila ati, “Abatalwaye tabakubbalagha mutambiji bbaa, kuuy’o abalwaye.

³² Tanaasiye haabwa bahikiliye, bhaatu haabwa basiisi kwekuukamu.”

Kibuuliyo haa kusiiba

(Matayo 9:14-17; Maliko 2:18-22)

³³ Bamui mu bantu aba baabuuliya Yesu bati, “Beeghesebuwa baa Yohaana hamui na beeghesebuwa baa Bafalīsaayo bakusabagha nsaala kandi basiiba, bhaatu baawe bakuliyagha kandi banuwa, nangaaki?”

³⁴ Yesu aabakuukamu ati, “Buuye okugubha otiya kuleka bagheni abali mu bugheni bwa kuswela mbasiiba kuni oghu akuswela anali nabo?”

³⁵ Noo bwile bulihika obu balibaayamu oghu akuswela oghu, obu niibuwo balisiiba.”

³⁶ Niibuwo Yesu aabatwiliye lusimo ati, “Taaliyo oghu akubhandikagha kitwike kya lughoye luhyaka haa lughoye lukulu. Naanakoliye kuwo, kitwike kihyaka eki kikubhula lukulu olu kilutemule kandi kitwike kihyaka eki takikususaana na lughoye lukulu olu.

³⁷ Taaliyo n’omui oghu akutaagha viini mpyaka mu mpu sikulu, naanakoliye atiyoye,

vijini mpyaka ekwatiya mpu sikulu esi eseeseke kandi mpu esi sibhiye. ³⁸ Bhaatu vijini mpyaka babhonganuuwe kughita mu mpu sihyaka.

³⁹ Kandi taaliyo n'omui haanuma ya kunuwa vijini nkulu, akubbalagha kunuwa mpyaka, akughilagha ati, 'Nkulu esaaiye.' "

6

*Yesu niye Mukama wa kilo kya Sabhato
(Matayo 12:1-8; Maliko 2:23-28)*

¹ Kilo kya Sabhato kimui, Yesu aasaalilagha mu misili ya ngano. Beeghesebuwa be baakala kukobha mituwe ya ngano eghi mbanaghyesingeelela mu ngalo, mbanaghiliya.

² Niibuwo bamui mu Bafalisaayo baabuuiye bati, "Kusighikila mu bilaghilo, mukwete kukola ekitahikiye kukoluwa haa kilo kya Sabhato nangaaki?"

³ Yesu aabakuukamu ati, "Buuye tamukaso-magha ebi Dhaudhi aakoliye obu eye naaba abaabaagha naye njala yaabaagha ebakwete?"

⁴ Akataaha mu Numba ya Luhanga, aaliya migaati eghi bahongeeye Luhanga. Kandi aaghiha n'abaabaagha naye. Migaati eghi tayaal-ibuwagha bantu banji kuuy'o bahongi bonkaha."

⁵ Niibuwo aamaliliye naabaghila ati, "Nahabweki Mwana wa Muntu niye Mukama wa kilo kya Sabhato."

*Yesu naakiliya musaasa kilo kya Sabhato
(Matayo 12:9-14; Maliko 3:1-6)*

⁶ Kilo kya Sabhato kinji, Yesu aaghenda mu elamiliyo lya Bayudaaya, eegheeseliyamu.

Musaasa anangiye mukono ghwabuliyo akaba alimu.

⁷ Beegheesiya baa bilaghilo na Bafalisaayo baakala baloleleeye Yesu, alakaba naamukiliya kilo kya Sabhato niikuwo bamunyegheelele bati aakoliye mulimo kilo kya Sabhato.

⁸ Bhaatu Yesu aamanya ebi bakwete kwelilikana, dumbi aaghila musaasa anangiye mukono oghu ati, “Wiise hani.” Musaasa oghu aamuka, aaghenda aamilila hambali Yesu ali.

⁹ Yesu aabaghila ati, “Nkubbala kubabuuliya, kusighikila mu bilaghilo, kihikiye haa kilo kya Sabhato kukola bisemeeye kedha bibhiihiye; kukiliya bwomiji, kedha kubuhwelekeleliya?”

¹⁰ Aababungiliyamu maaso boona, dumbi aaghila musaasa oghu ati, “Nanula mukono ghwawe.” Aaghunanula, ti ghwakilil’o.

¹¹ Dumbi beegheesiya baa bilaghilo na Bafalisaayo aba baasaalililuwa kimui, baatandika kuhanuula eki balakola Yesu.

*Yesu naakoma bakwenda be ekumi na babili
(Matayo 10:1-4; Maliko 3:13-19)*

¹² Bwile obu Yesu aaghenda haa mwena kusaba; ti akeeseliyayo bwile naanasaba Luhanga.

¹³ Obu bwakeeye, aabilikila beeghesebuwa be boona, aakomamu ekumi na babili, aba aaghiliyemu bakwenda be.

¹⁴ Aba aakomiyemu niibo bani: Simooni oghu aalukiye liina Peetelo na waanina wee Andeleya, Yakobbo, Yohaana, Filipo, Batulumaayo,

15 Matayo, Tomasi, Yakobbo mutabani wa Alifaayo, Simooni oghu aalwanililagha ehanga liye,*

16 Yuda mutabani wa Yakobbo, na Yuda Esikalyota oghu akamughobeliya.

*Yesu neegheesiya kandi naakiliya balwaye
(Matayo 4:23-25)*

17 Obu Yesu aamaliye kukoma bakwenda be aba, aakota nabo kulugha haa mwena oghu, baakidha mu ntina ya ghuwo hambali hengani-lilaane. Kiigambi kya beeghesebuwa be bakaba baliyo na bantu bakaniye kimui, balughiye mu mibhili ya disitulikiti ya Buyudaaya n'omu kibugha kya Yelusaalemu, na banji balughiye haseliye: Tilo na Sidooni, haai-haai na nanja ya Mediteleniyani.

18 Baasa kumutegheeleliya ngoku akwete kwegheesiya. Abaabaagha balwaye baabbalagha bati abakiliye. Aba bilimu bikwete aababhingagh'o biyo.

19 Bantu boona baabbalagha kumukum'o, nanga maani aghaamulughaghamu ghaabakiliya boona.

*Migisa na kubona-bona
(Matayo 5:1-12)*

20 Niibuwo Yesu aakaaye aaloleleeye beeghesebuwa be, aabaghila ati,
"Muli na mugisa enuwe banaku mu mwoyo,
nanga mukuba mu bulemi bwa Luhanga.

* **6:15 6:15** Simooni akaba ali omui mu bantu abaalwanililagha ehanga lyabo lya Buyudaaya kulugha mu bulemi bwa Balooma.

- 21 Muli na mugisa enuwe aba njala ekwete,
nanga muliikuta.
Muli na mugisa enuwe abakwete kulila endindi,
nanga muliseka.
- 22 Muli na mugisa bantu mbaaboohiye, bababhenga,
babawaawaaniya
kandi baababugh'o kubhi haabwa Mwana
wa Muntu!
- 23 "Nanga ebi niibiyo baataata baabo
baakoliy'o balangi b'ambele. Nahabweki
bantu mbaabatwalikaniye kubhi batiyo
mudheedheluwe kimui, nanga Luhanga aliha
enuwe mpeela ekaniye mu eghulu.
- 24 "Ngamulikibona enuwe baguudha,
nanga kudheedhuwa kwanu mukamala
kukutunga.
- 25 Ngamulikibona enuwe abaakutiye endindi,
nanga mulikwatuwa njala.
Ngamulikibona enuwe abakwete kuseka
endindi,
nanga mulituntula kandi mulile.
- 26 Ngamulikibona bantu boona mbaasindiye
enuwe,
nanga niikuwo baataata baabo baasindagha
batiyo balangi baa bisubha."

Kukunda ngighu syanu
(Matayo 5:38-48; 7:12a)

- 27 "Bhaatu nkughambila enuwe abantegheleeiye nti: Mukundaghe ngighu syanu
kandi mukolaghe kusemeeye ababoohiye.
- 28 Abalabakiinagha, mubasabilaghe mugisa.
Abalabambulagha, mubasabilaghe kusemeeye.

²⁹ Muntu naakutaliye haa etama, omugaaliye na lili kandi muntu naatwete kooti yaawe, omuhe n'esaati.

³⁰ Muntu naakusabiye kantu omuhaaghe ko. Ti muntu naatwete kintu kyawe, otamuhambilijagha kukikuukiya.

³¹ Ngoku mwangubaliye baanakyanu kubatwalikaniya, aaniikuwo naanu mwabatwalikaniyagha.

³² "Nimwakundiye ababakundiye bonkaha, mukughasiluwa ki? Nanga na basiisi bakukundagha ababakundiye.

³³ Kaakuba mutwalikaniya kusemeeye abakubatulikaniya kusemeeye, mukughasiluwa ki? Na basiisi niikuwo bakukolagha batiyo dhe.

³⁴ Kandi nimwekopeeye aba mukwelilikana muti bakubasasula, buuye mbiki bikuleka Luhanga abasiime? Na basiisi dhe bakwepiyagha aba bakwelilikana bati bakubasasula.

³⁵ Bhaatu enuwe mukundaghe ngighu syanu kandi mubakolaghe kusemeeye, mwekopaghe mutaakunihila kubasasula; Luhanga alibaha musaala ghwamaani kandi mukuba nimwoleka ngoku muli baana baa Luhanga wa Eghulu Munu. Nanga eye akughililagha ngughuma ab'engeso sibhi n'abataakusimagha.

³⁶ Mughililaghe baanakyanu ngughuma ngoku Eseenuwe Luhanga akubaghililagha ngughuma."

*Kutasoghosa baanakyanu
(Matayo 7:1-5)*

37 “Mutatwīlagha baanakyanu misango, niikuwo naanu Luhanga atabatwīlaghayo. Mutasoghosagha baanakyanu, niikuwo naanu Luhanga atabasoghosa. Mughanilaghe, naanu mulighaniluwa.

38 Luhanga akubaha naaboone ngoku mukuha banakyanu. Mulatungagha bikaniye kimui ngoku musuubuli mulungi akupijmagha kusemeeye, aasuliliya kimui eki akughuliya makaha oghu akughula; akikibha, akidhingiya ti kiseesekeliya. Ti hambali mukwangaaniya kutwalikaniya baanakyanu, niikuwo naanu balabatwalikaniyagha.”

39 Yesu aatodha aabaha lusimo ati, “Buuye muntu oghu maaso ghaaghaaye akugubha kuhikila muughali wa maaso muunakiye? Bombi tabakwegenga mu kijina?”

40 Mweghesebuwa taasaaiye mwegheesiya wee, bhaatu neeghiye bhyani akukola ng’ebi mwegheesiya wee akukolagha.

41 Nkiki kyanguleka ookala oboone kabubi katii akali mu liiso lya muunakyawe, onasaaghuuwe kubona lubbaau luunamulito oluli mu liiso lyawe?

42 Buuye okugubha kughila otija muunakyawe oti, ‘Wai, oleke nkuuye kabubi katii akali mu liiso lyawe,’ kuni onasaaghuuwe kuuya lubbaau luunamulito oluli mu liiso lyawe. Ngobiya uwe, odubhe ooye lubbaau luunamulito oluli mu liiso lyawe, obone bbeni-bbeni niikuwo ogubhe kuuya kabubi akali mu liiso lya muunakyawe.”

Muntu na bikoluwa biye
(Matayo 7:16-20; 12:33-35)

⁴³⁻⁴⁴ “Nanga buḷi kiti okukimaniiliagha haa biḡhuma byakiyo. Taaliyo oghu angugubha kukobha miyembe haa mpoku kedha mapeela haa kiibbabbangu. Taaliyo kiti kisemeeye ekikwanagha biḡhuma biḡhijhiye, kedha kiti kiḡhijhiye ekikwanagha biḡhuma bisemeeye.

⁴⁵ Nanga muntu naabaaye ali na mutima ghusemeeye, akukola kandi abughe bintu bise-meeye. Bhaatu muntu naabaaye mubhi akukola kandi abughe bintu biḡhijhiye, nanga muntu akubugha ebimuli haa mutima.”

Bakweli babili
(Matayo 7:24-27)

⁴⁶ Yesu aatodha aabaghila ati, “Mukungilagha muti, ‘Mukama wanje, Mukama wanje,’ kuni mutaakukola ebi nkubaghambilagha nangaaki?

⁴⁷ Oleke mbooleke kyakulolelo kya muntu weena oghu akunjisagh’o, aaghuwa bighambo byanje kandi abikola.

⁴⁸ Ali nga musaasa oghu aakwelagha numba yee; aalima musingi ghutobheeye, aahika hambali etaka lyomiiye, aakwel’o numba yee eghi. Obu maasi ghaasuuye ghaasenda, mighina yaatandika kusamba numba eghi, bhaatu tayaa-sobooye kuḡhidinga-dhingiya, nanga akaba aghikweye kusemeeye.

⁴⁹ Bhaatu oghu akuḡhughwagha bighambo byanje kandi abhenga kukola ebi bilaghiye, ali nga musaasa oghu akakwela numba yee

h'etaka magila musingi. Obu maasi ghaasu-
uye ghaasenda, mighina yaatandika kusamba
numba egghi, dumbi yeegenga kandi yaabhihila
kimui!”

7

Yesu naakiliya muheeleliya wa muusilikale (Matayo 8:5-13)

¹ Obu Yesu aamaliye kughambila bantu aba
bighambo ebi byona, aaghenda mu tauni ya
Kapelenaumu.

² Hakaba aliyo musaasa omui oghu akaba atali
Muyudaaya, ali mukulu wa baasilikale kikumi
baa Looma kandi akaba ali na muheeleliya wee
amukundiiye kimui. Ti mukoli wee oghu aalwala
haai kukuwa.

³ Obu mukulu wa baasilikale oghu aaghuuy'o
Yesu, aamutumila bengei baa Bayudaaya naa-
musaba kwisa ewe kumukililiya muheeleliya
wee oghu.

⁴ Baaghenda baakidha hambali Yesu ali,
baamwesengeleliya bati, “Musaasa oghu abhon-
ganuuwe omukoonene,

⁵ nanga atukundiye kandi akatukwelela
elamiliyo lyatu.”

⁶ Niibuwo Yesu aaghendiye nabo. Bhaatu
obu aabaagha ali haai kukidha haa ka haala,
mukulu wa baasilikale oghu aatuma baabhootu
siye kughambila Yesu bati, “Mukama wanje
oteeluhiliya busa kwisa ewanje, nanga tanibhon-
ganuuwe uwe kwisa ewanje bbaa.

7 Kandi tan̄ih̄ikiye kwisa hambali oli nanga oli na b̄utoki busaalukaane. Nahabweki obughe kwonkaha, muheeleliya wanje akukila.

8 Nanga nanje ndi na bantu abalemiye siye abakundaghilagha bya kukola. Nanje n'aba na baasilikale aba siye ndemiye aba nkulaghilagha bya kukola. Oghu nkughilagha nti, 'Ghenda,' akughendagha; oghu nkaakughilagha nti, 'Wise,' akwisagha. Nkaakulaghilagha muheeleliya wanje nti, 'Kola kini,' akikola."

9 Obu Yesu aaghuyeye ebi, aasweka kandi eegaaliya aaghila kiigambi kya bantu abaali bamukweme aba ati, "Mbaghambiiye, tank-abonagha muntu oghu ali na kuh̄ikilija kutiyo nankabha mu Banaisaaleeli!"

10 Ti obu aba mukulu wa baasilikale oghu aali atumiye aba baakuukiyeyo, baasanga muheeleliya oghu akiliye.

Yesu naahumbuula mutabani wa mukwisiya

11 Haanuma ya bwile bukee Yesu aaghenda mu tauni baakughilaghamu Naini, beeghesebuwa be na kiigambi kya bantu baaghenda naye.

12 Makakidha ati haai-haai na tauni eghe, aasanga bantu baheekiye muku, mbaghenda kujiika. Oghu akaba akuuye akaba ali mutabani wa mukwisiya kandi aaniye ali naye enkaha. Kiigambi kya bantu badongiye na mukwisiya oghu.

13 Obu Mukama Yesu aaboone mukwisiya oghu, aamughilila kisa, aamughila ati, "Oleke kulila."

14 Niibuwo aaghendiye aakuma haa sanduuku eghi baheekeeyemu muku oghu, kwemililiya abaghuheekiye; beemilila. Aaghila ati, “Mutabhana oomuke!”

15 Dumbi oghu akaba akuuye oghu aamuka kandi aatandika kubuğa. Yesu aaghila nina mutabhana oghu ati, “Mutabani waawe ngughu!”

16 Ti bantu boona abaabaagh’o boobaha kandi baasinda Luhanga bati, “Mulangi wamaani aatubungiiye! Luhanga aasiye kujuna etuwe bantu be.”

17 Makulu agha ghaamalakaka disitulikiti ya Buyudaaya yona na maatauni ghanji aghaghyelighiliye.

*Yesu na Yohaana Mubatiji
(Matayo 11:2-19)*

18 Obu Yohaana Mubatiji aabaagha mu nkomo, beeghesebuwa be baamughambila ebi Yesu akwete kukola byona.

19 Aabilikila babili mu beeghesebuwa be aba, aabatuma ewaa Mukama Yesu kumubuuliya bati, “Buuye nuuwe oghu baaghiliye bati okwisa, kedha tulindilile onji?”

20 Obu baakidhiye hambali Yesu ali baamughila bati, “Yohaana Mubatiji aatutumiye kukubuuliya tuti, ‘Buuye nuuwe oghu baaghiliye bati okwisa, kedha tulindilile onji?’ ”

21 Bwile obu Yesu aakiliya bantu bakaniye, aba bilimu bikwete n’aba maaso ghaaghaaye.

22 Aaghila aba Yohaana aatumiye ati, “Mughende mughambile Yohaana ebi mwaghuuye kandi ebi mwaboone, aba maaso

ghaaghaaye niibuwo baabona, abalema niibuwo baalubhatanga, abalwaye ntumbi niibuwo baakila kandi baasemela, aba matui ghaaghaaye niibuwo baaghuwa, abakuuye niibuwo baahumbuuka kandi Makulu Ghasemeeye ghaa Luhanga niibuwo baaghalangilila banaku.

²³ Ti ali na mugisa oghu atakuleka kumpikilija.”

²⁴ Obu aba Yohaana aatumye aba baaghendye, Yesu aatandika kughambila biigambi bya bantu abaabaagh’o, ebikwet’o Yohaana oghu. Aaghila ati, “Obu mwaghendagha mu elungu kulola Yohaana, mukaba mumaniye muti mukusangayo muntu wa mulingo ki? Mwelikanagha kusangayo muntu mwoba kandi oghu atagumiiye haa eki acuuyemu?”

²⁵ Mwaghendagha kulola muntu oghu aluwete kusemeeye? Bbaa, nanga abakulwalagha ngoye sisemeleeye kimui bakuukalagha mbeeghonja mu bikaali bya bakama.

²⁶ Ti buuye mwaghendagha kulola ani? Mulangi? Ee, mbaghambiiye majima, oghu asaaiye mulangi.

²⁷ Nanga Yohaana oghu niiye Ebyahandikuwe byabughiy’o biti, ‘Ndituma mutumuwa wanje ahikile akuteekaniiye kihanda otakaasiye.’*

²⁸ Mbaghambiiye, taaliyo muntu n’omui oghu abyahuwe mukali, oghu aabaay’o oghu asaaiye Yohaana. Bhaatu nankabha mwana mu bulemi

* 7:27 7:27 Malaki 3:1

bwa Luhanga, aliba na kitiiṅisa kusaaliya kya Yohaana.”

²⁹ (Bantu bakaniye kimui, nankabha baku-maaniya baa musolo, aba Yohaana aali naa-batiije, obu baaghuuye ebi, baaghila bati ntegheka ya Luhanga ehikiye.

³⁰ Bhaatu Bafalisaayo na beegheesiya baa bi-laghilo baabhenga ntegheka ya Luhanga eghi kandi baabhenga Yohaana kubabatija.)

³¹ “Bantu baa mujo ghuni ndabasusaaniya na ki?

³² Bali nga baana basitamiye mu katale kandi bakubilikila baanyakabo bati,

“ Twabalimbiiye bilimbo bya bughenu,
tamwabiniiye!

Twabalimbila bya luku,
mutaalila.’

³³ Nanga obu mwaboone Yohaana Mubatiji naasiiba kandi ataakunuwa viini, mwaghila muti, ‘Kilimu kimuli haa mutuwe.’

³⁴ Mwana wa Muntu obu akuliyagha kandi anuwa mukughilagha muti, ‘Mulole ali na mululu, ni mutamijili kandi bhootu wa bakumaaniya baa musolo na basiisi!’

³⁵ Bhaatu magheji ghaa Luhanga ghakweyoleke-lagha mu bikoluwa byagho.”

Ebyabaay’o obu Yesu aaliilagha mwa Mufalisaayo

³⁶ Kilo kimui Mufalisaayo omui lijina liye Sijimooni, aabilikila Yesu ewe. Yesu aasiima aaghendayo, aasitama kuliya.

³⁷ Mukali omui musijisi akaba ali mu tauni eghi, obu aaghuuye ngoku Yesu ali mu ka ya

Mufalīsaayo oghu, aasa na cupa esemeeye, elimu bigita bisasiye.

³⁸ Aasila enuma sya Yesu aamuteeliya mu maghulu, aatandika kulila. Maligha ghe ghaagbondiya Yesu mu maghulu. Mukali oghu aakala kumulaghaliyagho n'esoke liye. Aakala anamukwete mu maghulu naanamusiighamu bigita ebi.

³⁹ Obu Mufalīsaayo oghu akaba abilikiye Yesu, aaboone atiyo, eelilikana ati, “Nguli Yesu oni aabaagha mulangi kwonini, angumanīye ngoku mukali oghu ali muṣiṣi kandi tangumuṣiimilaniye kumukum’o bbaa!”

⁴⁰ Niibuwo Yesu aaghiliye Mufalīsaayo oghu ati, “Simooni, ndi n’eki nkubbala kubugha naawe.” Simooni aamughila ati, “Mwegheesiya, okingambile!”

⁴¹ Dumbi Yesu aaghila ati, “Musaasa omui akeekopiya basaasa babili sente. Aaha omui miliyooni ekumi, onji muliyooni ghumui.*

⁴² Obu bombi basaaghuwe kumusasula aabaghanila. Ni ani haa babili aba oghu okwelilikana akamukunda kusaaliya muunakiye?”

⁴³ Simooni aakuukamu ati, “Nkugumiya ni oghu aaghaniye sikanīye.” Yesu aamughila ati, “Waahikiye.”

⁴⁴ Dumbi Yesu eegaaliya aalola mukali oghu. Aaghila Simooni ati, “Eki mukali oni aakoliye okyelilikan’o! Kulugha naatahiye mwawe

* **7:41 7:41** Mu Lugilikij baghambiye bati *dinaali bikumi bitaano n’onji dinaali makumi ataano*. Dinaali emui ekaba yengaane na musaala oghu muntu akukolelagha kilo kimui.

muni, tawantwalikaniiye kwonini ngoku batwalikaniya baghenū, bhaatu eye anakuntwalikaniya kusemeeye.

⁴⁵ Uwe tawahikiye kunguwa mu kikuḅha, noo eye anankwete mu maghulu kulūgha naataahiye muni.

⁴⁶ Tawampaaye bigita bya kwesiigha, bhaatu eye ansiighiye bigita bisasiye mu maghulu.†

⁴⁷ Nahabweki nkughambiiye, bibhi biye bikaniye bitiyo byamughaniiwe, niikiyo kilekiye anjolekiye kukunda kukaniye kutiyo. Bhaatu oghu aghaniiwe bikee akwolekagha kukunda kukee.”

⁴⁸ Niibuwo Yesu aaghiliye mukali oghu ati, “Naakughaniiye bibhi byawe.”

⁴⁹ Bantu abaaliyagha beebuuliya bati, “Musaasa oni dhaani akwete kwelilikana ati niye ani kughanila bantu bibhi?”

⁵⁰ Yesu aaghila mukali oghu ati, “Kuhikilija kwawe kwakujuniye; oghende mpempa.”

8

Bakali abaabungagha na Yesu

¹ Haanuma ya bwile bukee, Yesu aasaalila mu maatauni n'omu mibhili, naalangilila Makulu Ghasemeeye ghaa bulemi bwa Luhanga. Aaghenda na beeghesebuwa be ekumi na babili,

² hamui na bakali aba aabhingiy'o bilimu n'aba aakiliye ndwala. Bakali aba ni: Maliya

† 7:46 7:44-46 Kunaaba mu maghulu, kughuwa mu kikuḅha, na kusiigha bigita mu mutuwe, ni milingo eghi Bayudaaya baatwalikanijaghamu baghenū baabo.

w'omu taun̄i ya Mangadhalina oghu aabh̄ingiy'ō bil̄imu musanju,

³ na Yowana mukaa Kuuja. Kuuja oghu aakolagha mulimo ghwa kuloleelela bintu bya Mukama Helude. Hakaba halimu Susaana, na bakal̄i banji bakan̄iye. Bakal̄i aba baahaaghayo bimui h'etungo lyabo kukoonela Yesu naaba aakalagha nabo.

*Lusimo lwa nsigho n'etaka
(Matayo 13:1-9; Maliko 4:1-9)*

⁴ Kilo kimui biigambi bya bantu byakala mbinaasa mbilugha mu maataun̄i mbinagumbaana hambali ali. Obu baagumbaane aabatw̄ila lusimo luni ati,

⁵ “Mul̄im̄i akaghenda kumisa nsigho yee. Obu aanamisagha, bumui haa nsigho yee bwalaghala mu kihandakati, bantu baabukpeetaaga, non̄i syasa syabuliya.

⁶ Bumui haa nsigho yee bwalaghala mu mabaale. Obu ndimo eghi yaatooye, yaahotoka haabwa kubuluwa maasi mu mabaale omu.

⁷ Bumui haa nsigho bwalaghala mu mahuwa, ghaakula, ghaasoosookeliya ndimo eghi.

⁸ Bumui haa nsigho yee bwalaghala h'etaka lisemeeye, bwakula, bwana. Bul̄i kasigho kaalughamu busigho bukaniye kimui milundi kik̄um̄i.” Niibuwo Yesu aabugh̄iye n'elaka lya-maan̄i ati, “Oghu ali na matui ghaa kuugh̄uwa, aagh̄uwe.”

*Kighendeleluwa kya kwegheeseliya mu nsimo
(Matayo 13:10-17; Maliko 4:10-12)*

9 Beeghesebuwa baa Yesu baamubuuliya makulu ghaa lusimo olu,

10 aabaghila ati, “Enuwe mukaheebuwa kumanya nsita sya bulemi bwa Luhanga, bhaatu banji bakusijighwilagha mu nsimo, niikuwo balole batabona, baaghuwe bateetegheeleliya.*

11 “Hatiini makulu ghaa lusimo olu ngaaghaani: Mumisi naaghambiye oghu, eki akumisagha ni kighambo kya Luhanga.

12 Nsigho eghi ekalaghala h’etaka ly’omu kibandakati, ni bantu abakuughuwagha kighambo kya Luhanga, dumbi Sitaani aasa abaayamu kiyo niikuwo batahikilija kandi bajunuwa.

13 Nsigho eghi ekalaghala h’etaka lya mabaale, ni bantu abakudubhagha badheedhuwa mbaaghuwa kighambo kya Luhanga, bhaatu ngoku bilimuwa bitaakugubha kulebba bitali na mili etaahye bhyani mu etaka, niikiyo kimui na bantu aba. Bakudubhagha bahikilija haabwa bwile bukee. Bhaatu bwile bwa kulengeesebuwa haabwa kighambo kya Luhanga mbwahika dumbi kuhikilija kwabo kubula.

14 Kandi nsigho eghi ekamisuwu mu mahuwa, ni bantu abakuughuwagha kighambo kya Luhanga, bhaatu kwelalikiilila bwomiji bwa nsi eni, kutwalijibuwa buguudha, na kweghomba bintu binji bileka kighambo kya Luhanga kitabalughilamu mughaso.

15 Na nsigho eghi ekalaghala h’etaka liseme-eye, kikumanisiya bantu abakuughuwagha kighambo kya Luhanga, bakikwata na

* 8:10 8:10 Isaaya 6:9

mutima ghumui, baba beesighibuwa kandi kibalughilamu mughaso ghukaniye haabwa kugumisilija mu kuhikilija kwabo.”

*Kyakulolelo kya kaatadhooba
(Maliko 4:21-25)*

¹⁶ Yesu aatodha aabaghila ati, “Taaliyo muntu n’omui oghu akubhakiyagha taala kandi aghiswikila na kighegha kedha aghita e bukungwisi. Bhaatu akughitaagha haa kyakut’o taala niikuwo ebbeneliye abakutaaha mu numba omu.

¹⁷ Nanga taaliyo kintu kyona eki bantu balikolelela mu kibiso ekitalimanuwa, kedha eki balibisa-bisa ekitalimanuwa.

¹⁸ Mweghendeseleje kutegheeleliya, nanga oghu ali na kantu, niye akwongeluw’o, bhaatu oghu atali na kantu, n’aka akwelilikana ati ali nako, kakumuhibuw’o.”

*Nganda sya Yesu syonini
(Matayo 12:46-50; Maliko 3:31-35)*

¹⁹ Nina wee, na baana baanina Yesu baasa hambali ali kumulola, bhaatu bataagubha kumuhika haai-haai haabwa bantu kukanila kimui.

²⁰ Niibuwo muntu omui aamughiliye ati, “Njoko waawe na baana banjoko waawe baamiliye enja bakukubbala.”

²¹ Yesu aakuukamu ati, “Maaha kandi baana baamaaha ni abakuughuwagha kighambo kya Luhanga kandi bakola ebi kilaghiye.”

*Yesu naaholesiya kyegha haa nanja
(Matayo 8:23-27; Maliko 4:35-41)*

22 Kilo kimui Yesu aaghila beeghesebuwa be ati, “Muleke tubhasuke luhande lw’eli lwa nanja.” Baaniina bwati baaghenda.

23 Mbanaghenda, aaghwesaghila. Kyegha kyasa haa nanja, haai kulijika bwati obu mu maasi.

24 Niibuwo baaghendiyeye baamususumuula. Baamughila bati, “Mwegheesiya, mwegheesiya, twatwika!”

Yesu aamuka, aatanuka kyegha eki na mighina eghi yaasambagha bwati obu byaholiya, nanja yaateekanilana kimui.

25 Niibuwo aababuuiye ati, “Tamuneesighiye?” Boobaha kandi baasweka. Baabuwaniya bati, “Oni ni muntu wa mulingo ki? Akulaghilagha kyegha na nanja, ti bimughuwa!”

*Yesu naakiliya musaasa oghu bilimu bikwete
(Matayo 8:28-34; Maliko 5:1-20)*

26 Yesu na beeghesebuwa be baabhasuka luhande lw’eli lwa nanja kulugha Galilaaya, baakidha mu kyalo kya Bagadala.

27 Makalugha ati mu bwati, musaasa w’omu tauni eghi oghu kilimu kikwete, aamwis’o. Musaasa oghu akaba naamaliye bwile bukaniye ataakuluwala kandi taalalagha mu numba bbaa, kuuy’o mu kijikalo eki baajiikaghamu bantu.

28 Obu aaboone Yesu, aatakangana, aateeliya mu maghulu ghaa Yesu, aabugha n’elaka lya-maani ati, “Yesu, Mwana wa Luhanga wa Eghulu Munu, okumbuniya ki? Nkwesengeleeiye, gutu otambona-boniya!”

²⁹ Aabugha atiyo nanga Yesu akaba naagham-biiye kilimū eki ati kimulugh'o. (Kyak-abaagha kimukwete, baakala bamulindiye kandi bamubohēēye njeghele na mpingo. Bhaatu aasituwagha, kimukuba mu elungu.)

³⁰ Niibuwo Yesu aamubuuiye ati, "Liina lyawe nuuwe ani?"

Aakuukamu ati, "Kiigambi," nanga bilimū bikaniye bikaba bimuliy'o.

³¹ Bilimū ebi byesengeleliya Yesu biti, "Gutu otatukuba mu kiina kitobheleeye kimui!"

³² Haa mwena haai-haai, mpunu sikanīye sik-aba siliyo nsiliya. Bilimū ebi byesengeleliya Yesu biti abisiimilaniye bighende mu mpunu esi haaliisiyo byataahamu. Aabisiimilaniya.

³³ Obu bilimū ebi byalughiy'o musaasa oghu, byaghenda byataaha mu mpunu esi. Syona syalighitila kimui, syakota mu nanja, syatwikilamu.

³⁴ Baliisiya baa mpunu esi obu baaboone ebyabaay'o, baaligita baaghenda mu tauni na mu mibhili, mbanaghambila bantu makulu agha.

³⁵ Bantu aba baasa kulola ekyabaay'o eki, obu baakidhiye hambali Yesu ali. Baasanga musaasa oghu bilimū byalughiy'o, asitamīye mu maghulu ghaa Yesu, aluwete kandi ateekaane, boona boobaha.

³⁶ Aabaaboone ebyabaay'o musaasa oghu na mpunu esi, baaghambila abaasiy'o aba ngoku musaasa oghu bilimū byabaagh'o aakiliye.

³⁷ Obu bantu b'omu kyalo kya Bagadala aba baaboone ekyabaay'o eki, beesengeleliya Yesu bati alughe mu kyalo kyabo eki. Niibuwo

aanijinye bwati kukuuka luhande lw'eli lwa nanja.

³⁸ Musaasa oghu bilimu byalughiy'o oghu aamwesengeleliya ati, "Onsiimilaniye ngende niikalaghe naawe." Bhaatu Yesu aamughila ati,

³⁹ "Okuuke ewaanu, oghambile bantu b'ewaanu ebi Luhanga aakukoleeye." Musaasa oghu aaghenda mu tauni eghi yona, naanaghambila bantu ebi Yesu aamukoleeye.

Yesu naakiliya mukali kandi naahumbuula manaabukali

(Matayo 9:18-26; Maliko 5:21-43)

⁴⁰ Obu Yesu aakidhiye luhande lw'eli lwa bughuwa ejooba bwa nanja eghi, kiigambi kya bantu kyamwebaliya nanga boona bakaba bamulindiliye.

⁴¹ Niibuwo musaasa omui, liina liye Yailo, mwebembeli w'elamiliyo lya Bayudaaya, mu muhili oghu aasiye aateeliya Yesu mu maghulu naamwesengeleliya ati, aghende naye ewe e ka.

⁴² Ekyalekiye musaasa oghu aabugha atiyo ni nanga akaba ali na muhala wee omui enkaha alwaliye kimui kandi ali haai kukuwa. Manaabukali oghu akaba ali na myaka ekumi n'ebili.

Yesu aaghenda na kiigambi kya bantu kimugumbiye.

⁴³ Mu kiigambi kya bantu eki hakaba halimu mukali oghu akaba alwaye bulwaye bwa bakali. Amaliye na buwo myaka ekumi n'ebili. Taaliyo mutambili n'omui oghu akagubha kumukoonela na katii konkaha bbaa.

44 Mukali oghu aasila enuma sya Yesu mu kiigambi kya bantu eki, aakuma haa lughoye lwa Yesu. Makalukum’o ati, dumbi aakilil’o.

45 Yesu aabuliya ati, “Ni ani ankumiy’o?” Bantu boona beehighaana. Niibuwo Peetelo aamughiliye ati, “Wajitu, naawe oboone ngoku kiigambi kya bantu kini bakugumbiye kandi bakumighiliye.”

46 Bhaatu Yesu aatodha aaghila ati, “Muntu ankumiy’o nanga neehighuuye maani ghaa kukiliya ghandughiyemu!”

47 Obu mukali oghu aaboone ataakugubha kwebisa, aasa naatukumila, aateeliya Yesu mu maghulu. Aabugha haagati ya bantu boona ekyalekiye aakumo Yesu kandi ngoku dumbi aakiliy’o.

48 Yesu aamughila ati, “Muhala wanje, kuhikiliya kwawe kwakukiliye, oghende mpempa.”

49 Yesu naanabugha, musaasa aalugha mu ka ya mwebembeli oghu, aamughila ati, “Wajitu, oleke kuluhiliya busa mwegheesiya, muhala waawe aakuuye!”

50 Bhaatu obu Yesu aakiighuuye aaghila Yailo oghu ati, “Oleke kwobaha. Ohikiliye siye, muhala waawe akukila.”

51 Obu aakidhiye mu ka ya Yailo, Yesu taasiimilaniye muntu onji n’omui kutaaha naye mu numba kuuy’o Peetelo, Yohaana na Yakobbo hamui na ese na nina manaabukali oghu.

52 Basanga bantu boona mbalila manaabukali oghu kandi mbatakanganilana kimui. Bhaatu

Yesu aabaghila ati, “Muleke kulila; mwana oni taakuuye bbaa, aaghwesaghiiye kwonkaha!”

⁵³ Bantu aba baamusekeelela nanga bakaba bamaniye ngoku akuuye.

⁵⁴ Yesu aataaha naaba aakomiyemu aba hambali muku ghwa manaabukali oghu ghuli. Aamukwata haa mukono, aamubilikila ati, “Manaabukali uwe, oomuke!”

⁵⁵ Manaabukali oghu aatodha aaba mwomiji, dumbi aamuka. Yesu aalaghila babyaye baa manaabukali oghu ati baahe mwana oghu byokuliya.

⁵⁶ Ti babyaye baa mwana oghu baaswekela kimui. Bhaatu Yesu aabeekonkomeelela kutaghambila muntu n’omui ebyabaay’o.

9

Yesu naatuma beeghesebuwa be ekumi na babili

(Matayo 10:5-15; Maliko 6:7-13)

¹ Kilo kimui Yesu aabilikila beeghesebuwa be ekumi na babili hamui. Aabaha butoki kubhing’o bantu bilimu bya buli mulingo na kukiliya ndwala sya milingo yona.

² Aabatuma kutebeja Makulu Ghasemeeye ghaa bulemi bwa Luhanga kandi bakiliye bantu.

³ Aabaghila ati, “Mutaghenda na kantu koonankabha mwigho, bikapa, byokuliya, kedha sente; kandi mutaghenda na ngoye sinji, kuuy’o esi muluwete syonkaha.

⁴ Numba eghi balabeebaliyaghamu, muukalaghemu kuhikiya mulughiye mu tauni eghi.

⁵ Taun̄i yoona hambali batalabeebaliyagha, malughamu, mukunkumulaghe tuutu ya mu bighanja byanu kwoleka ngoku Luhanga alifubila bantu aba.”

⁶ Niibuwo baaghendiyē baakwama mu mibhili yoona mbatebeja Makulu Ghasemeeye ghaa bulem̄i bwa Luhanga kandi mbanakiliya balwaye.

*Helude naasobeluwa
(Matayo 14:1-12; Maliko 6:14-29)*

⁷ Helude mulem̄i wa Galilaaya aaghuwa byakuswekaniya ebi Yesu akwete kukola, aasobeluwa, nanga bamui mu bantu baaghilagha bati ni Yohaana Mubatiji aahumbuukiye.

⁸ Banji bati ni mulangi Eliya aakuukiye, na banji bati ni omui mu balangi baa hambele aahumbuukiye.

⁹ Bhaatu Helude aaghila ati, “Nkalaghila bajomb’o Yohaana Mubatiji mutuwe, ti oghu ni ani nkwete kuughw’o bintu ebi byona?” Aaleng’o ati anaboone Yesu.

*Yesu naaliisiya bantu nkumi etaano
(Matayo 14:13-21; Maliko 6:30-44; Yohaana 6:1-14)*

¹⁰ Bakwenda baa Yesu aba, baakuuka kulugha hambali aabatumiye. Baamughambila ebi baakoliye byona. Aabatwala bonkaha haakpengbu mu taun̄i ya Bbetesajida.

¹¹ Bhaatu bantu bakaniye baamanya hambali aaghendiyē. Baamukwama, aabeebaliya, ti aabeegheesiya haa bulem̄i bwa Luhanga. Aakiliya abaabaagha balwaye bwile obu.

¹² Obu bwahikiye lwaghola, beeghesebuwa be ekumi na babili baasa baamughila bati, “Olaghe bantu bani, niikuwo baghende mu mibhili n’omu mahaai-haai, beebbalile byokuliya na haa kulaala, nanga eni tuli mu elungu.”

¹³ Aabakuukamu ati, “Enuwe mubahe byokuliya.”

Baamukuukamu bati, “Tuli na migaati etaano na nsui ebili bhembei; kuuy’o tughendiye kughula byokuliya ebikumala bantu aba boona.”

¹⁴ Nanga basaasa bonkaha bakaba bali nga nkumi etaano.

Niibuwo aaghiliye beeghesebuwa be aba ati, “Mubasitamiye mu bibbula bya bantu makumi ataano-ataano.”

¹⁵ Baakola kuwo, bantu boona baasitama.

¹⁶ Aakwata migaati etaano eghi na nsui ebili esi, aalola eghulu, aasijima Luhanga haabwa byokuliya ebi. Aabheghanga migaati na nsui esi, aakala naanabiha beeghesebuwa be kubiha bantu aba.

¹⁷ Ti bantu aba boona baaliya baakutula kimui. Beeghesebuwa be baakoma-koma ebyatighaay’o, baasuliya bighegha ekumi na bibili.

*Yesu Mukama oghu akaasa kubona-bona
(Matayo 16:13-19; Maliko 8:27-29)*

¹⁸ Bwile bumui Yesu akaba ali na beeghesebuwa be naasaba. Makamala kusaba aababuuliya ati, “Bibbula bya bantu bakungilaghamu ani?”

¹⁹ Baamukuukamu bati, “Banji bakughilagha bati nuuwe Yohaana Mubatiji; banji bati, Eliya,

na banji bati oli omui mu balangi b'ambele aahumbuukiye."

²⁰ Niibuwo aatodhiye aababuuliya ati, "Ti enuwe mukungilaghamu ani?" Peetelo aamukuukamu ati, "Nuuwe Kilisito wa Luhanga."

²¹ Bhaatu Yesu aabeekonkomeelela ati bataghambila muntu n'omui.

²² Aabaghila ati, "Mwana wa Muntu akulaghiluwa kubona-bona bintu bikanije. Akubhenguwa bengeji baa Bayudaaya, bakulu baa bahongi, na beegheesiya baa bilaghilo. Akwitibuwa, bhaatu haa kilo kyakasatu ahumbuuke."

Mulingo ghwa kukwamilila Yesu

(Matayo 16:20-28; Maliko 8:30—9:1)

²³ Yesu aabaghila boona ati, "Muntu weena naanabbaliye kunkwama, akulaghiluwa kuleka kwelema, aheeke musalaba ghuwe buli kilo kandi ankwame.

²⁴ Weena oghu akukukutula bwomijili buwe, akubufweluwa, bhaatu oghu akubuhaayo haabwanje, akubutunga.

²⁵ Buuye, kikughasila ki muntu kutunga nsi eni yoona kandi afeeluwa kedha ahwelekeeleliya bwomijili buwe?

²⁶ Bhaatu oghu akunkwatiluwa nsoni kandi asikwatiluwa butumuwa bwanje, na Mwana wa Muntu alimukwatiluwa nsoni obu aliisa mu kitinisa kiye kandi mu kitinisa kya Ese wee kandi na kya baamalajika bahikiliye.

²⁷ Mbaghambiiye majima, bamui mu enuwe abali hani endindi tabakuuwa kuhikiya baboone bulemi bwa Luhanga."

*Kususa kwa Yesu nkuhinduluwa
(Matayo 17:1-8; Maliko 9:2-8)*

²⁸ Haanuma ya bilo munaanaa Yesu abughije ebi, aaghenda na Peetelo, Yohaana, na Yakobbo haa mwena kusaba.

²⁹ Naanasaba, kususa kuwe kwahinduka, ngoye esi aluwete syelela kimui dhiyo.

³⁰ Dumbi balangi babili b'ambele, Musa na Eliya, baaboneka baatandika kubugha naye.

³¹ Baabona mbabbembeniya na kitinjisa, baamughambila ngoku akughenda kukwila mu kibugha kya Yelusaalemu.

³² Peetelo na baanakiye bakaba baghwe-saghiliye kimui. Obu baasusumukiye baabona Yesu naabbeneliya kimui, na basaasa babili baamiliye naye.

³³ Basaasa aba obu baali bali haai kumulugh'o kughenda, niibuwo Peetelo aaghiliye Yesu ati, "Mwegheesiya, kyabaaye kilungi etuwe twaba hani endindi! Oleke tubakwelele bunumba busatu: kamui kaawe, kamui kaa Musa, na kamui kaa Eliya." Aabugha atiyo atamaniye eki akwete kubugha.

³⁴ Naanabugha atiyo, kicu kyasa kyabaswikilila boona, ti beeghesebuwa aba boobahila kimui.

³⁵ Dumbi elaka lya lyalugha mu kicu eki lyaghila liti, "Oghu niiye Mwana wanje, oghu naakomiyemu; mumuughuwe!"

³⁶ Elaka eli makamala kubugha litiyo, baabona Yesu ali enkaha. Ebi baaboone ebi bataabighambila muntu n'omui bwile obu.

Yesu naakiliya mutabhana oghu kilimu kikwete

(Matayo 17:14-18; Maliko 9:14-27)

³⁷ Obu bwakeeye, Yesu na beeghesebuwa be aba baakota kulugha haa mwena oghu, makakidha bati mu ntina yaghuwo kiigambi kya bantu kyamaanj kyasa kyamusangaana.

³⁸ Musaasa omui mu kiigambi eki aabilikila Yesu n'elaka lyamaanj ati, "Mwegheesiya, gutu nkwesengeleeje onkoonene onkilije mutabanj wanje oni, niye mwana nkali naye enkaha.

³⁹ Kilimu kikaakumukwatagha, dumbi atandika kutakangana, ti kimutukumijijiya kimui, bihulo biikala kumutuwa mu kanuwa, kimugenga kitamulugh'o bwangu.

⁴⁰ Neesengeleeje beeghesebuwa baawe nti bamubhing'o kiyo, baasaaghuwa."

⁴¹ Yesu aaghila bantu aba ati, "Aj enuwe, bantu bateesigheje kwonini Luhanga kandi bahabiye! Nkuukala naanu kuhikiya dhj? Ti nkubagumisilija kuhikiya haa? Ondeetele hani mwana waawe oghu."

⁴² Mbanamuleeta, dumbi kilimu eki kyamukwata, kyamugenga hansi kyakala kumutukumijijiya kimui. Bhaatu Yesu aalaghila kilimu eki ati kilugh'o mwana oghu. Aamukijiya, aamukwatiya ese wee.

⁴³ Ti bantu boona baasweka, baaghila bati Luhanga ali na butoki bwamaanj.

Bantu boona banaswekiye haabwa byona ebi Yesu aakolagha, aaghila beeghesebuwa be ati,

44 “Mutegheeleliye bhyani eki ndimabagham-bila kini, Mwana wa Muntu bakumughobeliya mu ngighu siye.”

45 Bhaatu beeghesebuwa be aba tabeetegheleeiye eki akumaniisiya, nanga Luhanga aababisiilila kumanya ebikughenda kub’o Yesu kandi boobaha kubuuliya Yesu makulu ghaa bighambo aabughiye ebi.

Yesu neegheesiy’o bukulu

(Matayo 18:1-5; Maliko 9:33-37)

46 Beeghesebuwa be aba baatandika kuhakangana bonkaha-na-bonkaha bati ni ani akubabaamu mukulu.

47 Yesu aakenga ebi bakwete kwelilikana dumbi aamililiya mwana haai-haai naye.

48 Niibuwo aabaghiliye ati, “Weena oghu akubhasila mwana ng’oni haabwanje, niisiye akuba abhasiye. Kandi oghu akumbhasila, akuba abhasiye dhee Oghu akantuma. Nanga oghu akubeebundaaliyamu, niye akubabaamu mukulu.”

Weena oghu ataakukuhakaniya ni waawe

(Maliko 9:38-40)

49 Yohaana aaghila Yesu ati, “Mwegheesiya, twaboone muntu naabhing’o bantu bilimu naakoleesiya liina lyawe. Twamutanga nanga taali waatu.”

50 Yesu aaghila ati, “Mutamutanga, muntu weena naabaaye ataakukuhakaniya ni waawe.”

Bantu mbabhenga kwebaliya Yesu

51 Bwile bwa Yesu bwa kukuwa niikuwo Luhanga amuhumbuule amutwale mu eghulu

bukaba buli haai kuhika, nahabweki aatwilamu kimui kughenda mu kibugha kya Yelusaalemu.

⁵² Anali mu kihanda aatuma bantu kuhikila kutwala makulu agha. Baaghenda mu mubhili ghumui mu disitulikiti ya Samaliya kumuteekanilija buli kintu atakakidhiyeyo,

⁵³ bhaatu bantu baayo baabhenga kwebaliya Yesu na beeghesebuwa be. Nanga aaghendagha kulamiliya e Yelusaalemu.

⁵⁴ Obu beeghesebuwa be, Yakobbo na Yohaana baaghuuye ngoku bantu baabhengiye kumwebaliya, baamughila bati, “Mukama, buuye okubala tulaghile mulilo ghulughe mu eghulu ghubahwelekeeleliye?”

⁵⁵ Bhaatu Yesu eegaaliya, aabatanuka ati eki baabughiyeye eki takihikiye.

⁵⁶ Dumbi Yesu na beeghesebuwa be baaghenda mu mubhili ghunji.

*Ngoku kukwamilila Yesu kutimbiikaane
(Matayo 8:19-22)*

⁵⁷ Yesu na beeghesebuwa be mbanalubhatanga mu luguudhe, musaasa omui aamughila ati, “Nkughenda naawe hambali olakaghendagha hoonu.”

⁵⁸ Yesu aamughila ati, “Buwakame buli na bjina, na noni syaba na bisui hambali bikulaalagha. Bhaatu Mwana wa Muntu taali na kiiikalo kya kuumulilamu bbaa.”

⁵⁹ Bwile bunji aaghila musaasa onji ati, “Oose, obe mweghesebuwa wanje.” Bhaatu musaasa oghu aamukuukamu ati, “Mukama,

oleke ndubhe ngende niikale na tita kuhikiya akuuye, nimujikiye.”

⁶⁰ Yesu aamughila ati, “Oleke abakuuye bajiike abaabo abakuuye. Bhaatu uwe oghende olangilile bantu niikuwo babe mu bulemi bwa Luhanga.”

⁶¹ Musaasa onji aamughila ati, “Mukama, nkuba mweghesebuwa waawe. Bhaatu onsimilaniye oleke ndubhe ngende ndaghe ab’ewanje.”

⁶² Yesu aamughila ati, “Ngoku muntu oghu akukolagha atabhonganuuwe kulolakaka enuma, niikiyo kimui dhe, muntu naanankweme aakala anali n’ebinamutwalilije, taakuba na mughaso mu bulemi bwa Luhanga.”

10

Yesu naatuma nsanju na babili

¹ Haanuma, Mukama Yesu aakoma beeghesebuwa be banji nsanju na babili, aabatuma babilibabili, kumuhikila kughenda mu maatauni na biikalo hambali akughenda.

² Yesu aabaghila ati, “Haliyo bya kukesa bikanije, bhaatu bakoli niibo bakee. Nahabweki musabe Mukama wa kukesa oghu atume bakoli bakanije mu kukesa kuwe oku.

³ Muntegheeleliye! Ndimabatuma, bhaatu mumanye ngu muli nga byana bya ntaama ndimatuma mu mihaga.

⁴ Mutaghenda na bikapa bya kubiikilamu sente, kedha bikapa bya ngoye. Mutatwala

nkajito sinji, kuuy’o esi muluwete syonkaha. Mutatwalagha bwile bukanije kulamukiya bantu mu kihanda.

5 “Obu mulabaagha nimutaaha mu numba, mudubhaghe mughilaghe muti, ‘Mpempa yonkaha haa bantu baa mu numba eni.’

6 Mu numba eghi naabaaye halimu muntu oghu abbaliye mpempa, alaghitungagha. Bhaatu ataabaayemu, mpempa eghi elakuukilagha enuwe.

7 Ti numba eghi balabeebaliyaghamu, muukalaghemu kandi haaniimuwo mwalughililagha kuhikiya mulughiye mu tauni eghi. Muliyaaghe kandi munuwaghe ebi balabahaagha byona. Nanga mukoli abhonganuuwe kumuha mpeela yee. Mutalughamu kughoona mu manumba ghanji.

8 “Mulakakidhagha mu tauni mbaabeebaliya, muliyaghe byokuliya ebi balabahaagha.

9 Mukiliyaghe balwaye abalimu kandi mughambilaghe bantu baamu muti, ‘Bulemi bwa Luhanga bwahikiye.’

10 Bhaatu obu mulakidhagha mu tauni mbaabhenga kubeebaliya mughendaghe mu nguudhe syamu hambali bantu bakaniye bali mughilaghe muti,

11 ‘Tuli makunkumula nankabha tuutu y’omu tauni yaanu eni eghi ekwilaane mu bighanja byatu kwoleka ngoku Luhanga alibafubila. Bhaatu mumanye ngu bulemi bwa Luhanga bwahikiye.’

12 Mbaghambiiye majima, bwile obu Luhanga aliba naatwila bantu musango, alifubila bantu

baa taun̄i eghi kusaaliya ngoku alifubila bantu baa taun̄i ya Sodomu.”

*Kuteekuukamu
(Matayo 11:20-24)*

¹³ Ngamulikibona enuwe bantu b’omu taun̄i ya Kolajini! Ngamulikibona enuwe bantu b’omu taun̄i ya Bbetesaida! Nguli byakuswekaniya ebi naakoleeye ewaanu, naabikoleeye Tilo kedha Sidooni, bangubaaye beekuukiyemu hambele, baluwala ngoye sya bujune kandi basitama mu kibu ky’omu mahigha.

¹⁴ Bhaatu mbaghambiiye, Luhanga alitwila enuwe musango ghwamaan̄i kusaaliya ngoku alighutwila bantu baa taun̄i ya Tilo na ya Sidooni.

¹⁵ Ti enuwe bantu baa Kapelenaumu abaabhengiye kumpikilija, mukwelilikana muti Luhanga alibaha kitinisa kyamaan̄i mu eghulu? Bbaa, alibakuba Ekuumu.

¹⁶ “Weena oghu akuughuwa ebyanu, niisiye akuba aaghuuye kandi oghu akubhenga ebyanu, niisiye akuba abhengiye kandi oghu akubhenga siye, akuba abhengiye oghu akantuma.”

Nsanju na babili mbakuuka

¹⁷ Niibuwo beeghesebuwa nsanju na babili aba baakuukiye, baasa badheedheleeuwe kimui, baahika, baaghila Yesu bati, “Mukama, twakalaghilagha nankabha bilimu kulugh’o bantu mu lijina lyawe bibalugh’o.”

¹⁸ Aabakuukamu ati, “Ee, Luhanga kubaha butoki bwa kubhing’o bantu bilimu, naabaagha

ndoliye ngoku Luhanga aayagh'o Sitaani butoki mulundi ghumui ngoku nkubha ekabbyoka.

¹⁹ Naabahaaye butoki kukpeetaagha njoka na bunamuntakana kandi butoki kusingula maani ghoona ghaa ngighu Sitaani, ti taaliyo ekikubakola kubhi bbaa.

²⁰ Bhaatu mutadheedhuwa haabwa bilimu kubaaghuwa. Mudheedhuwe haabwa maliina ghaanu kuba ghahandiikuwe mu eghulu."

*Yesu naadheedhuwa
(Matayo 11:25-27; 13:16-17)*

²¹ Bwile obu Yesu aasula maani ghaa Mwoyo Ahikiliye, ti aadheedheluwa kimui. Aaghila ati, "Tita, Mukama w'eghulu na nsi, nkukusiima nanga majima agha okaghabisiilila baa magheji kandi basomiye. Waaghasuukulila baana bakelembe. Ee, Tita, eki niikiyo waaboone kikudheedhiye kwonini."

²² "Tita niye akampa butoki bwa buli kintu kyona. Taaliyo n'omui oghu amaniye siye Mwana kuuy'o Tita oghu kandi taaliyo oghu amaniye Tita kuuy'o Mwana kandi n'aba Mwana akukomaghamu kuleka mbamumanya."

²³ Niibuwo eegaaiye aaghila beeghesebuwa be mu kibiso ati, "Bali na mugisa abakubona ebi enuwe mukwete kubona.

²⁴ Mbaghambiiye, balangi na bakama bakanaye bakabbala kubona ebi muboone, bhaatu bataabibona kandi kuughuwa ebi muughuuye, bhaatu bataabighuwa."

Lusimo lwa Musamaliya mulungi

25 Kilo kimui mwegheesiya wa bilaghilo, aab-bala kulengesa Yesu. Aamuka, aamubuuliya ati, “Mwegheesiya, nibhonganuuwe kukola ki niikuwo ntunge bwomijili butahuw’o?”

26 Yesu aamubuuliya ati, “Kihandijkuuwe kitiya mu bilaghilo? Uwe obyetegheleeiye otiya?”

27 Musaasa oghu aamukuukamu ati, “Bighiliye biti, ‘Okundaghe Mukama Luhanga waawe na mutima ghwawe ghwona, bwomijili bwawe bwona, maani ghaawe ghoona, na magheji ghaawe ghoona’*; kandi, ‘Okundaghe muunakyawe ngoku weekundiye weenini.’* ”

28 Yesu aamughila ati, “Waakuukiyemu kusemeeye. Okolaghe otiyo, Luhanga akwisa kukuha bwomijili butahuw’o.”

29 Bhaatu musaasa oghu haabwa kwefoola ati ahikiye, aabuuliya Yesu ati, “Buuye muunakyanje, ni anji?”

30 Yesu aamukuukamu ati, “Kilo kimui musaasa aalughagha mu kibugha kya Yelusaalemu naahona kughenda Yeliko, aaghuwa mu bajindi. Baamukwata, baamutuubbula, baamuhuulanga; baamutigha alekeeye bo beeghendela.

31 “Kyamugisa ghulungi, muhongi aabungagha mu luguudhe olu. Obu aamusangiy’o naamubona, aamukengeela, aaghenda.

32 “Niikiyo kimui dhe, Muleevi* aasaalila mu

* 10:27 10:27 Kyabilaghilo 6:5 * 10:27 10:27 Kyabaleevi

19:18 * 10:32 10:32 Mulimo ghwa Baleevi ghwabaagha kukooneba bahongi mu milimo y’omu Numba ya Luhanga. Olole 1 Kyamubusinge 23:27-32.

luguudhe olu, obu aahikiye hambali musaasa oghu ali aamubona, naye dhee aamukengeela, aaghenda.

³³ “Niibuwo Musamaliya naye aakidhiye hambali musaasa oghu ali. Obu aamuboone, aamukwatiluwa kisa.

³⁴ Aaghenda, hambali musaasa oghu ali aamusiigha mafuta na viini† mu ngogha baamuhutaahiye, aamuboha ngogha esi na bbandajjo. Dumbi aamuta haa ndogooi yee, aamutwala mu looji, aamulolelela.

³⁵ “Obu bwakeeye, aakwata sente syengaane na musaala ghwa mukoli ghwa bilo bibili, aasiha mukama wa looji eghi. Aamughila ati, ‘Gutu, ololelele mulwaye wanje oni kandi nuwaakoleeseeje sente sisaaye haala, nkukusasulamu siyo ninaakuukiye.’ ”

³⁶ Niibuwo Yesu aabuiye mwegheesiya wa bilaghilo bya diini oghu ati, “Mabhuule, mu basaasa basatu aba, ni ani akatwalikaniya musaasa oghu akaghuwa mu bajindi oghu nga muunakiye?”

³⁷ Aamukuukamu ati, “Ni oghu akamughilila ngughuma.” Yesu aamughila ati, “Naawe oghende okolaghe otiyo.”

Yesu naabungila Malita na Maliya

³⁸ Yesu na beeghesebuwa be mbanaghenda mu kibugha kya Yelusaalemu, baakidha mu mubhili. Mukali omui mu mubhili oghu lijina liye Malita eebalije Yesu ati atahe mu numba yee.

† **10:34** **10:34** **Viini** baaghikoleesiyagha nga mubaji kwita buhuka mu ngogha.

³⁹ Mukali oghu akaba ali na mwana waanina wee liina liye Maliya. Maliya oghu aasitama haai-haai na Mukama, aakala ategheleeje bhyani ebi akwete kwegheesiya.

⁴⁰ Bhaatu Malita aakala naanatalibana kuba-teekanilija, ataagubha kusitama kutegheeleliya. Niibuwo aasiye aabuuliya Yesu ati, “Mukama, oghile Malita naye aase ankoonele. Tooboone ngoku andekelelanijiye milimo nenkaha?”

⁴¹ Mukama aamukuukamu ati, “Malita, Malita, otuntuuye kandi niibuwo waatalibana na bintu bikanije,

⁴² bhaatu ekisemeeye nkimui kyonkaha. Ti Maliya eye aatuuyemu kukola ekisemeeye eki kandi muntu taakumuuy’o kiyo bbaa.”

11

*Yesu neegheesiya haa kusaba
(Matayo 6:9-13; 7:7-11)*

¹ Kilo kimui Yesu akaba ali haakpengbu naasaba. Obu aamaliye kusaba, omui mu beeghesebuwa be aamughila ati, “Mukama, naatu otwegheesiye kusaba ngoku Yohaana Mubatiji eegheeseje beeghesebuwa be.”

² Yesu aaghila ati, “Obu mulabaagha nimusaba, mughilaghe muti,

“ Esetuwe,
bantu boona bahutiye liina lyawe.

Bulemi bwawe bwise.

³ Otuhe byokuliya byatu bya buli kilo.

⁴ Otughanile bibhi byatu,
ngoku naatu tukughanilagha abakutukolagha kubhi.

Otatusimilaniya kwohebuwa.’ ”

⁵ Niibuwo aatodhiye aabaghila ati, “Mabhuule mughenu naakukudhiye ndinga-ndinga y’ekilo, asanga otali na byokuliya ti oghenda ewaa bhootu syawe omughila oti, ‘Gutu ompe byokuliya ndakukukijiyamu biyo,

⁶ mughenu ankidhiye tandi na byokuliya byakumuha!’

⁷ “Buuye naakukukiyemu ati, ‘Oleke kun-talibanija, siye n’abaana banje twalangaaye. Tankugubha kuumuka kukuha kantu koono.’

⁸ Mbaghambiiye majima, taakuumuka kukuha byokuliya ebi nanga uwe kuba bhootu siye, bhaatu akukuha biyo haabwa kuukala noon-akonkona kandi noonamubilikila.

⁹ “Musabe, mukuheebuwa; mubbale, mukutunga; mukonkone, bakubaaghulila.

¹⁰ Nanga weena oghu akusabagha, akuheebuwa; oghu akubbalagha, akutungagha; oghu akukonkonagha, bakumuughulilagha.

¹¹ “Ni ani mu enuwe oghu mwana wee angusaba nsui, mu kikalalo kya nsui, amuha njoka?

¹² Tooli ni mubyaye ki oghu mwana wee angusaba ehuli, amuhamu kanamuntakana?

¹³ Buuye enuwe bantu babhi, obu mulaba mumaniiye kuha baana baanu bisembo bisemeeye, buuye Eseenuwe w’omu eghulu taakusaaliyo kuha Mwoyo Ahikiliiye abakumusaba ye!”

Yesu na Bbelejebuuli

(Matayo 12:22-30; Maliko 3:20-27)

¹⁴ Kilo kimui Yesu aabhing’o musaasa kilimu ekyali kiighaaye musaasa oghu kanuwa. Obu

kilimū eki kyamulughiy’o, dumbi musaasa oghu kanuwa kaabaagha kaaghaaye oghu, aatandika kubugha. Tooli bantu abaabaagh’o baakala baswekiye.

15 Bhaatu bamui mu bantu aba baaghila bati, “Bbelejebbuuli, mukulu wa bilimū, niiye amuhaaye butoki kubhinga bilimū.”

16 Banji mabbala kulengesa Yesu, baakalagha mbamusaba bati abakolele kyakuswekaniya niikuwo bamanye Luhanga alakaba amutumije.

17 Bhaatu haabwa Yesu kumanya byelilikano byabo, aabatwila lusimo ati, “Bantu baa bulemi bumui mbatandikiye kulwana kandi beetuwamu kabili, bulemi obu tabukuukal’o bbaa. Kandi na bantu baa ka emui mbatandikiye kulwana kandi beetuwamu kabili, ka eghi teekutuul’o.

18 Nahabweki Sitaani neelwanjisiye eenini, akuba eetambulanijyemu eenini. Bulemi buwe tabukutuul’o bbaa. Naabaghambiiye ebi nanga bamui mu enuwe bakwete kughila bati Bbelejebbuuli niiye ampaaye butoki kubhinga bilimū.

19 Ti buuye Bbelejebbuuli akaakuba aliiye ampaaye butoki kubhing’o bantu bilimū, baana baanu bakukoleesiya bwani? Niibo balileka babatwile musango ngoku muhabiye.

20 Bhaatu obu ndaba nimbhing’o bantu bilimū haabwa butoki Luhanga ampaaye, eki kikuba nkyoleka ngoku bulemi bwa Luhanga bubalimu.

21 “Sitaani ali nga musaasa wamaani oghu alindiye ka yee kwonini kandi oghu ali na bya kulwanjisiya byona.

22 Bhaatu oghu amusaaiye maani, niiye akumwegimba kumuuy’o bya kulwanjisiya ebi

kandi amutoole bintu biye byona.

23 “Oghu atali hamui nanje, akumpakaniyagha; kandi oghu ataakuku-maaniyagha hamui nanje, akuhanjaagagha.”

*Kubhenga njegheesiya ya Yesu
(Matayo 12:43-45)*

24 “Ti kilimu kikakulughaghamu muntu, kikughendagha mu elungu hambali maasi ghatali, nkibbala hambali kikuuumulila kandi takikutungagh’o bbaa. Dumbi kighila kiti, ‘Oleke nkuuke mu numba hambali naalughije.’

25 Ti nkyakidha, kisanga muntu oghu ali nga numba beheleeye yeeliye kandi eteekanijibuwe kulungi.

26 Dumbi kighenda kileeta bilimu binji mu-sanju ebikisaaye kusaakala, biisa biikala mu muntu oghu. Ti muntu oghu aba kubhi kusaaliya ngoku aabaagha haa kudubha.”

27 Yesu naanabugha nabo atiyo, mukali aaguganganila mu kiigambi kya bantu eki ati, “Ali na mugisa oghu akakubyaala kandi akwonkiya!”

28 Yesu aamukuukamu ati, “Abali na mugisa ni abakuughuwagha kighambo kya Luhanga kandi bakidhootela.”

*Yesu naakumiya Yona nga kyakulolel’o
(Matayo 12:38-42)*

29 Obu Yesu aaboone biigambi bya bantu mbyeyongelela kimui kumwis’o, aabaghila ati, “Mujo ghwa bantu bani ngabali babhi, bakuukalagha mbabbala kubakolela kyakuswekanija. Bhaatu taaliyo

kyakuswekaniya kyona ekikubakoleluwa kuuy’o kya Yona.

³⁰ Nanga ngoku Yona aabaaye nga kyakuswekaniya mu bantu baa Nīneeva, niikuwo na Mwana wa Muntu, akuba atiyo mu bantu baa mujo ghuni.

³¹ Kandi na mukama wabukali oghu akaba alemiye ehanga lya Sebba,* alyemilila hamui naanu kandi asingiisiye bantu baa mujo ghuni musango. Nanga eye akalugha munsu hambali aseleeye kimui, aasa kutegheeleliya Mukama Solomooni oghu akaba ali na magheji ghakanīye. Ti oghu asaaiye Solomooni butoki ali hani naanu.

³² Haa kilo Luhanga akutwilamu bantu musango, bantu baa kibugha kya Nīneeva balyemilila hamui naanu mu maaso ghe. Baleke asingiisiye enuwe musango, nanga ebo obu Yona aabatebijiye haa bikoluwa byabo bibhijijiyē, ba-keekuukamu. Bhaatu oghu asaaiye Yona butoki ali naanu, ti mubhengiye ebi akwegheesiyagha.”

*Kusiima njegheesiya ya Yesu
(Matayo 5:15; 6:22-23)*

³³ Niibuwo Yesu aatodhiye aabaghila ati, “Taaliyo muntu n’omui oghu akubhakiyagha taala aghibisa kedha aghiswikila na kighegha! Bhaatu akughitaagha haa kyakut’o taala niikuwo ebbeneliye abakutaaha mu numba omu.

³⁴ Ngoku maaso ghaanu ghakulekagha mubona kyeleeli, niikuwo ebi mukubbalagha kukola mu mitima yaanu bikwolekagha ngoku

* **11:31 11:31** Bbajbbuli sinji sikhambiyē Kijtwike kya Ekuwa.

muli. Bhaatu mitima yaanu niyaabaaye ebhiihiye, mukubhiihila kimui.

³⁵ Nahabweki mulole ngu majima agha musanguuwe mumaniye kulugha mu Ebyahandijikuuwe ghaalekiye mwasiima butumuwa bwanje, kitali eki ghakuleka mulugh'o Luhanga.

³⁶ Muntu naasiimiye butumuwa bwanje akwolekela kimui bulungi bwa Luhanga ngoku kaatadhooba kabbeneliya bantu."

Yesu naaghambila Bafalisaayo ngoku baliki-bona

(Matayo 23:1-36; Maliko 12:38-40)

³⁷ Obu Yesu aamaliye kubugha ebi, Mufalisaayo aamubilikila ewe niikuwo baliye kihulo hamui na Yesu; nahabweki Yesu aasiima aaghenda kuba haa kihulo eki.

³⁸ Bhaatu obu baatandikagha kuliya, Mufalisaayo oghu aabona Yesu naaliya ataadubhiye kunaaba mu ngalo kwonini, ti Mufalisaayo oghu aasweka.

³⁹ Niibuwo Mukama aamughiliye ati, "Enuwe Bafalisaayo, mukwesemeliyagha haaguuli† kuni mitima yaanu eesuuyemu mululu na bubhi.

⁴⁰ Badhoma-dhoma enuwe! Oghu akahanga mubili niiye akahanga na mutima dhe.

⁴¹ Musiime Luhanga adubhe asemeliye mitima yaanu kandi ebi muli nabiyo mubitambuliye banaku na mutima ghusemeeye niikuwo musemela ewaa Luhanga."

† 11:39 11:39 Mu Lugiliki baghambije bati mukunaabiyagha haaguuli ya biikopo kandi sahaani.

42 “Ngamulikibona enuwe Bafalisaayo, nanga mukuhaagha Luhanga kimui ky’ekumi kya buli kantu nankabha nga nswigha, butungulu kedha bulaala bunji bwona bw’omu misili yaanu. Bhaatu kusa, mu ngeso syanu tamufuuy’o kuba na bwenganija kandi tamukundiye Luhanga. Ebi mwangubikoliye byona mutatigha na binji.

43 “Ngamulikibona enuwe Bafalisaayo, nanga mukaakubaagha muli mu malamiliyo, mukub-balagha kusitama mu ntebe sya bitinjisa. Ti ni mwaba muli mu butale, mubbala bantu babalamukiye babahutiye.

44 “Ngamulikibona, nanga muli nga bituulo bitaliyo kaakulolel’o, ebi bantu bakulub-hatangil’o batamaniye ngoku bili bituulo.”

45 Niibuwo omui mu beegheesiya baa bilaghilo aamukuukiyemu ati, “Mwegheesiya, obu waabughiyeye otiyo, naatu watwambuuye dhe.”

46 Yesu aamukuukamu ati, “Ngamulikibona enuwe beegheesiya baa bilaghilo, nanga mukuheekiyagha bantu nkumba sibasaalukaane, esi enuwe mutaakugubha kukum’o na katii konkaha.

47 “Ngamulikibona, nanga mukukwelagha bituulo bya balangi, kuni baataata baanu niibo baabaatiye.

48 Obuuni mukukolagha mutiyo mukubaagha nimwoleka ngoku musembiye ebi baataata baanu aba baakoliy’o balangi aba; nanga niibo baabaatiye, kusa enuwe mukukwelagha bituulo byabo.

49 Eki niikiyo kyalekiye, Luhanga mu magheji ghe aaghila ati, ‘Ndabatumilagha balangi na

bakwenda, bamui mu balangi aba bakubaata kandi banji bababonaboneliye kimui.’

⁵⁰ Nahabweki enuwe bantu baa mujo ghuni, Luhanga alibatwila musango ghwa kwita balangi aba kulughijilila hambele obu Luhanga aahangiye nsi.

⁵¹ Kandi kulughijilila obu baatiye Abbeli kuhikiya obu baatiye Jakaliya, oghu baatiye haagati ya eki bakuhongelagh’o bihonguwa na kijikalo kilukwela mu Numba ya Luhanga. Mbaghambiiye majima, ebi byona Luhanga alitwila bantu baa mujo ghuni musango gh-wabiyo.”

⁵² Yesu aatodha aabaghila ati, “Ngamulikibona enuwe beegheesiya baa bilaghilo! Mukulekagha bantu batamanya Luhanga. Naanu boonini mukubhengagha Luhanga kubalema kandi mutanga banji kusijima Luhanga kubalema.”

⁵³ Obu Yesu aabbalagha kubalugh’o kughenda, Bafalisaayo na beegheesiya baa bilaghilo aba baatandika kumuhakaniliya kimui kandi baakala kumubuuliya bibuuliyo byamaani-maani,

⁵⁴ mbaleng’o kumwohiya bati abughe kintu kibhiihiye niikuwo bamunyegehelele.

12

Yesu naateelelela beeghesebuwa be kugumisilija

(Matayo 10:26-33)

¹ Bwile obu, bantu bakaniye kimui baagumbaana hambali ali, muntu ataakukuba na kati.

Aatandika kubugha na beeghesebuwa be ati, “Mwelinde kitumbiso kya Bafalisaayo, niibuwo bughobiya bwabo.

² Taaliyo kintu kyona eki bantu balikolelela mu kibiso ekitalimanuwa, kedha eki balibisa-bisa ekitalimanuwa.

³ Nahabweki eki mulabughilagha mu nsita, bantu boona balakighuwagha kandi eki mulabughilagha mu biiweewe, balakilangililagha bantu boona.

⁴ “Enuwe baabhootu syanje mbaghambiiye majima, mutoobaha abakugubha kwita mubili, bataakugubha kukola kintu kinji kisaaiye haala.

⁵ Oleke mbaghambile oghu mukwobaha. Mwobahe Luhanga oghu haanuma ya kwita mubili, ali na butoki kubakuba mu Gehena. Mbaghambiiye, oghu aaniye mwobaha.

⁶ Buuye busiiliya butaano tabakubughuliyagha silingi kikumi syonkaha? Bhaatu noobu buba buli buunabwana-bwana, taaliyo na kamui aka Luhanga atamaniye.

⁷ Enuwe boona Luhanga amanije nankabha muhendo ghwa esoke elili haa mutuwe ghwawe. Nahabweki mutoobaha. Muli baa mughaso munu kusaaliya busiiliya bukanije.

⁸ “Mbaghambiiye, weena oghu alyatula mu bantu ati ni wanje, nanje Mwana wa Muntu ndimwatula mu maaso ghaa baamalajika baa Luhanga.

⁹ Bhaatu oghu alineehighaana mu bantu, nanje ndimwehighaana mu maaso ghaa baamalajika baa Luhanga.

10 Kandi weena oghu akubugh'o kubhi Mwana wa Muntu alighaniluwa. Bhaatu weena oghu akwambula Mwoyo Ahikiliye taalighaniluwa.

11 "Bhaatu enuwe mbaabatwete kubatoniya mu malamiliyo ghaa Bayudaaya, kedha mu balemji, kedha mu bantu abali na butoki, byakubugha bitalibatuntuliya.

12 Bwile obu Mwoyo Ahikiliye niiye alibeegheesiya bya kubugha."

Lusimo lwa muguudha mudhoma-dhoma

13 Niibuwo muntu omui mu kiigambi kya bantu abaabaagha bagumbaane aba aaghiliye Yesu ati, "Mwegheesiya, oghambile wamaaha ampe haa bintu ebi tita aatighiye obu aakuuye."

14 Yesu aamukuukamu ati, "Musaasa uwe, ni ani akankoma kuba mucu wa nsonga syanu?"

15 Yesu aaghila abaabaagh'o ati, "Mweghen-deseleje! Mwelinde mululu ghwa buli milingo; bwomiji bwa muntu tabusighikiye h'etungo likaniye eli ali naliyo bbaa."

16 Niibuwo aabatwiliye lusimo ati, "Musaasa omui akaba ali na kibanja kiye kyeliya ndimo kusemeeye.

17 Eelilikana ati, 'Boojo nkole ki? Tandi na hambali nkubiikila ndimo yanje eni yona.'

18 "Niibuwo aacuuyemu ati, 'Eki nkukola nkini, nkusakaalula nguli syanje esi syona nkwelemu sisaay'o kuneetakaka, haaniimuwo naabikila ndimo yanje eghi na bintu byanje byona.'

19 Dumbi neesime nti, 'Neebiikiye etungo elikuleka niimmal'o kabili. Mpuumule, ndiye, ninuwe kandi neeghonje.'

20 “Bhaatu Luhanga aamughila ati, ‘Mudhoma-dhoma uwe! Obwalo nkukuuya haa musana kandi muntu onji atighaliye ebi weebiikiye ebi!’

21 “Nahabweki niikuwo kiliba kitiyo n’oghu akwebiikilagha etungo likaniye munsu, kuni ali munaku mu maaso ghaa Luhanga.”

Kwesigha Luhanga
(Matayo 6:25-34)

22 Yesu aaghila beeghesebuwa be ati, “Nahabweki ndimabaghambila, muteelalikiilila ebi mukwetaaghisibuwa mu bwomijili bwanu, bintu nga byokuliya, nankabha byakuluwala haa mubili ghwanu.

23 Nanga bwomijili busaaiye byokuliya kandi mubili gusaaiye byokuluwala.

24 Dhaani mulolele haa binamungoogha. Tabikuhelagha kedha kukesa, tabili na nguli kedha haakubiikila; bhaatu Luhanga akubiliisiyagha. Enuwe muli baa mughaso kusaaiya noni esi!

25 Buuye ni ani mu enuwe nankabha atuntula atiya oghu akugubha kwongela haa bwomijili buwe saaha emui yonkaha?

26 Tooli ngoku mutaakugubha kukola kantu katii katiyo, bintu ebi bikubatuntuliyagha nangaaki?

27 “Dhaani mulolele haa bimole ngoku bikukulagha. Tabikukulagha mulimo kedha kusona ngoye. Bhaatu mbaghambiiye, nankabha Solomoni mu kitinisa kiye kyona, taaluwete kusemeeye kwenganiya na kimui haa bimole ebi.

28 Luhanga alaba naakuluwikagha atiyo bisingo bya mu kisaka, ebiliyo obwalo kandi munkiya babijomba babikuba mu mulilo bihiya, akubaluwikila kimui kusaaliya biyo, enuwe abali na kuhikilija kukee!

29 Nahabweki byokuliya na byakunuwa bita-batuntuliyagha.

30 Nanga ebi niibiyo bikutwalilijagha munu abatamaniye Luhanga, bhaatu Eseenuwe amaniye ngoku mukubyetaaghisibuwa.

31 Kuuy'o mwekambe kuba mu bulemi bwa Luhanga kandi bintu mukwetaaghisibuwa ebi byona akubongel'o biyo.

32 "Enuwe bantu banje, nankabha muli ba-kee, mutoobaha, nanga kidheedheeye kimui Eseenwe kubaha bulemi buwe.

33 Mughuliye ebi muli nabiyo, sente esikulughamu mu musihe banaku. Nimwakoliye mutiyo mukuba mwebiikiye buguudha butaakuhuw'o mu eghulu hambali basuma bataakugubha kuhika kedha nenje kububhiya.

34 Nanga hambali buguudha bwawe buli na mutima ghwawe niiyo ghukuukalagha dhee."

Muukale mwelindiye

35 "Muukalaghe mweteekaniije, muluwete kusemeeye kandi na taala syanu nsyaka.

36 Mube nga bantu abalindiliye kukuuka kwa mukama wabo oghu aghendiye haa bughenu bwa kuswela, niikuwo naakidhiye kandi akonkona haa lwichi dumbi bamuughulile bwangu.

37 Bali na mugisa baheeleliya aba mukama wabo alisanga beeteekanijje. Mbaghambiiye majima ghoonini, alyeteekanija, abasitamije kandi abasembeje baliye.

38 Bali na mugisa baheeleliya aba mukama wabo alisanga beeteekanijje, noobu alikuukila haa nkoko yaakabili kedha yaakasatu ekookela handinga-ndinga ya bwile.

39 “Kandi mumaniye kini. Nguli nini e ka aamanyagha bwile obu musuma akwisa kwibhila mu, tangulekagha musuma naataaha mu numba yee kwibhamu.

40 Nahabweki enuwe muukalaghe mweteekanijje, nanga Mwana wa Muntu aliisila mu bwile obu mutaakwelilikana muti niibuwo akwisilamu.”

41 Niibuwo Peetelo aamubuuiye ati, “Mukama, buuye lusimo olu niituwe waalutwiliye, kedha waalutwiliye bantu boona?”

42 Mukama aamukuukamu ati, “Muheeleliya mwesighibuwa kandi wa magheji akukolagha ebi mukama wee abbalije. Mukama wee akumomagha kulolelela baheeleliya baanakiye, kubaha byokuliya mu bwile babhonganuuwe kubitungilamu.

43 Ali na mugisa muheeleliya oghu mukama wee alikuuka amusanga naakola mulimo ghuwe oghu kusemeeye.

44 Mbaghambiiye majima, mukama wee oghu alimuha kulolelela bintu biye byona.

45 Bhaatu muheeleliya mubhi oghu naanaghiliye ati, ‘Mukama wanje naye aalebhiye hambali aaghendiye,’ dumbi atandika

kuhuulanga baheeleliye baanakiye, baabusaasa na baabukali. Atandika kuliya, kunuwa kandi kwetamiilila.

⁴⁶ Mukama wa muheeleliya oghu aliisa mu kilo kandi mu bwile obu muheeleliya oghu atamunihiiye kwisilamu. Aliha muheeleliya oghu kifubilo kyamaanj ngoku Luhanga alikuba mu Gehena batali beesighibuwa.

⁴⁷ “Kandi muheeleliya oghu amaniye eki mukama wee akubbala akole, bhaatu atakikola; balimuhuula bibbooko bikanije.

⁴⁸ Bhaatu oghu atamaniye eki mukama wee akubbala ati akole, akola ekitahikiye, oghu alifubiluwa kukee. Nanga mbaghambiiye, weena oghu Luhanga aahaaye bikanije, niiye alisaba bikanije.”

Kubaghanijibuwamu

(Matayo 10:34-36)

⁴⁹ Yesu aatodha aabaghila ati, “Kwisa kwanje munsu ndi nga muntu naatumikiyemu mulilo kughimalakaka. Dumbi nkwekumbula mulilo oghu ghutandikil’o!

⁵⁰ Kandi nkughenda kubona-bonela kimui. Tooli ntuntuliye kimui kuhikiya nimaliye kubona-bona ntiyo.

⁵¹ Mutateekeleja muti naasiye kuleeta mpemba mu bantu. Mbaghambiiye tanaaleetiye mpemba bbaa, naasiye kuleka bantu mbeebaghanijamu.

⁵² Kandi kulughilila endindi numba eghi elabaagha elimu bantu nga bataano, basatu baleebaghanijagh’o ababili bali, n’ababili beebaghanijagh’o basatu.

53 Mubyaye aleebaghanijagh'o mwana wee kandi mwana aleebaghanijagh'o mubyaye wee. Mukali aleebaghanijagh'o muhala wee, na manaabukali aleebaghanijagh'o nina wee, ese mwana aleebaghanijagh'o mwana wee, na mwana aleebaghanijagh'o ese wee. Mukali aleebaghanijagh'o mugholi wee, na mugholi aleebaghanijagh'o ninabyala wee."

*Yesu naateelelela bantu
(Matayo 16:2-3)*

54 Dumbi Yesu aaghila kibbula kya bantu abaabaagh'o ati, "Kusa obu mukubonagha kicu kyelaghuuye eghulu ebughuwa ejooba ngamukughilagha muti, 'Bhaaba olole mbula ekughuwa endindi,' ti eghuwa kuwo.

55 Kandi mwegha ngwatandika kuhunga ngulugha ekuwa, mughila muti, 'Obwalo musana ghukutuwa,' tooli ghutuwa kuwo.

56 Ngobiya enuwe! Mukuukalagha muloliye nsi kedha mwanya tooli mumanya muti mumaniye kuteebeleja ebikuba mu mwanya. Ti haabwaki mutaakugubha kusoboolola makulu ghaa bikuboneka bya bilo bini ebikwete kub'o?

57 "Haabwaki buuye mutacuwamu ekihikiye kukoluwa mutakatwiluwe musango?

58 Muntu naacuuyemu kukunyegheelela mu kooti, oleng'o kumala nsonga syanu naye munali mu kihanda, atakakukidhiye mu maaso ghaa mucu. Nanga naanakukidhiyeyo, mucu oghu akukukwatiya muusilikale akute mu nkomo.

59 Mbaghambiiye, tookulughamu kuhikiya osuuye buli kaasente aka bakukutonga."

13

Kwekuukamu kedha kuhwelekeelela

¹ Bwile obu Yesu naaneegheesiya, bantu baasa baamughambila ngoku mulemi Pilaato aalaghiiye baasilikale be baatila Banagalilaaya mu Numba ya Luhanga, mbanasala bisolo byabo byakuhongela Luhanga, ti saghama ya Banagalilaaya aba yaalungana na ya bisolo baasalagha ebi.

² Niibuwo Yesu aababuuiye ati, “Mukwelilikana muti ekyalekiye Pilaato aalaghila ati baate Banagalilaaya aba ni nanga ebo kuba basiisi kusaaliya Banagalilaaya banji boona?”

³ Bbaa! Mbaghambiiye majima, muteekuukiyemu kandi muleka bibhi byanu naanu dheeh Luhanga alibahwelekeeleliya enuwe boona.

⁴ Tooli bantu ekumi na munaanaa aba kitwike kya lugho lwa matafaali lukangamiye lwa Silowaamu kyegengeeye baakuwa, mukwelilikana muti bakaba bali basiisi mu Yelusaalemu kusaaliya bantu banji boona?

⁵ Bbaa! Mbaghambiiye majima, muteekuukiyemu kandi muleka bibhi byanu naanu dheeh Luhanga alibahwelekeeleliya enuwe boona.”

⁶ Niibuwo aabatwiliye lusimo kubeegheesiya kwekuukamu, aaghila ati, “Musaasa akahela mu musili ghuwe kiti kya bighuma mutijini.* Obu bwile bwa kukobha bighuma bwahikiye

* **13:6 13:6** Kiti kini nkyakulolel’o kya bantu baa Isaaleeli.

aakighend'o naabbala kukobha bighuma ebilaba byaniyo, bhaatu aasanga kitaaniyo na kantu.

⁷ Obu aaboone atiyo, aaghila oghu aaloleelelagha musili oghu ati, 'Ghuni ni mwaka ghwakasatu niinaasa kubbala bighuma ebi kiti kini kyanije bhaatu ntaakusang'o na kantu! Okikonde! Kileke kubhijya etaka kwonkaha.'

⁸ "Oghu aloleleeye musili oghu aamukuukamu ati, 'Waiyu, otodhe oleke kimale mwaka ghunji ghumui, nkuta lwejo mu mili yakiyo.

⁹ Mwaka ghukwisa nkyaniye nkilungi! Bhaatu kitaaniye olaghile bakikonde.' "

Yesu naakiliya mukali kilo kya Sabhato

¹⁰ Haa kilo kya Sabhato, Yesu eegheeselijagha mu limui mu malamiliyo ghaa Bayudaaya.

¹¹ Mukali akaba alimu oghu kilimu kyalamaje kumala myaka ekumi na munaanaa. Aakalagha agogomeleeye, taakugubhagha kuu-nunuka kusima.

¹² Obu Yesu aaboone mukali oghu aamubilikila kumwebinga, amughila ati, "Muhala wanje, bulwaye bwawe obu bwakiliye."

¹³ Makamukum'o ati dumbi mukali oghu aakilil'o. Aanunuka aasima kandi aatandika kusindila kimui Luhanga.

¹⁴ Mwebembeli w'elamiliyo eli aakwatuwa kiinigha haabwa Yesu kukiliya mukali oghu kilo kya Sabhato. Aaghila bantu abaabaaghamu ati, "Tuli na bilo mukaagha ebi bilaghilo byatu bitusijimilaniye kukolelamu milimo buli wiji. Nahabweki mwisaghe mu bilo ebi kubakiliya, bhaatu kilo kya Sabhato bbaa."

15 Mukama aamughila ati, “Ngobiya enuwe! Buuye tamukusambuulagha nte syanu kedha ndogooj syanu kilo kya Sabhato musitwala kunuwa?”

16 Nahabwekiini takili kibhi kukijiya mukali oni kilo kya Sabhato bbaa! Nanga ni omui mu baasukulu baa Ebbulahimu kandi Sitaani atuuye amuboheleeye na bulwaye kumala myaka ekumi na munaanaa.”

17 Yesu akaba makabugha atiyo, abaamuhakaniyagha boona nsoni syabakwata, bhaatu abataamuhakaniyagha baadheedheluwa kimui haabwa byakuswekaniya ebi aakolagha.

*Nsimo sya bulemi bwa Luhanga
(Matayo 13:31-32; Maliko 4:30-32)*

18 Niibuwo Yesu aaghijye ati, “Bulemi bwa Luhanga ndabusuusaaniya na ki? Kandi ndakoleesiya kyakulolel’o ki kubusoolol’o?”

19 Buli nga kasigho kaa kalatuusi, aka musaasa aatwete, aahela mu musili ghuwe. Kaakula, kafooka kiti kiinamulito, ti noni syakwela bisui mu bitai byakiyo.”

20 Yesu aatodha aabaghila ati, “Nkoleesiye kyakulolel’o ki kinji kukisusaaniya na bulemi bwa Luhanga?”

21 Buli nga katumbiso katiji aka mukali aataaye mu kitumbe kya kigaati kiinamulito kandi kakibhimbiliya kimui.”

*Abakuba mu bulemi bwa Luhanga
(Matayo 7:13-14, 21-23)*

22 Obu Yesu aaghendagha e Yelusaalemu, aakwama mu maatauni n'omu mibhili naa-neegheesiya bantu.

23 Niibuwo muntu omui aamubuuiye ati, "Mukama wanje, buuye bantu bakee niibo balijunuwa?"

Yesu aaghila abamutegheleeiye boona ati,

24 "Mut'o kulu na nkokolo kutaahila mu mulyango oghubhokaane, nanga mbaghambiiye bakaniye balileng'o kughutaahilamu bhaatu tabaligubha bbaa.

25 Ti obu mukama waghwo aliighal'o, abaliba mutalimu niibuwo mulitandika kumubilikila n'elaka lyamaani nimumwesengeleliya muti, 'Mukama waatu, gutu otuughulile!' Bhaatu eye alibakuukamu ati, 'Tanimaniye hambali mukulugha.'

26 "Mulimughila muti, 'Twaliyagha hamui naawe kandi waatwegheeseliyagha ewaatu.'

27 "Bhaatu alitodha abakuukemu nti, 'Tambamaniye bbaa. Mundugh'o nkoli sya bibhi enuwe!'

28 "Ti obu mulibona Ebbulahimu, Isaka, Yakobbo, hamui na balangi banji boona bali mu bulemi bwa Luhanga, mulilila kandi mwehighuuye kubhi kwonini haabwa kubona-bona nanga enuwe kutaba mu bantu aba.

29 Bantu batali Bayudaaya balilugha bulugha ejooba, bughuwa ejooba, elughulu, na ekuwa kandi basitame mu bijkalo byabo mu kighenu mu bulemi bwa Luhanga.

30 Bakaniye aba bantu bahaaye kitiinisa kya-maani endindi baliba na kitiinisa kikee, na

bakan_iye aba bantu baghai_iye endindi balitunga kiti_inisa kyamaani.”

Yesu na Helude

³¹ Yesu naanabugha ebi, Bafalisaayo baamwis’o, baamughila bati, “Olughe hani oghende hanji. Helude akubbala kukwita.”

³² Yesu aabakuukamu ati, “Mughende mughambile ngobiya ya Helude kandi mubhi oghu muti, ‘Obwalo na munkiya nkubhing’o bantu bilimu kandi nkiliye balwaye, haa kilo kyakasatu nimaliilile mulimo ghwanje.’

³³ Nkulaghiluwa kughenda niinakola mulimo ghwanje obwalo, munkiya, na kilo ekikulabh’o. Taaliyo oghu akunjitila mu kyalo kini bbaa, nanga taaliyo mulangi n’omui oghu baalaatiye hanji hoona etali mu kibugha kya Yelusaalemu.”

Yesu naaliliilila Yelusaalemu

³⁴ “Ai enuwe bantu baa Yelusaalemu, abak-witagha balangi kandi muhuula mabaale bantu Luhanga abatumiiye, nkulengagh’o kubakumaaniya ngoku nkoko ekukumaaniyagha bwana bway’o, bhaatu mubhenga.

³⁵ Dheluuni, nkubaleka nga numba etalimu muntu. Mbaghambiiye, tamukutodha kumbona kuhikiya obu mulyebaliya siye nimughila muti ‘Ali na mugisa oni oghu aasiye mu liina lya Mukama.’* ”

14

Yesu naakiliya muntu haa kilo kya Sabhato

* 13:35 13:35 Jabbuli 118:26

¹ Kilo kya Sabhato kimui, obu Yesu aaghendiye kuliila mwa mwebembeli wa Bafalisaayo, bantu baakala bamuloleleeye.

² Mu bantu abaabaaghamu, hakaba alimu musaasa alwaye bulwaye bwa kubhimba-kaka.

³ Niibuwo Yesu aabuuiye Bafalisaayo hamui na beegheesiya baa bilaghilo aba ati, “Bilaghilo bisimilaniye muntu kukiliya muunakiye haa kilo kya Sabhato, kedha bbaa?”

⁴ Bhaatu bo baakala baholeeje bhii! Dumbi Yesu aakum’o musaasa oghu, aamukiliya kandi aamughila ati aghende.

⁵ Niibuwo Yesu aatodhiye aababuuliya ati, “Mwana waawe kedha nte yaawe niyeegengiye mu kijina kilo kya Sabhato, okukola ki? Tookukola mulimo ghwa kughibbulamu bwangu?”

⁶ Baatodha baakala baholeeje.

Yesu neegheesiy’o kwebundaaliya

⁷ Obu Yesu aaboone ngoku bamui mu Bafalisaayo abali haa bughenu haala bakwete kwekomela ntebe sili syonini sya baghenu bakulu, haaniisiyo bakusitamamu, aaha lusimo bantu abaabaagh’o aba ati,

⁸ “Muntu naakubilikiye haa bughenu buwe, otaghenda kusitama mu kijikalo kya kitinisa, nanga muntu oghu asobola kuba ali n’oghu aabilikiye, oghu akusaaje kitinisa.

⁹ Muntu oghu akaakukidha, dumbi oghu aababilikiye oghu akwisa akughile ati, ‘Weehighile oni mu ntebe muni.’ Ti okulughamu na

nsoni, oghende ositame mu kiiikalo ky'abatali na kitiiinisa.

10 Bhaatu balakakubilikilagha, oghendaghe ositame mu kiiikalo ky'abatali na kitiiinisa, ni-ikuwo oghu aakubilikiye akaakwisa, akukughila ati, 'Wai bhootu syanje, oose eni ositame mu kiiikalo kisemeeye.' Dumbi naawe okuhuta mu baghenu baanyakawe abali haala.

11 Nanga weena munakwebhimba-bhimbiya balimubhondiya kandi oghu akwebundaaliya balimuhutiya."

12 Niibuwo Yesu aaghiliye oghu aamubilikiye oghu ati, "Olakabaagha oli na bughenu, otabilikilagha baabhootu syawe, baana baa njoko waawe, nganda syawe, kedha baguudha baanyakawe bonkaha. Nuwaabilikiye aba, nabo baliisa kukubilikila haa maghenu ghaabo dumbi babe bakusasuuye.

13 Bhaatu obu olabaagha oli na bughenu bwawe, obilikilaghe banaku na balema baa buli mulingo,

14 niibuwo olitunga mugisa. Nankabha bo bataakugubha kukukuukiliyamu ebyawe, Luhanga alikukola kusemeeye obu bantu bahikiliye balihumbuuka."

*Abaliba mu bughenu bwa Mukama
(Matayo 22:1-10)*

15 Obu omui mu bantu abaalayagha na Yesu aba aaghuuye ebi Yesu aabughiye ebi, aaghila ati, "Bali na mugisa abaliba mu bughenu bw'omu bulemi bwa Luhanga."

16 Bhaatu Yesu aabatwila lusimo luni ati, “Hakaba aliyo musaasa, aateekanija bughenu buwe kandi aabilikila bantu bakaniye kwis’o.

17 Obu baamaliye kuteekanija buli kantu, aatuma muheeleliya wee kughambila aba aabilikiye ati, ‘Mwise, baateekanije buli kantu.’

18 “Bhaatu boona baatandika kumughambila byakwekwatijiya. W’okudubha aaghila ati, ‘Naaghuliye musili ghwanje, nkughenda kughulola; gutu onganile tankwisa.’

19 “Onji aaghila ati, ‘Naaghuliye nte ekumi, nkubbala kughenda kusilola silakaba sisemeeye; gutu onganile tankwisa.’

20 “N’onji niikiyo kimui aaghila ati, ‘Naaleetiye mugholi, nahabweki tankwisa.’ ”

21 “Niibuwo muheeleliya oghu aakuukiye, aaghambila mukama wee ebi basaasa aba baabughiiye. Mukama wee aatamuwa, aalaghila muheeleliya wee ati, ‘Oghende bwangu mu nguudhe syona n’omu buhanda bwisiye mu tauni, obilikile banaku, baghena-gheneewe, aba maaso ghaaghaaye, na balema.’

22 “Obu muheeleliya oghu aakuukiye aaghila ati, ‘Mukama wanje, naakoliye ng’oku wandaghiye, bhaatu bantu banaakubul’o dhe.’

23 “Mukama oghu aaghila muheeleliya wee oghu ati, ‘Oghende mu nguudhe n’omu buhanda bw’omu kyalo, oleng’o kulola ngu bantu baakanije haa bughenu bwanje.

24 Bhaatu mbaghambiiye, aba naabaagha ndubhiye kubilikila, n’omui taakuliya byokuliya bya bughenu bwanje bbaa.’ ”

*Mweghesebuwa ngoku abhonganuuwe kuba
(Matayo 10:37-38)*

²⁵ Obu Yesu aaghendagha, kiigambi kya bantu bakaniye baamukwama. Niibuwo aakebukiyeye enuma, aabaghila ati,

²⁶ “Muntu weena naabbaliye kwisa hambali ndi, abhonganuuwe kuleka ese wee na njina wee, mukali wee na baana be, baana baanina wee baabusaasa kedha baabukali, nankabha bwomiji buwe bwonini. Ataabaaye atiyu, taakugubha kuba mweghesebuwa wanje.

²⁷ Ti weena oghu ataaheekiye musalaba ghuwe ankwama, taakugubha kuba mweghesebuwa wanje bbaa.”

²⁸ Yesu eeyongela aabaghila ati, “Dhaani nuwaabbaliye kukwela numba, tookudhubha obaliilile muhendo ghwa sente esi ekutwala, olole olakaba oli na syakughimala?

²⁹ Nanga nuwaalimiye musingi kusa otagubha kughimala, weena oghu akubona musingi oghu akukusekelela,

³⁰ ati, ‘Bhaaba muntu oni kusa akatandika kukwela tooli ataagubha kughimala.’

³¹ “Kedha ni mukama ki, angubbala kulwana na mukama onji, atadubhiye asitama kwelilikana, obu baasilikale be mutwalo ghumi, balaba mbagubha kwemiliilila oli oghu aasiye na baasilikale mitwalo ebili?

³² Naaboone ataakugubha, akutuma bantu kughenda kuughuwana n’oli mu businge baasilikale b’oli banaseleeye kimui.

³³ Niikiyo kimui, weena mu enuwe oghu ateelekeeseeiye byona ebi ali nabiyu, taakugubha kuba mweghesebuwa wanje.

³⁴ “Kisula kili na mughaso, bhaatu bunuli mbwakihooyemu, buuye bakugubha kubukuukiya mu batiya?”

³⁵ Kikuba kitakyali na mughaso ghwona, kuuy’o kukikuba.

“Oghu ali na matui ghaa kuughuwa, aaghuwe.”

15

Lusimo haa ntaama eghi ekabula (Matayo 18:12-14)

¹ Bwile bumui bakumaaniya baa musolo na basiisi banji baatandika kwekumaaniya hambali Yesu ali kutegheeleliya ebi akwete kwegheesiya.

² Bhaatu Bafalisaayo na beegheesiya baa bilaghilo abaabaagh’o batandika kutongana bati, “Bhaaba musaasa oni ni bhootu sya basiisi kandi akuliyagha nabo.”

³ Niibuwo Yesu aabatwiliye nsimo kubooleka ekilekiye naakuukalagha na basiisi, aaghila ati,

⁴ “Mabhuule omui mu enuwe naabaaye ali na ntaama siye kikumi ti emui emubuliilila. Taakutigha sili kyenda na mwenda hambali sili, aghende abbale eghi yaabuliye kuhikiya aghi-boone?”

⁵ Ti naaghiboone akughitwala ewe e ka adheedheeuwe.

6 Makidha dumbi abilikile baabhootu siye hamui na baliilanuwa be abaghile ati, 'Tudheedhuwe nanga naakomiye ntaama yanje eghi yaabaagha ebuliye.'

7 Niikiyo kimui dhee musijisi omui neekuukiyemu, hakub'o kudheedhuwa kukaniye mu eghulu kusaaliya bantu kyenda na mwenda abakubhengagha kwekuukamu nanga kwefoola kuba bahikiliye."

Mukwenge oghwabuliye

8 Aatodha aabaghila ati, "Buuye mukali naabaaye ali na mikwenge yee ekumi,* ti ghumui ghumbuliilila, taakubhakiya taala, eehelele mu numba hoona kuhikiya akomiye mukwenge ghuwe oghu?

9 Naaghuboone dumbi, abilikile baabhootu siye hamui na baliilanuwa be abaghile ati, 'Tudheedhuwe nanga naakomiye mukwenge ghanje oghwabaagha ghubuliye.'

10 Niikiyo kimui, mbaghambiiye, baamalajika baa Luhanga bakudheedheluwagha kimui haabwa musijisi omui oghu akwekuukaghamu."

Mwana oghu akabula

11 Yesu aatodha aabaghila ati, "Hakaba aliyo musaasa ali na batabani be babili.

12 Ow'obuto aaghila ese wee ati, 'Tita, h'etungo lyona eli oli naliyo eli, omp'o ebyanje.' Dumbi ese wee oghu aamuh'o ebiye.

* 15:8 15:8 Mukwenge ghumui ghukaba ghwengaane na musaala oghu muntu akukolelagha kilo kimui.

13 “Haanuma ya bwile bukee, mwana oghu aaghuliya ebiye byona, aaghenda mu ehanga hambali haseliye, abhilihiliyayo sente esi aahiye mu bintu omu syona mu bisimba byakitiyokitiyo.

14 Neemaliyo buli kantu aabaagha na ko koon, njala yamaan yaaghuwa mu kyalo eki kyona, atandika kubona-bona.

15 Niibuwo aaghendiye eesengeleleliya mutaka w’omu kyalo eki kumuha mulimo. Aamuha mulimo ghwa kulijisiya mpunu.

16 Haabwa muntu n’omui kutamuha kaakuliya, aatandika kwekumbula kuliya haa byokuliya bya mpunu esi.

17 “Niibuwo aatandikiye kwelilikana ngoku eetwalikaniye kubhi, aaghila ati, ‘Njala eli manjitila hani bhaaba, kuni tita ali na bakoli bakanije kandi boona akubahaagha byokuliya bibasaaghil’o!

18 Nkughenda ewaa tita oghu nimughile nti, “Tita, naasiisiye kimui ewaa Luhanga kandi naakusobeeleeje kwonini, gutu onganile.

19 Tanibhonganuuwe otodhe ongilemu mwana waawe bbaa; hakili onfoole omui mu bakoli baawe.”

20 Dumbi mwana oghu aamuka, aaghenda ewaa ese wee oghu.

“Bhaatu anali mu elembo ng’eli, ese wee aamulangiya kandi aamukwatiluwa kisa, dumbi aaligita kumwebaliya, aahika aamughuwa mu kikubha.

21 “Mwana oghu aaghila ati, “Tita, naasiisiye kimui ewaa Luhanga kandi naakusobeeleliya

kwonini. Tanibhonganuuwe otodhe ongilemu mwana waawe. [Hakili onfoole omui mu bakoli baawe.]†

22 “Bhaatu mwana oghu atakahendekeeje, ese wee oghu aamwebaliya kwonini nga mwana wee, aaghila baheeleliya be ati, ‘Muleete hani bwangu lughoye lusemeleeye kimui mumuluwike luwo. Mumuluwike mpete mu kyala kandi mumuluwike nkaito.

23 Muleete nte enoneeye kimui aaniyo mwata. Tukole kighenu kandi tudheedhuwe.

24 Mwana wanje oni ali nga muntu akaba akuuye aahumbuukiye kandi akaba abuliye, aabonekiye.’ Dumbi kighenu kyatandika.

25 “Bwile obu mutabani wa musaasa oghu ow’obukulu akaba anali mu misili naakola. Obu aalughiyeyo neebinga e ka, aaghuwa bubina mbwaghooniye e ka ewaabo.

26 Niibuwo aabilikiye omui mu baheeleliya baa ese wee aamubuuliya ati, ‘Bubina obughooniye e ka obu mwaki?’

27 Mukoli oghu aamukuukamu ati, ‘Muto waawe niye aakidhiye kandi eseenuwe aalaghiye twata nte enoneeye kimui, ti kighenu ekili e ka eghi takili kyabuke. Eseenuwe adheedheleewe kimui nanga muto waawe aakuukiye ali mwomili.’

28 “Obu mwana w’obukulu oghu aaghuuye atiyo, aasaaliluwa kimui kandi aabhenga na kuhika hambali kighenu eki kili. Niibuwo ese

† 15:21 15:21 Bighambo bini tabili mu bihandiiko binji, bak-abitigha.

wee aasiye hambali mwana oghu ali, aatandika kumwesengeleliya ati, 'Gutu wiise mu kighenu.'

²⁹ Bhaatu mwana oghu aabhenga, aaghila ese wee ati, 'Tita! Ntuuye naawe myaka eghi yoona ninkuheeliye. Tankakughayagha mulundi na ghumui. Ti tookampaagha nankabha kabuli oti nanje nidheedhuwe na baabhootu syanje.

³⁰ Bhaatu mwana waawe oghu aakubhijijiyee etunga lyawe lyengiyee eghi, aalimalila mu baamalaaya, obu aakuukiye, waamwitiye nte enoneeye kimui!

³¹ "Ese wee aamughila ati, 'Mwana wanje, tukuukalagha naawe buli kilo, ti ebyanje byona mbyawe.

³² Bhaatu tubhonganuuwe kudheedhuwa kandi kukola kighenu, nanga muto waawe aabaagha akuuye, aahumbuukiye; aabaagha abuliyee, aabonekiye.' "

16

Kukoleesiya etungo kusemeeye

¹ Yesu aaghambila beeghesebuwa be lusimo lunji ati, "Hakaba aliyo musaasa muguudha; ali na muheeliye wee oghu aaloleelagha buguudha buwe obu. Kilo kimui bantu baaghenda baalegha muheeliye oghu ewaa mukama wee bati akwete kubhijiyee etungo lya mukama wee oghu.

² Niibuwo aamubilikiye, aamubuuliya ati, 'Onsoboolole, nanga bangambiiye bati okwete kubhijiyee etungo lyanje. Nkubbala ombalile

ngoku waakoleeseejiye sente na bintu ebi ololele-eye, nanga tankutodha kukuha mulimo ghwa kulolelela bintu byanje.’

3 “Niibuwo muheeleliya oghu eebuuiye ati, ‘Mukama wanje alimabhinga siye haa mulimo. Dhelu siye nkughana obwani? Tandi na maani ghaa kukolela bantu milimo yamaani-maani kandi nsoni sikunkwata kusaba-saba bantu nti bampe bintu.’

4 Aaghila ati, ‘Nimanjiye eki nkukola, niikuwo obu mulimo ghuni ghulankwila, bantu baakale banali baabhootu syanje kandi bampe buukal’o mu maka ghaabo.’

5 “Dumbi aabilikila mu kibiso bantu, omui-omui, abali na mabanja ghaa mukama wee oghu. Aabuuliya w’okudubha ati, ‘Oli n’ebanja lya mukama wanje lyengaane haa?’

6 “Aamukuukamu ati, ‘Biigalaponi bya mafuta kikumi.’ Mukoli oghu aamughila ati, ‘Wanguhiye, ohandiike oti oli n’ebanja lya biigalaponi makumi ataano.’

7 “Aabuuliya w’akabili ati, ‘Oli n’ebanja lya mukama wanje lyengaane haa?’ Aamukuukamu ati, ‘Bighegha kikumi bya ngano.’ Aaghila n’oghu ati, ‘Ohandiike bighegha kinaanaa.’

8 “Mukama wa muheeleliya mughobiya oghu aamusinda haabwa kukola kintu kya magheji kitiyo. Nanga bantu b’omu nsi muni bali na magheji ghakanjiye ghaa kukolagana na baanyakabo. Basaaiye bantu abahutiye Luhanga mu kukolangana.

9 Niikiyo kilekiye nimbaghila nti mukoleesije kusemeeye etungo ly’omunsi muni kwetungila

buubhootu, niikuwo obu etungo litahikiye lilibahuw'o, Luhanga abeebaliye kandi abahe mu eghulu haakuukala bilo n'ebilo."

Bwesighibuwa

¹⁰ Yesu aatodha aabaghila ati, "Muntu ataabaaye mwesighibuwa mu kakee aka bamuhaaye bati akoleesiye, noobu bamuha bintu bikaniye kimui bati abikoleesiye taakuba mwesighibuwa bbaa.

¹¹⁻¹² Nahabweki mutaabaaye beesighibuwa mu kukoleesiya buguudha bwa muni muni, Luhanga taakubaha etungo lyanu lyomu eghulu lyamajima."

¹³ "Taaliyo muheeleliya n'omui oghu akugubha kuheeleliya bakama babili. Akukunda omui, oohe omui, kedha akut'o kulu na nkokolo kuheeleliya omui, aghaye omui. Niikiyo kimui naanu dhe, tamukugubha kuheeleliya Luhanga kandi sente."

Yesu na Bafalisaayo

(Matayo 11:12-13; 5:31-32; Maliko 10:11-12)

¹⁴ Bafalisaayo, aba buguudha bwali butwalilije, obu baaghuuye ebi Yesu akwete kubugha, beelolela eli bataabifuw'o.

¹⁵ Niibuwo aabaghiliye ati, "Enuwe mukwesemeliyagha mu bantu niikuwo babaghile bati muli bahikilije. Bhaatu Luhanga eye amaniye ngoku mukundiye kimui sente kusaaliya ngoku mumukundiye. Ebi bantu bakundiye kimui muni muni kandi ebibatwalilije, Luhanga eye taabibbaliye bbaa.

16 “Bilaghilo na balangi bikab’o kuhikiya obu Yohaana Mubatiji aasiye. Ti kulughiiila bwile obu Makulu Ghasemeeye ghaa bulemi bwa Luhanga niibuwo ghaalangililuwa. Ti buji muntu niibuwo eekamba kubutaahamu na kikubha.

17 Eghulu na nsi bilihuw’o bhaatu taaliyo kaghambo na kamui akali mu bilaghilo akalilugh’o kuhikiya kighendeleluwa kyabiyo kihikiliye.

18 “Musaasa naabhingiye mukali wee, aswela onji, akuba asyane kandi musaasa naasweye mukali oghu eba wee abhingiye, akuba asyane.”

Kabhi akali mu kusisa

19 Yesu aatodha aaghila ati, “Hakaba haliyo musaasa muguudha oghu akaba atungiiye kimui. Aluwalagha ngoye sitembeeye kimui. Buji kilo eeghonjelagha kimui ngoku abbaliye.

20 Haa elembo liye baalangaaliyagh’o musaasa munaku liina liye Lajaalo. Akaba alwaliye kimui bibbodhe haa mubili ghuwe ghwona.

21 Eekumbulagha kuliya ebyasaaghagha muguudha oghu ebi baakubagha mu kyabu. Ti mbuwa syasagha siikala kulamba-lambila bibbodhe biye ebi.

22 “Bwile bwahika Lajaalo oghu aakuwa, baamalajika baasa baamutwala kuukala haai na Ebbulahimu mu kikalo kya kitinisa. Na muguudha oghu naye aakuwa dhe, baamujika.

23 Aaghenda Ekulimu mu kikalo hambali kubona-bona kutakuhuwaagha. Obu aaloliye, aabona Lajaalo ali hamui na Ebbulahimu mu kikalo kya kitinisa.

24 Niibuwo aabilikiye n’elaka lyamaanī ati, ‘Tita Ebbulahimū, gutu ongilile kisa, otume Lajaalo akotiye kasonga kaa kyala kiye mu maasi, aghantooniye haa kilimi hakili kimpeheel’o katij, mulilo ghuni niibuwo ghwambona-boneliya kimui.’

25 “Bhaatu Ebbulahimū aamukuukamu ati, ‘Wai, oosuke ngoku waatungiye bilungi byona ebi waabbalagha, Lajaalo eye naabona-bonela kimui. Bhaatu endindi naye ahumuuye hani, ali na byona ebi akwetaaghisibuwa kandi adheed-heleeuwe kimui. Ti naawe niibuwo waabona-bonela kimui.

26 Kandi takili eki kyonkaha, haagati yaatu naawe Luhanga ataay’o kighona kyamaanī, niikuwo abakubbala kulugha eni kwisa eghi batagubha kandi taaliyo w’ewaanu eghi n’omui oghu akugubha kughulukaniya kwisa ewaatu eni bbaa.’

27 “Niibuwo musaasa muguudha oghu aatodhiye aaghila ati, ‘Gutu tita, nkwesengeleeje, otume Lajaalo oghu ewaatu ewaa tita,

28 nanga naatighiyeyo baana baamaaha bataano. Oleke aghende abateelelele beekuukemu bakole ebidheedhiye Luhanga, niikuwo nabo bataliisa mu kijikalo kya kubona-bona kini.’

29 “Ebbulahimū aamukuukamu ati, ‘Baana banjoko waawe bali na ebyahandiikuuwe Musa na balangi, oleke ebi haaliibiyo baaghuwa.’

30 “Musaasa oghu aatodha aaghila ati, ‘Bbaa, tita Ebbulahimū! Muntu naabahikiy’o alughiye mu bakuuye, bakwekuukamu.’

31 “Bhaatu Ebbulahimu aamughila ati, ‘Bataaghuuye Musa na balangi, tabakunanuka nankabha muntu ahumbuuka mu bakuuye.’ ”

17

*Yesu neegheesiy’o kibhi na kughanila
(Matayo 18:6-7, 21-22; Maliko 9:42)*

1 Yesu aaghila beeghesebuwa be ati, “Bintu ebikuleeteleja bantu kusijisa bikulaghiluwa kub’o. Bhaatu ngalikibona oghu akubileeta.

2 Muntu oghu alyehisukiya ati hakili nguli baamubohiye kitibo mu bikiya bakiboha haa kibaale kiinamulito, bamukuba mu nanja, kukaleka omui mu bato bani naasijisa.

3 Kandi mwelinde ngoku mukutwalikanija na bahikilija baanakyanu. Muhikilija muunakyawe naakusobeleeje, omuhabule eki aasobeeje. Tooli neekuukiyemu eki aakusobeleeje eki omughanile.

4 “Nankabha akusobeleejiya kilo kimui milundi musanju, ti buli mulundi akwis’o naaghila ati, ‘Gutu neekuukiyemu, onganile,’ omughanilaghe.”

5 Niibuwo bakwenda be aba baaghiliye Mukama bati, “Otukoonele tube na kukuhihilija kusaay’o.”

6 Mukama aakuukamu ati, “Nimwabaaye na kuhikilija kwengaane na kasigho katii kaa kalatuusi, mukughila kiti kiinamulito ekili na mili etobheeye muboone eki muti, ‘Odhuluwe haala osimbuwe mu nanja,’ kikukola kuwo.”

7 Yesu aatodha aabaghila ati, “Nuwaabaaye oli na muheeleliya waawe, akukukolelagha mu musili kedha akuliisiyagha bisolo byawe, naabaaye makakidha ati kulugha mu musili kedha kulisiya bisolo byawe, dumbi wanguhika omughile oti, ‘Oose tuliye’?”

8 Bbaa, okuhika omulaghile oti, ‘Onteেকে, onaabe, oluwale kusemeeye, onsembeje ndiye. Nkaakumala kuliya niikuwo naawe oliye.’

9 Noobu akuughuwa akola ebi waumulaghiye ebi byona, tookuughuwa obhonganuuwe kumuşima bwabiyo bbaa.

10 Naanu muli nga muheeleliya oghu dheе, mulakamalagha kukola byona ebi Luhanga abalaghiye kukola, mubhonganuuwe kughilagha muti, ‘Tatukwetaghisibuwa kusimuwa, nanga tuli baheeleliya kwonkaha. Twakoliye ebi tulaghiwe kukola.’ ”

Yesu naakiliya bantu ekumi balwaye ntumbi

11 Obu Yesu aanaghendagha mu kibugha kya Yelusaalemu, aakwamila haa mutaano ghwa disitulikiti ya Samaliya na ya Galilaaya.

12 Makakidha ati mu mubhili ghumui, basaasa ekumi balwaye ntumbi baasa, baamilila haakpengbu nga hali,

13 baabilikila n’elaka lyamaanj bati, “Yesu, Mwegheesya, gutu otughilile kisa!”

14 Obu aababoone, aabaghila ati, “Mughende mweyoleke mu bahongi babalole ngoku mwakiliye.” Mbanaghenda dumbi baakila.

15 Omui mu basaasa aba, obu aaboone ngoku aakiliye, dumbi aakuuka naasinda Luhanga n'elaka lyamaani.

16 Aahika aaghuwa Yesu mu maghulu kandi aamusijima. Musaasa oghu, akaba ali Musamaliya.

17 Yesu abuuuliya ati, "Tanaakiliye bantu ekumi boona? Ti bali mwenda bali haa?"

18 Taaliyo n'omui oghu aakuukiye kwisa kusijima Luhanga, kuuy'o munamahanga oni enkaha."

19 Niibuwo Yesu aamughiliye ati, "Oomuke oghende, kuhikiliya kwawe kwakukiliye."

*Yesu neegheesiy'o bulemi bwa Luhanga
(Matayo 24:23-28, 37-41)*

20 Kilo kimui bamui mu Bafalisaayo baabuuuliya Yesu bwile obu bulemi bwa Luhanga bukub'o. Aabakuukamu ati, "Bulemi bwa Luhanga obu tabukwisa bantu babuboone bbaa.

21 Kandi taaliyo muntu n'omui oghu akugubha kughila ati, 'Olole mbuni hani!' Kedha 'Buli hali!' Nanga bulemi bwa Luhanga bubalimu."

22 Niibuwo Yesu aaghiliye beeghesebuwa be ati, "Halib'o bwile obu bantu abampikiliye balibabona-boneliya kimui haabwanje. Ti bwile obu balyekumbulila kimui bati hakili nguli bamboone niikal'o nabo kilo kimui bughila, niikuwo batung'o kasinge, ng'aka balitunga kilo eki Mwana wa Muntu alikuuka. Bhaatu bwile obu tabalimubona bbaa.

23 Bantu baliisa mbabadimaaga bati, 'Mulole, nguni hani!' Kedha 'Nguli hali!' Mutalisijima ebi bakwete kubugha.

24 Nanga kilo eki Mwana wa Muntu alikuukilamu, buli muntu alimubonela kimui bbeni-bbeni ngoku bakubonagha nkubha eghi ekubbyokagha ti ebbeneliya kimui kyalo kyona.

25 Bhaatu ebi bitakabaay'o akulaghiluwa kubona-bonela kimui. Nanga bengei baa Bayudaaya, bakulu baa bahongi, na beegheesiya baa bilaghilo, bakumubhenga.

Taaliyo oghu amaniye kilo kandi saaha

26 "Obu Mwana wa Muntu aliba ali haai kukuuka, bantu baliba mbakola bintu ng'ebi bantu baakolagha mu bwile obu Nuha aabaagha anaakaaye.

27 Bwile obu bantu baakalagha mbaliya, mbanuwa, mbaswela kandi bakal mbasweluwa, kuhikiya obu Nuha aataahiye mu bwati buu-namulito. Luhanga aatooniya mbula ekaniye maasi ghaatungeela kyalo kyona bantu aba boona baatwikilamu.*

28 "Kukuuka kuwe kukuba dheer nga hambele obu Looti aabaagha anaakaaye mu tauni ya Sodomu. Bantu baakalagha mbaliya, mbeesubulila, mbahela ndimo kandi mbekwelela manumba.

29 Bhaatu kilo kyonini eki Looti aalughiyemu mu tauni ya Sodomu, mulilo ghwamaan ghwalugha eghulu ghulimu mabaale ghatuumiye kimui, ghwahwelekeleliya bantu boona.

30 "Niikuwo biliba bitiyo dheer obu Mwana wa Muntu aliba naakuuka. Alikuuka bantu batamwetekanilije.

* 17:27 17:27 Ntandiko 7:6-24

³¹ T_i bwile obu muntu oghu aliba ali haa lusui lwa numba yee, atalis_unduka kutaaha mu numba kuuyamu kantu koono. Kandi oghu aliba ali haa musili atalikuuka e ka kwendelayo kantu koono.

³² Muusuke ngoku Luhanga aafubiiye mukaa Loot_i oghu haabwa kulola en_uma aasu_kiye bintu biye.*

³³ Weena oghu akukukut_ila bwom_il_i buwe, akubufeel_uwa. Bhaatu weena oghu akubuhaayo haabwanje akubutunga.

³⁴ Mbaghambiiye, t_i bwile obu, naaku_ukiye mukilo, bantu babili abaliba balangaaye bulili bumui, baamalaj_ka be balitwala omui mu eghulu, bat_igh'o omui.

³⁵ Naaku_ukiye ntangaal_i, obu bakal_i babili baliba mbasihila hamui bilimuwa, baamalaj_ka be balitwala omui mu eghulu, bat_igh'o omui.”

[
³⁶ “Kandi obu basaasa babili baliba mbakola hamui haa musili, baamalaj_ka be balitwala omui mu eghulu, bat_igh'o omui.”]*

³⁷ Niibuwo beeghesebuwa be aba baamu_bu_uiye bati, “Mukama waatu, ebi biliba haa?”

Aabakuukamu ati, “Hambali mu_ku ghuli, niiho b_inon_i ebikughuliyagha bikwekumaan_il_iyagha.”

18

Mukwisiya na mucu

* **17:32 17:32** Ntandiko 19:26 * **17:36 17:36** Lukaala luni taluli mu bihandiiko binji, bakalut_igha.

1 Yesu aatwila beeghesebuwa be lusimo kubegheesiya ngoku babhonganuuwe kuukala mbasaba Luhanga bwile bwona kandi kutahuwa maani.

2 Aabaghila ati, “Hakaba aliyo mucu oghu akaba aakaaye mu tauni emui, akaba atoobahiye Luhanga kedha bantu.

3 Na mukwisiya akaba aakaaye mu tauni eghi dhe. Mukwisiya oghu aakalagha naaghenda ewaa mucu oghu ati amukoonene kijibu kiye, naamughila ati, ‘Gutu, onkingilile ew’oghu ninyegheleeye.’

4 “Mucu oghu aamala bwile bukanije anabhengiye kukoonela mukwisiya oghu. Bhaatu haakumaliilila aaghila ati, ‘Noobu ndaba ntakwobaagha Luhanga kedha bantu,

5 haabwa mukwisiya oghu kuukala naasa kuntalibanija bwile bwona, nkumukolela eki akubala, ataliisa anjiyamu mulimu!’ ”

6 Niibuwo Mukama Yesu aaghijiye beeghesebuwa be ati, “Mwelilikan’o bhiani eki mucu mubhi oghu aabughiye eki.

7 Ti buuye Luhanga taakusaaliy’o kukoonela bantu aba aakomiyemu kandi abakumusabagha bwile bwona? Mukwelilikanana muti akumala bwile bukanije atakabakooneeye? Bbaa!

8 Muleke mbaghambile kini: bwile bwonini obu buliba mbwahikiye, Luhanga alibakoonela bwangu. Bhaatu Mwana wa Muntu obu alikuuka, buuye alisanga bantu banamuhikilije?”

Mufalisaayo na mukumaaniya wa musolo

⁹ Kilo kinji Yesu aatodha aatwila luşimo bantu abeeyetagha kuba bahikiliye kandi baghaya bantu banji.

¹⁰ Aaghila ati, “Basaasa babili bakaghenda mu Numba ya Luhanga kusaba. Omui akaba ali Mufalisaayo, onji ali mukumaaniya wa musolo.

¹¹ Mufalisaayo aamilila haakpengbu nga hali, aatandika kusabila haa mutima neepanka ati, ‘Nkukusiima Luhanga, nanga siye kutaba musisi nga bantu banji. Tandi na mululu kedha bughobiya kandi tandi musyani nga bantu banji. Nkukusiima nanga siye tandi musisi nga mukumaaniya wa musolo oghu.

¹² Mu wiji nkusibaghamu bilo bibili kandi nkuhaaghayo kimui kyekumi ky’ebi nkutungagha.’

¹³ Bhaatu mukumaaniya wa musolo aamilila haakpengbu nga hali, aselaan’o na Mufalisaayo oghu, eetulika kandi eekumbata.* Aasaba naaghila ati, ‘Luhanga nkwesengeleeje, gutu onganile siye musisi oghu asaalukaane.’ ”

¹⁴ “Mbaghambiiye majima, mukumaaniya wa musolo oghu niiye akaghenda ewe naabaluwa kuba ahikiliye, oli eye bbaa. Nanga weena munakwebhimba-bhimbija balimubhondiya kandi oghu akwebundaaliya balimuhutiya.”

*Yesu naaha baana mugisa
(Matayo 19:13-15; Maliko 10:13-16)*

* **18:13 18:13** Mu Lugiliki baghambije bati eekunanga haa kikubha. Mu ngeso ya Kiyudaaya kwekunanga haa kikubha kyolekagha kutuntula.

15 Bantu baaleetela Yesu baana baabo nkelembe bati abakum' o. Obu beeghesebuwa be baaboone babyaye baa baana aba mbabaleeta, baabatanuka.

16 Bhaatu Yesu aaghila ati baleete baana aba hambali ali, aaghila beeghesebuwa be ati, "Muleke baana aba banjis' o, mutabatanga. Nanga abali nga baana bani niibo baliba mu bulemj bwa Luhanga.

17 Mbaghambiiye majima, muntu weena ataasijimiye bulemj bwa Luhanga nga mwana, taakubutaahamu bbaa."

*Kibuuliyo eki musaasa muguudha aabuuiye
(Matayo 19:16-30; Maliko 10:17-31)*

18 Mulemji omui Muyudaaya, aabuuliya Yesu ati, "Mwegheesiya mulungi, nkole ki niikuwo ntunge bwomijili butahuw' o?"

19 Yesu aamukuukamu ati, "Wangiliyemu mulungi nangaaki? Taaliyo muntu mulungi n' omui, kuuy' o Luhanga enkaha.

20 Omanije bilaghilo bini: Otalisyana, otaliita, otaliibha, otalihabijilijiya muunakyawe, ohutiyaghe so waawe na njoko waawe."*

21 Musaasa oghu aakuukamu Yesu ati, "Ebi byona nkabikwata kulughijila mu bwana."

22 Obu Yesu aaghuuye musaasa oghu naabugha atiyo, aamughila ati, "Otighaaiye kukola kintu kinji kimui kyonkaha, oghende oghujiye bintu byawe byona, sente esikulughamu osihe banaku, wiise onkwame, olitungila buguudha mu eghulu."

* 18:20 18:20 Kulugha 20:12; Kyabilaghilo 5:16-20

23 Bhaatu obu musaasa oghu aaghūyē Yesu naabūgha atiyō, aasaaliluwa kimui nanga akaba atungīyē kimui.

24 Obu Yesu aaboone ngoku musaasa oghu asaaluwe, aakala amuloleleeye, aamughila ati, “Ngakitimbiikilaane kimui baguudha kuba mu būlemī bwa Luhanga!

25 Kidhooteeye kimui ngamila kusaalila mu kahulu kaa nkinjo kusaaliya muguudha kuba mu būlemī bwa Luhanga.”

26 Abaaghūyē naabūgha atiyō, baaghila bati, “Buuye, ni anī akugubha kujunuwa?”

27 Yesu aabakuukamu ati, “Eki bantu bataakugubha, Luhanga akukigubha.”

28 Niibuwo Peetelo aamughīyē ati, “Ebyatu byona tukabitīgha twakukwama.”

29 Yesu aabaghila ati, “Mbaghambīyē majima, muntu weena oghu akūtīgha ka yee, mukalī wee, baana baanīna wee, babyaye be, baana be, haabwa kugbatikanīya būlemī bwa Luhanga,

30 akumuha bintu bikaniyē kimui anali muni muni kusaaliya ebi aatīghīyē ebi, tī mu bwile buliisa atunge bwomīlī butahuw’o.”

*Yesu naatodha kūbūgh’o ngoku bakumwita
(Matayo 20:17-19; Maliko 10:32-34)*

31 Yesu aatwala beeghesebuwa be ekumī na babili haakpengbū, aabaghila ati, “Tulimakoma kughenda Yelusaalemu hambali ebi balangi baa-handīkīyē bati bikub’o Mwana wa Muntu bikumubeel’o.

32 Akuheebuwayo mu balem̄i batali Bayudaaya, abakumuwawaaniya, bamub-baakiisiye kandi bamutwile matanta.

33 Bakumuhuulila kimui kandi bamwite, bhaatu haa kilo kyakasatu ahumbũuke.”

34 Bhaatu beeghesebuwa be aba baasaaghuwa kwetegheeleliya ebi aabugh̄iye ebi. Bataakenga eki bikumaniisiya, nahabweki bataamanya eki Yesu aabugh̄agh’o kyonini.

Yesu naakiliya musaasa oghu maaso ghaaghaaye

(Matayo 20:29-34; Maliko 10:46-52)

35 Yesu naaneebinga taun̄i ya Yeliko, musaasa aaghaaye maaso akaba asitam̄iye haakpengbu ya luguudhe, naasaba-saba bantu.

36 Musaasa oghu akaba makaaghuwa kiigambi kya bantu nkisaala, aabuuliya abamuli haai ebikwete kulehukana.

37 Bamui mu bantu aba baamughila bati, “Yesu w’omu taun̄i ya Najaaleetī niye alimasaala.”

38 Dumb̄i musaasa oghu aatandika kugugangana ati, “Yesu! Muusukulu wa Dhaudh̄i! Gutu ongilile kisa!”

39 Bantu abaabaagha bahikiiye Yesu baatandika kutanga musaasa oghu bati aholiye. Bhaatu eeyongelela kimui kugugangana ati, “Muusukulu wa Dhaudh̄i, ongilile kisa!”

40 Yesu eemilila aaghila abaabaagha haai na musaasa oghu ati bamuleete hambali. Obu baamuleetiye, aamubuuliya ati,

41 “Okubbala nkukolele ki?” Musaasa oghu aamukuukamu ati, “Mukama, nkubbala mbone!”

42 Yesu aamughila ati, “Obone! Kuhikilija kwawe kwakukiliye.”

43 Dumbi musaasa oghu aabonel’o kandi aaghenda akweme Yesu, naanasindila kimui Luhanga. Ti bantu boona abaaboone ngoku musaasa oghu aakiliye, baasinda Luhanga.

19

Yesu na Jakaayo

1 Yesu naanaghenda mu kibugha kya Yelusaalemu, aakidha mu tauni Yeliko.

2 Mu tauni eghi hakaba haliyo mukulu wa bakumaaniya baa musolo, liina liye Jakaayo kandi akaba atungiye kimui.

3 Aabbalagha kubona Yesu, bhaatu haabwa kudjida, ataagubha haabwa bantu kukana.

4 Niibuwo aaligitiye mu maaso hambali Yesu akusaalila, aanjina mu kiti musikamooli niikuwo abone bhyani Yesu.

5 Obu Yesu aahikiye mu ntina ya kiti eki, aalola eghulu, aaghila ati, “Jakaayo, osunduke, obwalo nkulaghiluwa kuliila mwawe.”

6 Dumbi Jakaayo oghu aasunduka bwangu-bwangu, eebaliya Yesu adheedheeuwe.

7 Obu kibbula kya bantu abaabaagh’o baaghuuye Yesu naabugha atiyo kandi naatandika kughendayo, baatamuwa. Baaghila bati, “Alimaghenda mwa musiji nangaaki?”

8 Obu baanaliyagha, Jakaayo oghu aamilila, aaghila Mukama ati, “Mukama wanje, nkughenda kuha banaku kimui kyakabili kya etunga

lyanje. Nkaakuba ninaanaaghiye muntu weena, nkumuukukiliyamu milundi enaa.”*

⁹ Yesu aaghila ati, “Obwalo kujunuwa kwasiye mu numba muni. Nanga musaasa oni naye ni muusukulu wa Ebbulahimu.

¹⁰ Kandi Mwana wa Muntu akaasa muni kubbala kandi kujuna ababuliye.”

*Mukama na baheeleliya be ekumi
(Matayo 25:14-30)*

¹¹ Obu bantu abaaghendagha na Yesu e Yelusaalemu baali banategheleeiye ebi akwete kwegheesiya kandi bali haai kukidhayo, baatandika kwelilikana bati bulemi bwa Luhanga buli haai kub’o. Aatandika kubugha nabo mu lusimo.

¹² Aabaghila ati, “Musaasa bahujiye eeteekanijagha kubunga mu ehanga linji hambali baaghendagha kumujweka bukama, niikuwo akuuke ase aleme ehanga lyabo eli.

¹³ Atakaghendiyeye, aabilikila baheeleliya be ekumi, aaha buli omui mina emui.* Aabaghila ati, ‘Musubuliye sente esi kuhikiya nkuukiye.’ Dumbi aaghenda.

¹⁴ “Bantu b’omu ehanga liye eli bakaba bamwohiye, nahabweki baatuma bamui mu baabhootu syabo ewaa mulemi mukulu kumughila bati, ‘Tatubbaliye musaasa oghu kuba mukama waatu.’

* 19:8 19:8 Kulugha 22:1-9

* 19:13 19:13 Mina ni sente baakoleesiyagha bwile obu. Emui ekaba yengaane na musaala ghwa muntu ghwa meeli asatu.

15 “Bhaatu mulemi mukulu aanaha musaasa oghu bukama bw’ehanga eli. Obu musaasa oghu aakuukiye, makakidha ati, aabilikila baheeleliya be aba aatighiye sente kwisa hambali ali, ni-ikuwo amanye esi baaghobiye.

16 “Obu aakidhiye, w’okudubha aasa, aaghila ati, ‘Mukama wanje, mina wantighiye yaghobiye milundi ekumi.’

17 “Mukama wee oghu aamughila ati, ‘Wee-bale, muheeleliya mulungi! Nanga waabaaye mwesighibuwa mu bikee, okuba mulemi wa tauni ekumi.’

18 “Waakabili aasa, aaghila ati, ‘Mukama wanje, mina wantighiye yaghobiye milundi etaano.’

19 “Mukama wee aamughila ati, ‘Okuba mulemi wa tauni etaano.’

20 “Niibuwo muheeleliya onji naye aasiye, aaghila ati, ‘Mukama wanje, mina wantighiye ngini. Nkaghiboha mu katambaala, naaghibiika.

21 Nkakwobaha nanga otimbiikaane kandi okubbalagha maghobo gh’ebi otakoliye kandi okesa ebi otaaheliye.’

22 “Mukama wee aamughila ati, ‘Oli muheeleliya mubhi! Nkukutwila musango kusighikila mu ebi waabughiyeye. Okamanya ngoku ntimbiikaane, nkubbalagha maghobo gh’ebi ntakoliye kandi nkesa ebi ntaaheliye.

23 Nkiki kyalekiye sente syanje esi, otaasiha abakusisuubuliyagha, niikuwo makuuka nsanga sighobiye?’

24 “Niibuwo mukama oghu aaghiliye baheeleliya be ati, ‘Mumuuy’o mina eghi, mughihe oghu ali na mina ekumi.’

25 “Baamughila bati, ‘Mukama, eye asanguuwe ali na mina ekumi!’

26 “Aabakuukamu ati, ‘Mbaghambiiye, oghu ali na kantu niiye akwongeluw’o, bhaatu oghu atali na kantu, n’aka ali nako kakumuuhubuwo.’

27 Bhaatu ngighu syanje syona, abambhengiye kuba mukama wabo, mubaleete hani kandi mubaate ninabaloliye.’ ”

Yesu naataaha mu Yelusaalemu nga mukama (Matayo 21:1-11; Maliko 11:1-11; Yohaana 12:12-19)

28 Obu Yesu aamaliye kubugha ebi, aabahikila aakoma kughenda Yelusaalemu.

29 Aakidha haai na mubhili ghwa Bbetaniya na ghwa Bbetifaage haa mwena Oliya. Niibuwo aatumiyiye babili mu beeghesebuwa be,

30 naaghila ati, “Mughende mu mubhili oghu tuli haai kukidhamu oghu mukuba makaghukidhamu, mukusanga kyana kya ndogooji eki muntu atakanijiy’o, mukisambuule mukindeetele.

31 Ti muntu naababuuyiye ati, ‘Mukukisambuula nangaaki?’ Mumughile muti, ‘Mukama waatu akukibbala.’ ”

32 Niibuwo beeghesebuwa babili aba baaghendiyiye mu mubhili oghu, baasanga kyana kya ndogooji ngoku Yesu aabaghambiiye.

33 Mbanakisambuula, bakama baakiyo baababona, baasa baabuuliya beeghesebuwa

aba bati, “Mukwete kusambuula kyana kya ndogooi eki nangaaki?”

³⁴ Beeghesebuwa aba baabakuukamu bati, “Mukama waatu akukibbala.”

³⁵ Obu baakikidhiye hambali Yesu ali, baala bimui haa biluwalo byabo haa mughongo gh-wakiyo, baamuniniyo.

³⁶ Yesu anasitamiye haa kyana kya ndogooi eki naanebinga Yelusaalemu, bantu baala bimui haa biluwalo byabo mu luguudhe hansi niikuwo kilubhatangilo.†

³⁷ Naanahona kulugha haa mwena Oliva, ali haai kukidha Yelusaalemu. Niibuwo kiigambi kyamaani kya beeghesebuwa be baatandikiye kugolela kimui mbasinda Luhanga badheed-heewe haabwa byakuswekaniya byona ebi baabone Yesu naakola.

³⁸ Baagolagha mbaghila bati, “Ali na mugisa mukama oni oghu aasiye mu lijina lya Mukama!”*

Endindi hab’o mpempa yonkaha mu eghulu, kitijisa kibe ewaa Mukama wa eghulu munu!”

³⁹ Niibuwo bamui mu Bafalisaayo abaabaagha mu kibbula kya bantu eki, baaghiliye Yesu bati, “Otanuke beeghesebuwa baawe baholiye.”

⁴⁰ Bhaatu Yesu aabakuukamu ati, “Mbagham-biye, mbaanaholeeje, mabaale agha ghakutandika kugola.”

Kifubilo ekilib’o Yelusaalemu

† 19:36 19:36 Bayudaaya niikuwo beebaliyagha batiyo bantu aba bahutiye. * 19:38 19:38 Jabbuli 118:26

⁴¹ Obu Yesu aahikiye haai-haai na kibugha kya Yelusaalemu naakilangiya, maligha ghamutoona haabwa kibugha eki na bantu baamu. Aaghila ati,

⁴² “Nguli obwalo waabaagha omaniye ekukuleetela mpempa! Bhaatu tookiboone bbaa.

⁴³ Nanga bwile bukwise obu ngighu syawe, bakukwelighiiliya, bakwegimbe, babalwaniisiye, ti tamukubona butwelo.

⁴⁴ Bakuhwelekeeleliya kibugha kyanu kini kandi babatwile kimui enuwe boona. Taaliyo numba n'emui eghi ekuti ghala y'emiliye bbaa. Mukutwika mutiyo nanga mwabhengiye oghu Luhanga aatumije kubajuna.”

Yesu naabbinga bantu mu Numba ya Luhanga (Matayo 21:12-17; Maliko 11:15-19; Yohaana 2:13-22)

⁴⁵ Yesu aakidha mu kibugha kya Yelusaalemu. Haanuma ya bwile, aaghenda mu emui haa bbalaaji sya Numba ya Luhanga. Aatandika kubhinga boona abaaghuliliyaghamu bintu.

⁴⁶ Aabaghila ati, “Kihandiikuuwe ngu, ‘Numba yanje elabaagha numba ya kusabilamu,’* bhaatu enuwe mwaghifooye kikalalo kya basuma.”

⁴⁷ Kutandikila bwile obu, Yesu aatandika kughenda buli kilo mu Numba ya Luhanga kwegheesiya bantu. Niibuwo bakulu baa bahongi, beegheesiya baa bilaghilo, hamui na bengei baa Bayudaaya baatandikiye kwelilikana mulingo bakukwata Yesu niikuwo bamwite.

* **19:46 19:46** Isaaya 56:7

48 Bhaatu baabuluwa kahanda kaakumwiti-
amu, nanga bantu boona baakalagha hambali
Yesu ali kandi ebi eegheesiyagha bibadheedhe-
eye kimui.

20

Kibuuliyo haa butoki bwa Yesu
(Matayo 21:23-27; Maliko 11:27-33)

¹ Kilo kimui, obu Yesu eegheesiyagha mu
bbalaaji ya Numba ya Luhanga kandi naate-
beja Makulu Ghasemeeye, bakulu baa ba-
hong, beegheesiya baa bilaghilo, na bengej baa
Bayudaaya baamwis'o.

² Baamubuuliya bati, "Otughambile butoki oli
na buwo kukola ebi byona kandi butoki obu ni
ani aakuhaaye buwo?"

³ Yesu aabakuukamu ati, "Ndimababuuliya
kibuuliyo kimui, nkubbala mukinkuukemu.

⁴ Yohaana Mubatiji akaaya haa butoki bwa
kubatija? Bukalugha mu eghulu kedha mu
bantu?"

⁵ Niibuwo baatandikiye kubuulaniya bati, "Tu-
mukuukemu tutiya? Ntwamukuukiyemu tuti
Luhanga niye akamuha buwo, akutughila ati, "Ti
ekyalekiye mutaahikilija Yohaana oghu nkiki?"

⁶ Kandi ntwaghiliye tuti bantu niibo baa-
muhaaye buwo, bantu bani bakutusaalililuwa
kandi batuhuule mabaale batwite, nanga bantu
bakaniye kimui bamanije ngoku Yohaana Mu-
batiji aabaagha mulangi kwonini."

⁷ Niibuwo baamukuukiyemu bati, "Tatu-
manije hambali bwalughiye."

8 Yesu naye aabaghila ati, “Kwesijini nanje tankubaghambila oghu ampaaye butoki bwa kukola ebi nkwete kukola.”

*Lusimo haa bapankiisiya
(Matayo 21:33-46; Maliko 12:1-12)*

9 Yesu aatwila bantu boona abaabaagh'o lusimo ati, “Hakaba aliyo musaasa aahela musili ghuwe ghwa bighuma mijaabbjibbu, aaghutighila bakoli be, eye aaghenda mu ehanga linji hambali haseliye kumalayo bwile bukanije.

10 Obu bwile bwa kukobha bighuma ebi bwahikiye aatuma omui mu baheeleliya be aba ati bapangiisiya aba bamuhe haa bighuma by'omu musili ghuwe oghu. Bhaatu bapangiisiya aba baahuula oghu aatumije oghu kandi baamubhinga magila kantu.

11 Mukama wa musili oghu aatodha aatuma onji, n'oghu bapangiisiya aba baamuhuula kandi baamuwaawaaniliya kimui, naye baamubhinga magila kantu.

12 Aatodha, aatuma waakasatu, dhelu oghu eye baamuhuulila kimui baamwatiya lubaale kandi baamubhinga mu musili oghu.

13 “Niibuwo mukama wa musili oghu eebuuiye ati, ‘Nkole ki?’ Nahabweki eelilikana ati, ‘Eki nkukola, nkutumayo mutabani wanje oghu nkundiiye kimui, kedha oghu eye bakumuhutiya!’ Aamutuma, aaghendayo.

14 “Bhaatu obu bapangiisiya aba baamuboone, baahanuula kya kukola, baaghila bati, ‘Oghu niye bakwisa kugweta musili ghuni, nahabweki muleke tumwite niikuwo tughutwalile kimui!’

15 Baamughwilikiilila na kikubha, baamutwesiya mu musili oghu, baamwita." Niibuwo Yesu aabuuye ati, "Mabhuule mukama wa musili oghu alikola atiya bapangiisiya aba?"

16 "Alihika alaghile ati baate bapangiisiya babhi aba boona kandi musili oghu aghukwatiye bantu banji." Obu bantu abaabaagh'o baaghuyeye Yesu naabugha atiyo, baaghila bati, "Tukijhwile hala!"

17 Yesu aabalola tonono, aababuuliya ati, "Buuye kitaabaaye kitiyo, Ebyahandjikuuwe bikumanisiyagha ki obu bikughilagha biti, "Ebaale eli bakweli baabhengiye, niiliyo lyahaghikiye numba kusaaliya ghanji ghoona?*"

18 Weena oghu alyegengela ebaale eli alitwika-twika kandi oghu ebaale eli lilyegengela alikpee-taaguka."

19 Bakulu baa bahongi na beegheesiya baa bilaghilo baamanya ngoku haaliibo Yesu aatwiliya lusimo olu. Baabbala kumukwata bwile obu bwonini. Bhaatu boobaha bantu abaabaagh'o.

Kibuuliyo kya kwohiya Yesu

(Matayo 22:15-22; Maliko 12:13-17)

20 Bantu aba baakala mbanabbala kahanda kaa kumukwatilamu. Baamutum'o bantu kumwohiya abeefoolagha kuba balungi kuni ni ngighu siye. Bantu aba baabbalagha bati Yesu abughe kintu kibhijhiye niikuwo bamun-yegheelele bati aatuuye bilaghilo bya bulemi bwa Balooma.

* 20:17 20:17 Jabbuli 118:22

21 Nahabweki abamwohiyagha aba baaghenda, baabuuliya Yesu bati, “Mwegheesiya, tumaniye ngoku okubughagha majima ghonkaha, okwegheesiyagha ebihikiye. Bantu boona okubengana-nganiyagha kandi okwegheesiyagha majima ghoonini gh’ebi Luhanga akubbalagha ati bantu bakole.

22 Otughambile buuye kihikiye kusighikila mu bilaghilo etuwe Bayudaaya kuha musolo ghwa Mukama wa Looma kedha bbaa?”

23 Yesu aamanya ngoku bakubbala kumwohiya, aabaghila ati,

24 “Munjoleke mukwenge oghu mukuhaaghamu musolo.” Baamuhaaghuwo, niibuwo aababuuiye ati, “Kisangani na liina ebili haa mukwenge ghuni ni byani?” Baamukuukamu bati, “Ni bya Kaisaali.”

25 Aabaghila ati, “Kwesijini ebya Kaisaali mubihe Kaisaali n’ebya Luhanga mubihe Luhanga.”

26 Bantu aba baasaaghuwa kwohiya Yesu kubugha kintu kibhijhiye mu maaso ghaa bantu boona. Kyakutodha kubugha kyababula, nanga bakaba banaswekiye haabwa eki aabakuukuyemu.

Kuhumbuka

(*Matayo 22:23-33; Maliko 12:18-27*)

27 Bamui mu Basadukaayo abaaghilagha bati bantu tabalihumbuka, baasa baabuuliya Yesu bati,

28 “Mwegheesiya, Musa akahandiika mu bilaghilo ati musaasa naasweye mukali, ti musaasa oghu akuwa atabyay’o mukali oghu

mwana, mwana waanina musaasa oghu aswela mukwisiya oghu niikuwo abyalile mwana waanina wee oghu baana.

²⁹ Hakaba aliyo banaanina emui musanju. Mukulu wabo aaswela mukali, bhaatu aakuwa atamubyay'o mwana.

³⁰ Oghu amulabhiye aaswela mukwisiya oghu, bhaatu naye aakuwa atamubyay'o mwana.

³¹ Mwana waaninabo waakasatu naye aaswela mukwisiya oghu, naye aakuwa dhe. Banaanina emui musanju aba boona baakuwa batabyay'o mukali oghu mwana.

³² Haakumaliilila mukali oghu naye aakuwa.

³³ Buuye obu Luhanga alihumbuula bantu boona, mukali oghu aliba mukaa ani? Nanga boona musanju bakamuswel'o."

³⁴ Yesu aabakuukamu ati, "Bantu abali muni muni bo bakuswelagha kandi basweluwa.

³⁵ Bhaatu aba Luhanga abbaliye kuhumbuula kandi kuukala nabo muni ya bahikiliye boona, tabaliswela kedha kusweluwa bbaa.

³⁶ Baliba nga Baamalajika abatalikuwa. Baliba baana baa Luhanga haabwa kubahumbuula.

³⁷ Kandi tukugubha kumanya ngu bakuuye balihumbuuka, nanga Musa hambele obu aaboone kiti nkyakamu mulilo, aakigumiya ati Mukama ni Luhanga wa Ebbulahimu, Luhanga wa Isaka kandi Luhanga wa Yakobbo.*

³⁸ Eki kikumanisiya ngu noobu balaba mbaakuuye hambele, banaakulamiyagha Luhanga, nanga ewaa Luhanga bantu be boona baakaaye."

* 20:37 20:37 Kuluḡha 3:6

39 Bamui mu beegheesiya baa bilaghilo batali Basadukaayo, baaghila Yesu bati, “Mwegheesiya, waakuukiyemu kusemeeye!”

40 Bwile obu taaliyo muntu n’omui oghu aka-todha aaleng’o kumubuuliya kibuuliyo kyona.

Kibuuliyo haa Kilisito

(Matayo 22:41-46; Maliko 12:35-37)

41 Yesu aabuuliya bantu abaabaagha bamutegheleeiye ati, “Beegheesiya baa bilaghilo bakwegheesiya bati Kilisito ni muusukulu wa Dhaudhi nangaaki?”

42 Kuni mu kitabo kya Jabbuli Dhaudhi eenini akaghila ati,

“ Mukama aaghila Mukama ati,

“Ositame haa luhande lwa mukono ghwanje ghwabuliyo

43 kuhikiya obu ndifoola ngighu syawe

katebe kaa bighele byawe.” *

44 Buuye Dhaudhi eenini obu alaba naaghiliye ati Kilisito ni Mukama wee. Mukama oghu akugubha atiya kuba muusukulu wee?”

Kwelinda beegheesiya baa bilaghilo

(Matayo 23:1-36; Maliko 12:38-40)

45 Obu kibbula kya bantu aba boona baabaagha banategheleeiye Yesu, aaghila beeghesebuwa be ati,

46 “Mwelinde beegheesiya baa bilaghilo, bakubungagha baluwete biigandulo bijambiye kwoleka ngoku bahikiliye. Ti mbaaba bali mu butale, babbala bantu babalamukiye

* 20:43 20:43 Jabbuli 110:1

babahutiye. Mu malamiliyo n'omu maghenu, babbala kusitama mu ntebe sya bitinisa.

⁴⁷ Bakulombaagagh'o bakwisiya etungo lyabo, beetwalila manumba ghaabo kandi beesabisiya nsaala sijambiye kwesemeliya mu bantu. Bo balitunga kifubilo kyamaani."

21

Kisembo eki mukwisiya aahaaye (Maliko 12:41-44)

¹ Obu Yesu aabaagha anali mu Numba ya Luhanga, aakala aloliye ngoku baguudha bakwete kuta sente sikaniye mu eki baataaghamu bisembo.

² Aabona na mukali mukwisiya munaku naasa, naatamu bukwenge bubili.

³ Niibuwo aaghiliye bantu abaabaaghamu ati, "Mbaghambiiye majima, mukwisiya munaku oghu aataayemu kusaaliya bantu boona.

⁴ Nanga banji boona baataayemu ebibasaaghiliye. Bhaatu eye mu bunaku buwe, aataayemu koono aka aabaagha nako. Taatighaaiye kantu koono kaa kumulinda!"

Kubona-bona okulib'o (Matayo 24:1-14; Maliko 13:1-13)

⁵ Bamui mu beeghesebuwa baa Yesu baatandika kusinda Numba ya Luhanga ngoku baaghikweye mabaale ghasemeeye haabwa bisembo bantu baahongelagha Luhanga. Niibuwo aabaghiliye ati,

⁶ "Muboone Numba ya Luhanga esemeeye eghi, bwile bulihika obu balighiseesa

yoona kandi taaliyo ebaale na limui elijitighala haaguuli ya liinakyaliyo!”

7 Niibuwo bamui mu beeghesebuwa be aba baamubuuye bati, “Mwegheesiya otughambile, manumba agha balighaseesa dhi? Kandi nkaakulolel’o ki kalidubha kub’o kwoleka ngu bali haai kughaseesa?”

8 Aabakuukamu ati, “Mwelinde kandi mutalisiima muntu n’omui kubahabisiya. Nanga bantu bakanije baliisa buli omui neeghilamu ati, ‘Niisiye Kilisito.’ Kandi balighila bati, ‘Mpelo eli haai kuhika!’ Nahabweki mutalisiima ebi bakwete kubugha.

9 Ti noobu muliighuwa makulu ghaa bulemo kedha butabanguko, mutalyobaha. Ebi niibiyo bilidubha kub’o. Bhaatu mpelo yoonini eliba etakahikiye.”

10 Aatodha aabaghila ati, “Mahanga ghalilwana na mahanga ghaanakyagh’o, na makama ghalilwana na makama ghaanakyagh’o.

11 Misiki elidhingiya mu bikikalo bikaniye. Njala yamaani elighwila bantu mu bikikalo bikaniye. Halib’o ndwala sihingulaane. Kandi bwakulolel’o bwamaani obulileka bantu boobahe buliboneka mu mwanya.

12 “Bhaatu kubona-bona oku kutakabaay’o, bantu balibakwata kandi bababona-bonije. Bamui mu enuwe balibatwala na kikubha mu kooti sy’omu malamiliyo ghaa Bayudaaya kandi babbate mu nkomo. Bamui mu enuwe balibatwala kubatongiya mu bakama baa buli mulingo haabwanje.

13 Oghuuni ghuliba ghuli mugisa ghwanu kuba nimumpeela buukaiso.

14 Ti bwile obu munesighe kandi bya kubugha bitalibatuntulija.

15 Nanga bwile obu niisiye ndibaha magheji na bintu ebihikiye kubugha, niikuwo atab’o muntu n’omui mu ngighu syanu oghu aligubha kubasingiisiya musango ati mwahaaye bisubha.

16 Bamui mu enuwe abalibahayo mu ngighu syanu kubakwata ni babyaye baanu, baana baa ninaanuwe, nganda syanu na baabhootu syanu kandi baliita bamui mu enuwe.

17 Bantu boona balyoha enuwe haabwanje.

18 Ti noobu balibaata tabaligubha kuhwelekeeleliya myoyo yaanu bbaa, nanga Luhanga aghilindiye kusemeeye.

19 Bhaatu oghu aliikala anagumisiijije, alijuna bwomijili buwe.”

*Ngoku Yelusaalemu elihwelekeelela
(Matayo 24:15-21; Maliko 13:14-19)*

20 Yesu aatodha aaghila beeghesebuwa be aba ati, “Obu mulibona baasilikale beelighiliiye kibugha kya Yelusaalemu, mumanye ngoku bali haai kukihwelekeeleliya.

21 Ti bwile obu bamui mu enuwe abaliba banali mu Buyudaaya baalukile bwangu mu myena. Abaliba banali mu kibugha kya Yelusaalemu eki bakilughemu bwangu kandi abaliba batakilimu bwile obu, batalileng’o kukikuukamu.

22 Naabaghambiiye eki nanga bwile obu ni-ibuwo Luhanga alifubila ngighu siye haabwa

kumujeemela. Kifubilo eki kiliisuliisiya byona ebi balangi baahandiikiye hambele mu Byahandiikuwe.*

²³ Ti bwile obu bakali bakuliye n'abakwonkiya baana ngabalikibona! Na Bantu boona abali mu kibugha kya Yelusaalemu balibona-bonela kimui, nanga Luhanga aliba asaaliluwe kimui kandi naafubila Bayudaaya.

²⁴ Baasilikale aba balilwana kandi baate Bayudaaya bakanje na bihiyo. Balitwala bakanje mu mahanga bali banyankomo. Bantu baa mahanga agha balibona-boneliya kimui bantu abali mu Yelusaalemu, kuhikiya Luhanga eenini aahjyo bataali Bayudaaya butoki obu."

*Ebilyoleka kukuuka kwa Yesu
(Matayo 24:29-35; Maliko 13:24-31)*

²⁵ Yesu aatodha aabaghila ati, "Bwakulolel'o bwamaanj buliboneka haa musana, kweli, na nsooliya. Bintu ebi bilyoleka ngu kintu kya-maanj kili haai kub'o. Bantu abali mumsi yoona balyobaha kandi batuntulile kimui, ti balibuluwa kya kukola nanga maanja ghoona ghaliba ghasuliye kimui, ngagolela kimui na mighina yagho neesamba bisiyu.

²⁶ Bantu balyobahila kimui na banji balekeele haabwa kubona ngoku bintu bya kabhi kaamaanj bikwete kulehukana mumsi. Nanga buli kintu kyona ekili eghulu mu mwanya kilidhinga-dhinga.

* 21:22 21:22 Hoseya 9:7

27 Niibuwo bantu boona balibona Mwana wa Muntu naasila mu kicu na butoki kandi kitinisa kyamaani.

28 Ti beeghesebuwa banje balikabona bintu ebi mbyatandika kub’o, bagumile mu kuhikilija kwabo kandi badheedheluwe kimui banaloliye eghulu, balindiliye ekikub’o. Nanga bintu ebi biliba mbyoleka ngoku Luhanga ali haai kuba-cungula.”

29 Kubooleka ebilib’o, Yesu aatodha aabaha lusimo ati, “Mwelilikan’o muyembe* hamui na biti binji byona.

30 Bikaakwanagha, bighuma mbyalulumana, mumanya ngoku bili haai kwela.

31 Niikiyo kimui dhe, obu mulibona bintu ebi naabaghambiiye ebi mbyatandika kub’o, mumanye ngoku bulemi bwa Luhanga bubali haai-haai.

32 “Mbaghambiiye majima, kubona-bona naaghambiiye oku kwona kulib’o bamui mu bantu abaliyo endindi banaakaaye.

33 Nsi na eghulu bilihuw’o, bhaatu bighambo byanje tabiluhuw’o.

34 “Mwelinde, mu mitima yaanu mutatwalijibuwa bughuwa-ghuwa, tamiilo, na kwelalikiilila bintu by’ensi eni, niikuwo kilo eki kitabakwata nga kikiya.

35 Nanga kilo eki kihik’o bantu boona abali mumsi yoona.

36 Muukalaghe mwelindiye bwile bwona, nimusaba kutunga maani ghaa kuuluka bintu

* 21:29 21:29 Bbajbuli sinji sighambiiye mutiini.

ebi byona ebikughenda kub’o kandi mugubhe kwemilila mu maaso ghaa Mwana wa Muntu.”

³⁷ Yesu aaghendagha buli kilo mu bbalaaji ya Numba ya Luhanga kwegheesiya. Ti buli lwaghola alugha mu kibugha kya Yelusaalemu aghenda alaala haa mwena Oliva.

³⁸ Bantu bakaniye kimui b’omu kibugha eki baakelelagma buli kilo mu bbalaaji ya Numba ya Luhanga kutegheeleliya ngoku Yesu akwete kwegheesiya.

22

Bayudaaya mbahanuula kwita Yesu

(Matayo 26:1-5; Maliko 14:1-2; Yohaana 11:45-

53)

¹ Bwile bwa Kighenu kya Migaati Etalimu Kitumbiso, na Kighenu kya Kuusuka Kusaaluw’o, bukaba buli haai kuhika.

² Bakulu baa bahongi na beegheesiya baa bilaghilo baanabbalagma mulingo ghwakwitilamu Yesu mu kibiso haabwa kwobaha bantu.

Yuda Esikalyota naasiima kuhobeliya Yesu

(Matayo 26:14-25; Maliko 14:10-21)

³ Bwile obu bwonini Sitaani aatandika kukoleesiya Yuda Esikalyota omui mu beeghesebuwa baa Yesu ekumi na babili.

⁴ Aaghenda mu bakulu baa bahongi hamui na bakulu baa baasilikale abaalindagma Numba ya Luhanga. Aahanuula nabo mulingo oghu akugubha kubakoonelelamu kukwata Yesu. ⁵ Obu baaghuuye ebi Yuda oghu akwete kubugha, baadheedhuwa kandi

baamulaghiisan_iya kumusasula sente haabwa mulimo oghu.

⁶ Yu_da oghu aasi_ima sente esi baamulaghiisan_iye esi, dumb_i bwile obu bwonini aatandikil' o kubbala kahanda kaa kuhaayo Yesu mu bantu aba mu kib_iso.

⁷ Kilo kya Kighen_u kya Migaati_i Etalimu Kitumb_iso kandi eki baasalilaghamu kyana kya ntaama kya Kighen_u kya Kuusuka Kusaaluw' o kyah_ika.

⁸ Yesu aatuma Peetelo na Yohaana naaghila ati, "Mughende mu kibugha kya Yelusaalemu mututeekan_il_ije k_ikalo hamui na kiihulo kya Kighen_u kya Kuusuka Kusaaluw' o eki etuwe boona tukuliila hamui."

⁹ Baamub_uul_iya bati, "Okubbala tukuteekan_il_iye kiyo haa?"

¹⁰ Aabaghila ati, "Mukuba makak_idha muti mu kibugha kya Yelusaalemu, mukusanga musaasa eetw_ikiye munagha ghwa maasi. Mumukwame kuh_ikiya muk_idhiye mu numba hambali akughenda.

¹¹ Dumb_i mughile mukama wayo muti, 'Mwegheesiya aatut_umiye kukub_uul_iya tuti: Kisiika kili haa, hambali eye hamui na beeghesebuwa be bakuliila kiihulo kya Kighen_u kya Kuusuka Kusaaluw' o?'

¹² Akubooleka kisiika kiinamul_ito kya kajina yaakabili, bakiteekan_il_ije kandi kilimu bul_i kantu. Haaliimuwo mwatuteekan_il_ija kiihulo eki."

¹³ Beeghesebuwa aba baaghenda, baasanga bintu bili kwonini ngoku Yesu aabaghambiiye.

Baateekanija kiihulo kya Kighenu kya Kuusuka Kusaaluw’o.

Kiihulo kya Mukama

(Matayo 26:26-35; Maliko 14:22-31; 1 Bakolinto 11:23-25)

¹⁴ Obu bwahikiye lwagholo, Yesu na bakwenda be baaghenda kuliya.

¹⁵ Mbanaliya, aabaghila ati, “Neeghombeeye kimui kuliya naanu kiihulo kya Kighenu kya Kuusuka Kusaaluw’o kini ntakaboona-boone.

¹⁶ Mbaghambiiye majima tankutodha kuliya naanu kiihulo kini kuhikiya obu tulikiliila hamui mu bulemi bwa Luhanga.”

¹⁷ Niibuwo aakwete kiikopo kya vijini, aasaba naasiima Luhanga, aabaha kiyo, naaghila ati, “Enuwe boona munuw’o.

¹⁸ Mbaghambiiye, tankutodha kunuwa vijini kuhikiya obu nditodha kughinuwa bulemi bwa Luhanga mbwasieye.”

¹⁹ Niibuwo aakwete mugaati, aasaba naasiima Luhanga, aaghubhegha, aaghuha beeghesebuwa be, naaghila ati, “Ghuni ni mubili ghwanje, oghukuheebwayo haabwanu. Kini mukikolaghe kunjisuka.”

²⁰ Niikiyo kimui dhe, obu baamaliye kuliya mugaati oghu, aatodha aakwata kiikopo kya vijini, aaghila ati, “Kiikopo kini ni ndaghaano mpyaka ya saghama yanje eghi ekuseesuwa haabwanu.”

²¹ Niibuwo aatodhiye aaghila ati, “Dhaani muntegheeleliye! Oghu akungobeliya niibuwo twaliya naye endindi!

22 Eye Mwana wa Muntu akukuwa ngoku kyateekanijibuwe, bhaatu oghu akumughobeliya ngalikibona!”

23 Beeghesebuwa baa Yesu aba, baatandika kubuulaniya mbabbala kumanya oghu akubbala kukola kintu eki.

Kubbala bukulu

24 Beeghesebuwa baa Yesu baatandika kuhakangana bonkaha-na-bonkaha, mbabbala kumanya oghu akubabaamu mukulu.

25 Niibuwo aabaghiliye ati, “Bakama baa batali Bayudaaya, bakulemagma bantu baabo na kikubha kandi na balem i abali na butoki bakweghilaghamu bantu baa bantu.

26 Bhaatu enuwe mutaba mutiyo, oghu akubbala kubabaamu mukulu, abhonganuuwe kudhoota, abe nga muto waanu kandi muheeleliya waanu.

27 Dhaani oghu bakuhutiya gha ni ani? Oghu akusembejagha biliyo kedha oghu bakubisembejagha? Majima oghu bahutiye ni oghu bakubisembejagha. Bhaatu niisiye mbalimu nga musembeja waanu.

28 Enuwe mwakaaye nanje mu kulengeesebuwa kwanje.

29 Nahabweki ngoku Tita ampaaye butoki bwa kufooka mulemi, nanje dhe ndibafoola balem i.

30 Nkukola eki niikuwo tuliilaghe hamui mu bulemi bwanje, tulemele hamui bilo n'ebilo kandi buji omui asitame haa ntebe ya bukama mu ntebe ekumi n'ebili nimutwila musango ntula ekumi n'ebili sya Isaaleeli.”

31 Yesu aaghila ati, “Simooni, Simooni, ontegeheleliye! Sitaani aasabiye Luhanga kumušimilaniya kubalengesa enuwe boona niikuwo muleke kumpikilija.*

32 Bhaatu naabasabiye kukila munu uwe Simooni nti otaleka kumpikilija, nanga bwile bukuhika okukuukilila, bhaatu haanuma ya kuhikilija kwawe oku kutodha kuguma, weekambiisiye baanakyawe kutodha kuba na kuhikilija kugumiye.”

33 Peetelo aamughila ati, “Mukama wanje, neeteekaniije kughenda mu nkomo kandi kukuwa hamui naawe.”

34 Yesu aamughila ati, “Peetelo, obwalo mukilo nkoko atakakookiye okuba nuwaaneehighaane kasatu oti toomaniye.”

35 Niibuwo Yesu aabuiiye beeghesebuwa be aba ati, “Obu naabatumiye kutebeja mutali na sente, bikapa, kedha nkaito, buuye haliyo eki mwetaaghisibuwe?”

Baamukuukamu bati, “Bbaa.”

36 Aatodha aabaghila ati, “Bhaatu endindi bintu byahindukiye. Oghu ali na sente aghende nasiyo, n’oghu ali na kikapa eki akubungagha nakiyo akitwale dhe. Oghu atali na kihiyo aghuliye kooti yee, sente esikulughamu asighulemu kihiyo.

37 Eki naabaghambiiye eki mukikole nanga ndimabaghambila kini nti: Ebi Ebyahandiikuwe hambele bimbughiy’o bikulaghiluwa kumb’o. Mu Ebyahandiikuwe

* 22:31 22:31 Mu Lugiliki baghambiiye bati, Sitaani aasabiye kubeeha nga ngano.

haliyo hambali biḡhīliye bitī, ‘Bakamubalila mu nkolī sya bibhi.’* Kandi ebyampandiikuw’o bili haai kuhikiila.”

³⁸ Baamughila bati, “Mukama waatu olole, hani tuliyo na bihiyo bibili.” Yesu aabaghila ati, “Ebi bimaliye.”

*Yesu naasabila haa mwena Olīva
(Matayo 26:36-46; Maliko 14:32-42)*

³⁹ Yesu aatuwa, aaghenda haa mwena Olīva ngoku aakakolagha, na beeghesebuwa be baamukwama.

⁴⁰ Obu baakidhiyeyo, aabaghila ati, “Musabe niikuwo kwohebuwa kutabasingula.”

⁴¹ Dumbi aabalugh’o, eesukan’o kabhii haakpengbu, aateeliya, aasaba naaghila ati,

⁴² “Tita, nuwaabaaye osijimiye otaleka nimbona-bona ntiyo, bhaatu kitaba ngoku siye mbaliye, kibe ngoku obbaliye.” [

⁴³ Niibuwo omui mu baamalajika aalughīye mu eghulu, aamugumīya.

⁴⁴ Yesu aasabila kimui nanga akaba eehighuuye bujune na kutuntula kwamaani. Ti kiseleleliyo kisusiye saghama kyatandika kumuhulikanga nkinatoona hansī.]†

⁴⁵ Obu aamaliye kusaba, aamuka aakuuka hambali beeghesebuwa be bali. Aabasanga baghwesaghiye haabwa kutuntula kukanīye okwabamaliye maani, kyaleka baaghwesaghila.

* 22:37 22:37 Isaaya 53:12 † 22:44 22:43-44 Nkaala sini tasili mu bihandiiko binji, bakasitigha.

46 Aahika aabasusumula, aabaghila ati, “Mughwesaghiiye nangaaki? Muumuke musabe nikuwo kwohebuwa kutabasingula.”

Mbakwata Yesu

(*Matayo 26:47-56; Maliko 14:43-50; Yohaana 18:3-11*)

47 Atakahendekkeeje kubugha, Yuda omui mu beeghesebuwa be ekumi na babili aasa ahikiye kiigambi kya bantu. Aahika eebinga Yesu, aamughuwa mu kikubha.

48 Yesu aamughila ati, “Yuda, olimaghobeliya Mwana wa Muntu noomughuwa mu kikubha?”

49 Obu beeghesebuwa baa Yesu baaboone ebilimaghenda kub’o, baamughila bati, “Mukama, tuli hani na bihiyo, buuye tulwane?”

50 Dumbi omui mu beeghesebuwa be aba aabhulayo kihiyo kiye, aajomb’o muheeleliya wa mukulu wa bahongi boona kutui kwabuliyo.

51 Bhaatu Yesu aaghila beeghesebuwa be aba ati, “Dheka! Mutalwana!” Dumbi akwata haa kutui kwa musaasa oghu, kwakilil’o.

52 Yesu aaghila bakulu baa bahongi, baasilikale abaalindagha Numba ya Luhanga, hamui na bengei baa Bayudaaya abaasiye kumukwata ati, “Mwanjisiye mukwete bihiyo na miigho nga baasiye kukwata mujindi nangaaki?”

53 Buli kilo naakalagha naanu mu Numba ya Luhanga nineeegheesiya bantu, tamwankwete bwile obu bbaa. Bhaatu endindi Luhanga aasimilaniye Sitaani kubakoleesiya haabwa bwile bukee.”

Peetelo neehighaana Yesu

(Matayo 26:57-58, 69-75; Maliko 14:53-54, 66-72; Yohaana 18:12-18, 25-27)

⁵⁴ Abaalindagha Numba ya Luhanga baakwata Yesu baamutwala mu ka ya mukulu wa bahongi boona. Peetelo aaghenda abalabhiye enuma bukee-buke hali hambali haseliyo.

⁵⁵ Obu baakidhiye, bantu baatumika mulilo ghwa kwota hanjaakati ya mukulu wa bahongi boona oghu. Bantu baasitama, baatandika kwota. Niibuwo Peetelo naye aasiye aabasitamamu.

⁵⁶ Naanoota, manaabukali muheeleliya wa mukulu wa bahongi boona aasa. Aakala alolele-eye Peetelo, dumbi aaghila bantu abootagha ati, "Musaasa oghu naye abaagha na Yesu."

⁵⁷ Peetelo eehighaana ati, "Mukali uwe, musaasa okughamba oghu siye tanimumaniye bbaa!"

⁵⁸ Haanuma ya bwile bukee, muntu onji amaniihila Peetelo oghu, aamughila ati, "Naawe majima oli omui mu bantu aba." Bhaatu Peetelo aatodha eehighaana ati, "Siye bbaa!"

⁵⁹ Haanuma ya saaha nga emui, muntu onji aatodha aamweboheelela ati, "Majima kuwo musaasa oni ni omui mu baakalagha na Yesu, nanga naye dheer ni Munagalilaaya!"

⁶⁰ Peetelo eehighanilana kimui ati, "Ebi okwete kubugha ebi tambimaniye kandi tambyetegheleeje bbaa!" Naaneehighaana atiyo, nkoko yaakooka.

⁶¹ Dumbi Mukama eegaaliya, aalola Peetelo oghu. Peetelo aasuka ngoku Yesu aamughiliye

ati, “Obwalo nkoko etakakookiye, okuba nuwaaneehighaane kasatu.”

⁶² Dumbi Peetelo aatuwa enja, aatandika kulilila kimui.

Basilikale mbawaawaaniya Yesu

(Matayo 26:67-68; Maliko 14:65)

⁶³ Baasilikale abaabaagha balindiye Yesu mu nkomo, baatandika kumuwaawaaniya kandi mbanamuhuula.

⁶⁴ Baamuboha kitambaala haaliiso kandi baamutalangiya, mbanamughila bati, “Mulangi uwe otughambile, ni ani aakuhuuye!”

⁶⁵ Baakala mbanabugha bintu binji bibhihiye bikaniye byakumuwaawaaniya.

Mbatonganiya Yesu

(Matayo 26:59-66; Maliko 14:55-64; Yohaana 18:19-24)

⁶⁶ Nkyambisi cui-cui, Lukulato Lukulu lwa bengei, olwabaaghamu bakulu baa bahongi na beegheesiya baa bilaghilo, lwasitama. Baalaghila kuleeta Yesu mu Lukulato olu.

⁶⁷ Obu baamukidhiyemu, baamemba aba baamubuuliya bati, “Tughambila, nuuwe Kilisito?”

Aabakuukamu ati, “Nankabha mbaghambila, tamukusijima ebi nkwete kubugha bbaa.

⁶⁸ Kandi nankabha mbabuuliya, tamukunkuukamu.

⁶⁹ Bhaatu mu bwile butaseliye, Mwana wa Muntu akusitama haa luhande lwa mukono ghwabuliyo ghwa butoki bwa Luhanga!”

⁷⁰ Boona baamubuuliya bati, “Buuye nuuwe Mwana wa Luhanga?”

Aabakuukamu ati, “Ee, ngoku mwabughije.”

⁷¹ Niibuwo baaghambilaane bati, “Tunaakub-bala baakaiso banji baaki? Etuwe boonini twehighwiliye ebi aabughije.”

23

Pilaato naatonganiya Yesu

(Matayo 27:1-2, 11-14; Maliko 15:1-5; Yohaana 18:28-38)

¹ Baamemba abaabaagha mu lukulato olu boona baamuka, baatwala Yesu ewaa Pilaato oghu akaba alemiye disitulikiti ya Buyudaaya bwile obu.

² Baatandika kumunyegheelelela bati, “Twakwete musaasa oghu naajeemeesiya bantu b’ewaatu ati bahakaniye bulemi bwa Balooma. Aabatangagha ati bataha musolo ghwa Kaisaali. Kandi akweghilagha ati niye Kilisito, mukama.”

³ Pilaato aabuuliya Yesu ati, “Nuuwe Mukama wa Bayudaaya?” Yesu aamukuukamu ati, “Ee, ngoku waakabughije.”

⁴ Niibuwo Pilaato aaghiliye bakulu baa bahongi aba na bantu boona abaabaagh’o ati, “Tamboone eki musaasa oni aasobeeiye bbaa!”

⁵ Bhaatu bantu aba baatandika kugolela kimui bati, “Musaasa oghu ebi akwete kwegheesiya byaleetelije bantu b’ewaatu kuukala mbatuwa nsisi. Akatandikila mu disitulikiti ya Galilaaya, aahika na Buyudaaya, n’endindi aatodhiye kukuuka mu kibugha kya Yelusaalemu.”

⁶ Obu Pilaato aaghuuye bantu aba mbaghila bati Yesu akatandikila e Galilaaya kwegheesiya,

niibuwo aababuuye Yesu alakaba ali Mungalilaaya.

⁷ Baamughila bati, “Ee,” Dumbi aamanya ngoku Yesu alughiye mu disitulikiti eghi Helude alemiye. Aalaghila ati batwale Yesu ewaa Helude, nanga bwile obu naye dheer akaba ali mu kibugha kya Yelusaalemu.

⁸ Obu baamukidhiyeyo, Helude aadheedheluwa kimui kumubona, nanga akaba naamaliye bwile bukaniye naabbala kumubona kandi naaghuuye makulu ghakaniye ghaa byakuswekaniya ebi Yesu aakolagha. Eelilikanagha ati Yesu akumukolela kyakuswekaniya kyona.

⁹ Eki niikiyo kyalekiye aabuuliya Yesu bibuuliyo bikaniye, bhaatu Yesu ataamukuukamu na kantu.

¹⁰ Bakulu baa bahongi, na beegheesiya baa bilaghilo baamilila, baatandika kunyegheelela Yesu bati aakoliye bintu bibhihiye bikaniye.

¹¹ Helude na baasilikale be baatandika kubbaakiisiya Yesu kandi baamuwaawaaniliya kimui. Baamuluwika kiluwalo kya bukama nga mukama. Dumbi Helude aalaghila ati bamukuukiye ewaa Pilaato.

¹² Helude na Pilaato bakaba bali nguwe na mbuli, bhaatu kilo eki kyonini baabhootwana.

*Mbatwila Yesu musango ghwa kukuwa
(Matayo 27:15-26; Maliko 15:6-15; Yohaana
18:39—19:16)*

¹³ Pilaato aabilikila bakulu baa bahongi, bengei baa Bayudaaya na bantu boona kugumbaana hamui.

14 Obu baagumbaane, aabaghila ati, “Mwandeteeye musaasa oni kandi mwamunyegehelela muti niibuwo aahaaghiliya bantu kuhakaniya bulemi bwa Balooma. Bhaatu obu naamubuuliliye bhyani mu maaso ghaanu naasangiye atali na kyona eki aasobeeiye h’ebi mukwete kumunyegehelela muti aakoliye.

15 Na Mukama Helude taaboone eki musaasa oni aakoliye bbaa, niikiyo kyalekiye aatodha aalaghila ati bamukuukiye hani. Musaasa oni tambhonganuuwe kumutwila musango ghwa kukuwa bbaa!

16 Bhaatu nkulaghila baasilikale banje bamuhuule bibbooko, dumbi nimulekele aghende.”

[
17 Mu bilo bya Kighenu Kya Kuusuka Kusaaluw’o, Pilaato aalekelagha munyankomo omui oghu Bayudaaya baasabagha bati alekele.]*

18 Ti bantu boona abaabaagha mu lukulato olu, obu baaghuuye ebi Pilaato akwete kubugha, baatandika kugolela kimui bati, “Otulekeelele Balaba! Yesu bamubambe haa musalaba!”

19 Balaba oghu bakaba bamukwete kandi ali mu nkomo haabwa kuba omui mu bantu abaali bakwatuuwe haabwa kwita bantu e Yelusaalemu mu bulemo bwa kubbala kuuy’o bulemi bwa Balooma.

20 Pilaato aabbalagha kulekela Yesu, niibuwo aatodhiye aaghambila bantu aba ngoku Yesu atali n’eki aasobeeiye.

* 23:17 23:17 Lukaala luni taluli mu bihandiiko binji, bakalutigha.

21 Bhaatu bantu aba beeyongelela kimui kugola bati, “Bamubambe haa musalaba! Bamubambe!”

22 Pilaato aatodha aabugha nabo mulundi ghwakasatu ati, “Bhaatu Yesu aatuuye musango ki? Nanga siye tamboone ali na musango oghwan-guleka nimutwila musango ghwa kukuwa! Nkulaghila bamuhuule bibbooko, dumbi nimulekele aghende.”

23 Bantu aba beeyongelela kimui kugola bati akulaghiluwa kubambuwa haa musalaba. Haabwa kugola kusaalukaane, haakumaliilila, baadhootiya Pilaato.

24 Aasiima kutwila Yesu musango ghwa kumamba haa musalaba ngoku ebo baabbal-
agha.

25 Aalekela Balaba oghu bantu aba baasabiye bati alekele. Balaba oghu akaba akwatuwe mu nkomo haabwa kutuwa bulemo bwa kubala kuuy’o bulemi bwa Balooma kandi aata muntu mu bulemo omu. Pilaato aalaghila baasilikale be kubamba Yesu haa musalaba ngoku Bayudaaya aba baabbalagha.

Mbabamba Yesu haa musalaba

(Matayo 27:32-44; Maliko 15:21-32; Yohaana 19:17-27)

26 Baasilikale aba mbanatwala Yesu hambali bakumumbila, baasangaana musaasa alughiyе mu tauni ya Kilene,† liina liye Simooni. Bwile obu aalughagha mu kyalo naaghenda mu kibugha kya Yelusaalemu. Baamuhambilija

† 23:26 23:26 Kilene ekaba eli tauni y’omu elughulu ya Aflika.

kuheeka musalaba oghu Yesu aabaagha aheekiye kandi kughenda alabhiye Yesu. ²⁷ Bantu bakaniye kimui baaghenda balabhiye Yesu. Mu bantu aba hakaba halimu bakalì abaaghendiyè bamulabhiye mbalilila kimui haabwa kutuntula kwamaani.

²⁸ Yesu eegaaliya, aalola bakalì aba, aabaghila ati, “Enuwe bakalì abaalughiyè e Yelusaalemu, muleke kulila siye nenkaha, bhaatu mwelile kandi mulile haabwa baana baanu.

²⁹ Bwile bukuhika hambali bantu balighila bati, ‘Bali na mugisa bakalì ngumba na matundu aghatakabyalagha na mabeele aghatakonkiyagha.’

³⁰ Ti bwile obu bantu balighila myena bati, ‘Mutwegengele!’ Kandi baghile bwena bati, ‘Mutuswikile!’*

³¹ Nanga byaba bitiyò haa kiti kibisi, ti bikuba bitiya haa kyomiye?”

³² Basaasa babili nkoli sya bibhi baatwaluwa kubambuwa hamui na Yesu.

³³ Obu baakidhiye mu kikalò eki bakughilaghamu “Kikalò kya Kahanga,” baabamba Yesu haa musalaba. Baabamba dheè basaasa babili nkoli sya bibhi aba haa misalaba. Ghw’omui baaghuumililiya haa luhande lwabuliyo bwa Yesu, na ghwonji haa lwabumesu.

³⁴ Niibuwo Yesu aasabiye naaghila ati, “Tita, obaghanile, nanga tabamaniye eki bakwete kukola.”‡ Kandi baakoma buluulu kutambulana biluwalo biye.

* **23:30 23:30** Hoseya 10:8 ‡ **23:34 23:34** Bighambo ebi tabili mu bimui mu bihandiiko bya hambele.

35 Bantu boona baneemiliy’o, banaloliye ngoku baabambiye Yesu, baasilikale baakoma buluulu kumanya ngoku bakutambulana biluwalo biye. Beebembeli baa Bayudaaya baatandika kumubbaakiisiya bati, “Aajunagha bantu banji. Dheluuni eejune alakaba aaniye Kilisito, oghu Luhanga aakomiye kulema.”

36 Na baasilikale abaabambiye Yesu nabo baamubbaakiisiya dhe. Baamwebinga kumubbaakiisiya, baamuha viji esaaliye.

37 Baamughila bati, “Olakaba majima oli Mukama wa Bayudaaya, weejune!”

38 Musango oghwalekiye baamubamba, baaghuhandiika haa kabbaa ngu “Oni niye Mukama wa Bayudaaya.”

39 Omui mu nkoli sya bibhi aba baabambiye hamui na Yesu aamubbaakiisiya ati, “Majima olakaba oli Kilisito, dheluuni weejune naatu otujune!”

40 Bhaatu muunakiye aamusoghosa ati, “Ekikukubughiisiya kitiyo nkiki? Tookwobaagha kifubilo kya Luhanga? Etuwe boona baatutwiliye musango ghwa kukuwa ghususaane.

41 Baatutwiliye siye hamui naawe musango ghwa kutubamba haa musalaba. Eki niikiyo kifubilo eki tubhonganuuwe kutunga haabwa bintu bibhihiye ebi twakoliye, bhaatu musaasa oghu taali n’eki aasobeeje.”

42 Niibuwo aaghiliye ati, “Yesu, onjisuke obu okwisa mu bulemi bwawe.”

43 Yesu aamukuukamu ati, “Majima, obwalo okuba nanje mu kikalalo kya businge bwona.”

Yesu naakuwa
(Matayo 27:45-56; Maliko 15:33-41; Yohaana 19:28-30)

⁴⁴⁻⁴⁵ Obu bwahikiye saaha mukaagha sya ntangaali, musana ghwalima, mwelima ghwakwata mu ehanga eli lyona, ghwahikiya saaha mwenda. Bwile obu bwonini, kateni eghi ekaba edhod-hookeeye mu Numba ya Luhanga yaatemukamu kabili.

⁴⁶ Yesu aatakila kimui n'elaka lyamaanini ati, "Tita, mwoyo ghwanje naaghuta mu mikono yaawe!" Obu aamaliye kubugha atiyo, dumbi aatwikana.

⁴⁷ Obu mukulu wa baasilikale kikumi baa Looma aaboone ebyabaay'o byona, aasinda Luhanga naaghila ati, "Majima musaasa oghu aabaagha atali na musango!"

⁴⁸ Bantu bakaniye kimui bakaba baasiye kulola ngoku baasilikale bakubamba Yesu. Obu aaboone ebyabaay'o byona, baakuuka mu maka ghaabo mbadhingiya mituwe.

⁴⁹ Baabhootu sya Yesu bakaniye bakaba beemiliye hambali haseliy'o baloliye ebikwete kumulehukan'o. Mu bantu aba hakaba halimu bakalini abaabaagha balughiye mu disitulikiti ya Galilaaya, baasiye na Yesu e Yelusaalemu.

Yesu naajiikuwa
(Matayo 27:57-61; Maliko 15:42-47; Yohaana 19:38-42)

⁵⁰ Hakaba haliyo musaasa omui lijina liye Yojeefu, akaba alughiye mu tauni ya Alimateya mu disitulikiti ya Buyudaaya. Akaba ali memba

wa lukulato lukulu lwa bengej kandi ali muntu ahikiliye.

⁵¹ Aakalagha alindiliye kwisa kwa bulemi bwa Luhanga kandi taasimiye ebi baamemba baanakiye baatuuyemu kandi baakoliye.

⁵² Musaasa oghu, aaghenda ewaa Pilaato, aamusaba kumusimilaniya kujiika muku ghwa Yesu.

⁵³ Niibuwo aaghendiye, aaghuuya haa musalaba. Aaghuboha mu siiti njelu, aaghuta mu kituulo eki baabaagha balimiye mu kikuka, eki baabaagha batakajikiyemu muntu n'omui.

⁵⁴ Kilo eki kikaba kili kyakweteekanija haabwa kilo kya Sabhato kandi ekaba eli haai kutandika.

⁵⁵ Bamui mu bakali abaalughiye na Yesu e Galilaaya bakaba baliyo dhe, bakali aba baaghenda na Yojeefu haa kituulo eki baakala baloliye ngoku akwete kuta muku ghwa Yesu mu kituulo eki. ⁵⁶ Niibuwo baakuukiye Yelusaalemu hambali baabaagha baghooneeye. Baateekanija bigita bisasiye bya kusiigha muku ghwa Yesu. Bhaatu kilo kya Sabhato baahuumula ngoku kilaghilo kyalaghilagha.

24

Yesu naahumbuuka

(Matayo 28:1-10; Maliko 16:1-8; Yohaana 20:1-10)

¹ Haa Kyasande, * kilo ky'okudubha mu wiji, bakali baakeelela nkyambisi cui-cui, kughenda

* **24:1 24:1** *Kyasande* ni eki banji bakughilaghamu Kyasabbijite, bhaatu kitali kilo kya Sabhato.

haa kituulo kutwala bigita bya kusiigha muku ghwa Yesu.

² Obu baakidhiyo, baasanga ebaale baliihiye haa mulyango ghwa kituulo.

³ Obu baataahiye, baasanga muku ghwa Mukama Yesu ghutalimu.

⁴ Mbaneelikan' o ekyaghubaayo, beetulakaka basaasa babili babeemiliye ng'ala, baluwete nkanji sijelu dhiyo.

⁵ Bakali aba baateeliya kandi beetulika, haaliiso yabo haakuma hansi nanga bakaba boobahiiye kimui. Niibuwo basaasa aba baabaghiye bati, "Ekikubabbaliya mwomiji mu bakuyye nkiki?"

⁶ Taali hani, aahumbuukiye! Muusuke eki aabaghambiiye obu aanabaagha naanu e Galilaaya ati,

⁷ Mwana wa Muntu akughenda kuhebuwayo mu mikono ya basiisi, bamubambe haa musalaba, bhaatu haa kilo kyakasatu ahumbuuke."

⁸ Obu bakali aba baaghuuye ebi, baasuka ebi Yesu aabaghambiiye.

⁹ Baalugha haa kituulo haala baaghenda baaghambila bakwenda baa Yesu ekumi n'omui, n'aba baakalagha nabo boona.

¹⁰ Bakali aba ni: Maliya Mangadhalina, Yowana, Maliya nina Yakobbo, hamui na bakali banji, niibo baaghambiiye bakwenda.

¹¹ Bakwenda aba baaghuwa ebi bakali aba bakwete kubaghambila bili nga bintu byakitiyokitiyo kandi baabhenga kuhikilija ebi bakwete kubugha ngoku ghali majima.

12 Bhaatu Peetelo aamuka, aaligita kughenda haa kituulo. Obu aakidhiy'o, aagomba, aalangiliyamu, aabona sijiti esi baabaagha babohiyemu mukū ghwa Yesu aaniisiyo silimu syonkaha. Dumbi aalugh'o, aakuuka ewe e ka aswekiye haabwa ebyabaay'o.

*Beeghesebuwa babili abaaghendagha Emaau
(Maliko 16:12-13)*

13 Kilo Kyasande eki kyonini, babili mu beeghesebuwa baa Yesu baaghendagha mu muhili oghu bakughilaghamu Emaau, haai nga mailo musanju kulugha e Yelusaalemu.

14 Baaghenda mbahaana makulu ghaa ebyamubaay'o mu wiji eghi.

15 Mbanaghahaana, Yesu aabeebinga aatandika kughenda hamui nabo.

16 Bhaatu Luhanga ataabasijimilaniya kumumaniilila.

17 Niibuwo aababuuiye ati, "Ni makulu ghaaki mukwete kuhaana nimunaghenda?" Baamilila baamulola. Haaliiso yabo oolekagha ngoku batuntuliiye kimui kandi maani ghabahooye haabwa ebyabaay'o Yesu.

18 Niibuwo omui muli ebo, liina liye Kulyopa, aaghiliye ati, "Nuuwe mughenu enkaha oghu ali mu Yelusaalemu muni oghu atamaniye ebyabaayemu bilo bini?"

19 Yesu aabaghila ati, "Mbiki byabaayemu?" Baamughila bati, "Ebyabaay'o Yesu w'omu tauni ya Najaaleeti. Aabaagha ali mulangi wamaani mu ebi aakolagha kandi ebi aabughagha mu

maaso ghaa Luhanga na mu maaso ghaa bantu boona.

²⁰ “Bakulu baa bahongi na bengej baatu baamuhaay’o kutwiluwa musango ghwa kukuwa, baamubamba haa musalaba.

²¹ Twabaagha tumanije tuti niye akucungula etuwe Banaisaaleeli. Ti kwongela hali eki, obwalo ni kilo kyakasatu bintu ebi bibaay’o.

²² Kusa ekyatuswekanije, ni obwalo nkyambisi, bamui mu bakalij aba tukuukalagha nabo, baakeeleeye baaghenda haa kituulo.

²³ Obu baakidhiy’o matahamu baasanga muku ghuwe ghutalimu. Baakuuka, baasa baatughambila bati haa kituulo baaboone baamalajika abaabaghijye bati ni mwomiji.

²⁴ Na bamui mu bantu aba tukuukalagha nabo baaghendayo dhe, majima nabo dhe baasanga muku ghuwe ghutali mu kituulo.”

²⁵ Yesu aabaghila ati, “Badhoma enuwe! Mitima yaanu yoomakakaane kuhikijja ebi balangi baabughije nangaaki?”

²⁶ Takyetaaghisibuwagha Kilisito kubona-bona ebi byona, niikuwo ataahe mu kitinisa kiye?”

²⁷ Yesu aatandikila haa bya Musa na balangi boona, aabasoboolola bintu byona ebili mu Ebyahandijikuwe ebimukwet’o.

²⁸ Obu baakidhiye mu mubhiji hambali basaasa babili aba baaghendagha, Yesu eefoola nga muntu akubbala kusaala.

²⁹ Bhaatu baamwesengeleliya bati, “Wiise tuukale hamui, nanga musana ghulimakota kandi bwile bulimaala.” Nahabweki aasiima aaghenda nabo.

³⁰ Obu baataahiye mu numba, baasitama kuliya. Yesu aakwata mugaati aaghubhegha, aasaba naasiima Luhanga haabwa mugaati oghu kandi aabaha ghuwo.

³¹ Bwile obu maaso ghaabo ghaaghulika, baamumaniilila. Bhaatu eye aababulangan'o, baaleka kumubona.

³² Niibuwo baaghambilaane bati, "Buuye eki taaniikiyo kyalekiye twadheedheluwa kimui mu kihanda ntunaasa obu aatusoboololagha Ebyahandiikuwe?"

³³ Dumbi basaasa aba baamuka, baakuuka Yelusaalemu bwile obu bwonini. Baasanga beeghesebuwa ekumi n'omui hamui na banji beekumaaniliye hamui.

³⁴ Baaghilagha bati, "Majima Mukama waatu aahumbuukiye kandi aabonekeeye Simooni!"

³⁵ Niibuwo na babili aba baatandikiye kusoboolola ebyababaay'o mu luguudhe kandi ngoku baamumaniliye obu aabheghiye mugaati.

*Yesu naabonekela beeghesebuwa be
(Matayo 28:16-20; Maliko 16:14-18; Yohaana 20:19-23; Bikoluwa 1:6-8)*

³⁶ Ababili aba mbanaghaha, kibbula kyona kyabona Yesu aamiliye haagati yabo, aabaghila ati, "Mpempa yonkaha!"

³⁷ Bhaatu bo boobahila kimui baamanya bati baaboone mulimu.

³⁸ Niibuwo aabaghiliye ati, "Mwobahiye nangaaki? Kandi mukwete kughuluka-ghulukiya muti taaniisiye nangaaki?"

³⁹ Mulole ngalo syanje na bighele byanje, niisiyoni neenini! Munkum'o niikuwo mumanye

ngoku aanjisiye neenini. Nanga mulimu taghuli na mubili na makuwa ebi ndi nabiyu.

⁴⁰ Obu aamaliye kubugha atiyo, dumbi aabooleka ngalo siye na bighele biye.

⁴¹ Bhaatu haabwa kusweka kandi kudheedheluwa kimui, bataahikilija ngoku ebi akwete kubugha ghali majima. Niibuwo abaabaghiliye ati, “Mukaakuba muli na kookuliya, mukampe nkaliye.”

⁴² Baamuha kitwike kya nsui yookeeje,

⁴³ aakikwata, aatandika kukiliya banamuloliye.

⁴⁴ Aabaghila ati, “Obu naanabaagha naanu naabaghambilagha nti byona ebi Ebyahandiikuw’o mu bilaghilo bya Musa, na balangi, hamui na Jabbuli bikulaghiluwa kuusuliisibuwa.”

⁴⁵ Aabasoboolola makulu ghaa Ebyahandiikuwe ebi niikuwo bagubhe kubyetegheeleliya.

⁴⁶ Aabaghila ati, “Ebyahandiikuwe bimbughiy’o biti Kilisito balimubona-boniya kandi haa kilo kyakasatu ahumbuke mu bakuye.

⁴⁷ Ti haabwa eki, kwekuukamu na kughaniluwa kwa bibhi bikulaghiluwa kutebejebuwa mu liina liye mu mahanga ghoona, kutandikila e Yelusaalemu.

⁴⁸ Ninuwe baakaiso baa bintu ebi.

⁴⁹ Nkubatumila eki Tita aabalaghiisaniiye. Bhaatu mudubhe muukale mu kibugha kya Yelusaalemu, kuhikiya mutungiyeye maani aghakulugha mu eghulu.”

Yesu naatwaluwa mu eghulu
(Maliko 16:19-20; Bikoluwa 1:9-11)

⁵⁰ Yesu aaghenda na beeghesebuwa be, aabahikiya haai na mubhili ghwa Bbetaniya. Aamukiya mikono kubaha mugisa.

⁵¹ Naanabaha mugisa, aatwaluwa mu eghulu.

⁵² Dumbi beeghesebuwa be aba baatandika kumulamiya kandi baakuuka Yelusaalemu badheedheleeuwe kimui.

⁵³ Ti baaghendagha buli kilo mu Numba ya Luhanga kusinda Luhanga.

**Ndaghaano Mpyaka na bimui haa bitabo
by'omu Ndaghaano Nkulu mu Lubwisi
Talinga-Bwisi: New Testament and 15 Old Testament
books in Lubwisi**

copyright © 2019-2025 Wycliffe Bible Translators, Inc.

Language: Talinga-Bwisi

Contributor: Wycliffe Bible Translators, Inc.

Talinga-Bwisi: New Testament and 15 Old Testament books in Lubwisi

For more information, see <https://uganda.sil.org/>

All rights reserved.

2025-01-28

PDF generated using Haiola and XeLaTeX on 23 Apr 2025 from source
files dated 28 Jan 2025

928c080e-d746-567f-a478-b44698424e44